

لحظات أخرى

هيثم أحمد

لحظات أخرى
هيثم أحمد
تدقيق لغوي: سكون لخدمات الكتب
تصميم الغلاف : عيبر محمد
رقم ايداع: 2019/2185
ترقيم دولي: 978-977-6594-71-5

دار فصله للنشر والتوزيع
العزيزيه - منيا القمح - مصر
٠٠٢٠١٠٦٧٠٠٠٧٠١

fasla.pub@gmail.com
Www.FaslaPub.Com



جميع حقوق الطبع و النشر محفوظة

الطبعة الأولى يناير ٢٠١٩
الطبعة الثالثة يناير ٢٠٢٠



جميع حقوق النشر محفوظة لدار فصله للنشر و التوزيع
إن أي تصوير أو إعادة طبعه أو نشر بشكل ورقي أو الكتروني أو ترجمته أو تسجيله
صوتيا بدون إذن كتابي مسبق من الدار يعرض صاحبه للمسائلة القانونية

لحظات أخرى

هيثم أحمد



فصلة

للنشر والتوزيع

Fasla Publishing & Distribution

إهداء

إلى الحبيب الذى هجر والصديق الذى فارق، إلى سقطاتنا ونزواتها،
إلى العودة بعد إنكسار والندم بعد الخطيئة، إلى الدنيا وما فيها.

أشعر بالغثيان هذا هو حالى صباح كل يوم...

غرفة أعلى سطح بناية بأطراف المدينة، مرحاض صغير يكفى لقضاء حاجته والاستحمام دون باب، اكتفى بوضع ستارة لتحجب الرؤية عن لا أحد، ربما استخدم هذا الساتر فى إحدى الشتويات عندما شعر بالبرودة فى لحظات استمتاعه بحمامٍ دافئ، كل ما كان يحتاجه مسمارين ولحاف قديم فصار هذا الساتر، قاعدة المرحاض أمام الستارة مباشرة، على اليمين دُشّ يعتلى حوض استحمام صغير يرتفع عن الأرض بضعة سنتيمترات لا تمنع المياه من الهروب، أمام الدش حوض معلق أسفل مرآة وحامل اصطف عليه بترتيبٍ لا يتغير فرشاة أسنانه ومعجونها ثم ماكينة حلاقة كهربائية، زجاجة عطر، أغراض كثيرة لم تُستخدم منذ فترة طويلة، تحتوى الغرفة على سرير قابع أسفل شباك على يساره الحائط وعلى يمينه منضدة تحمل أوراقا وأقلامًا ثم اللحاف المعلق، مرورًا بمكتبة صغيرة الحجم مُتخمة بكتبٍ تغطيها الأتربة، وقبل الباب لوحة معلقة لفتاة ملامحها ضبابية فوق رف اصطف عليه برواز فارغ وقلب أبيض اللون، آخر ما فى الغرفة كرسيان أحدهما مخصص للكتابة والآخر لم يُستخدم ولكنه اهتم بنظافته، خارج الغرفة وعلى اليسار غرفة أقل مساحة فتح لها منفذًا صغيرًا من الداخل، وضع فيها ثلاجة وموقد مُسطح

وحوض صغير، تلك هي مملكته الخاصة، استطاع هنا أن يهرب من كل الضغوط التي لاحقته طوال حياته.

الساعة الحادية عشر صباحًا موعد استيقاظه قبل مغادرة السرير يفتح زجاج نافذة الغرفة الوحيدة يوارب الشيش، يهرب منه خيط رفيع من أشعة الشمس التي بدورها تُثير ذرات أتربة صغيرة تدور في عشوائية، يُشعل النار على إناء من الحليب ويضعه على أضعف درجات الشعلة ثم يتجه ليأخذ حمامًا يوميًا، شاي مغلي يُمزج جيدًا مع الحليب وثلاث ملاعق من السكر هو مشروبه الصباحي المقدس، يبدأ بعده في وصلة كتابة لا تنتهي قبل أن يستيقظ في صباح يوم آخر، هل شعرت بالملل من هذه الحياة؟ ربما! لكنه لا يشعر بملل قط، زين المساحة الواقعة أمام الغرفة باللون الأخضر بعد أن اكتشف هواية جديدة في تربية النباتات المنزلية... اليوم كل شيء تغير.

اليوم اشتد على الغثيان، الحل السريع في حمام دافئ رغم حرارة الجو، ولكن قبل أن أمد يدي لأفتح زجاج النافذة سمعت طرقات رقيقة على الباب، بالتأكيد ليست للكائن «سعيد» فهو «حَلُوف» بجسدٍ ضخم لا يَمَلُّ من الحديث عن الشهوات، يده أضخم من تلك الطرقات الرقيقة، لكنه رغم هذا يُغنيني عن المرور خارج حدود غرفتي، اللعنة على هذا الشعور، تتكرر الطرقات وأنا أحاول تجاهلها

حتى سمعتُ صوتًا أرقُّ من طرقات يديه:

-نادر... أ.نادر أنا عارفة إن حضرتك هنا.

هل هذا الصوت نتاج مخيلتي التي لم تكتفى بسرد خيالات على الأوراق؟ نفسٌ عميق.. لا يضر لن أفتح حتى تنتهى طقوسى الصباحية غير ذلك لن يُجدى أن ألتقى بأحد ولكن الصوت زاد إصرارًا:

- حضرتك موجود وصحيت الساعة ١١ بالضبط ممكن تفتح؟

أفرك فروة رأسى بيدي، كان لا بد من الاستجابة لتلك النداءات إما أن ترحل وأتأكد أنها أوهام أو تبقى وتكون حقيقة

-يا الى على الباب استنى ربع ساعة وهفتح.

لُجيب صاحبة الصوت العذب:-

-أنا هستناك، براحتك.

يتابع نادر طقوسه الصباحية وإن أستمّر تحت الماء الدافئ لفترة أطول من المعتاد حتى خرج مسرعًا لينقذ الحليب من الفوران ويخسر كوبه فلم يتبقّ إلا القليل منه، ولم يأت سعيد حتى الآن ليمده باحتياجات، تم إنقاذ المشروب بنجاح، أخذ نفسًا عميقًا وهو يفكر «أنا أكيد كنت بتخيل» يتابع ذرات الأتربة الممتزجة بضوء الشمس

من الخلف وهو يحاول تذكر آخر فقرة توقف عندها يوم أمس حتى قاطعه الصوت مرةً أخرى: -أستاذ نادر؟!!

على أن أفتح، فهذا الصوت ليس نتاج مخيلتي، رهبةٌ تتسلل داخلي وأنا أفتح الباب لأجد شخصاً غير «الحلوف» أنظر أمامي لامرأةً عشرينية ترتدى قميصاً فضفاضاً وبنطالاً من القماش لا يختلف عن اتساع القميص وشعرٌ لم تصفقه واكتفت «بالكعكة الشعبية» ورغم عدم اهتمامها بملابسها إلا أنها بيضاء جميلة بعينين غجريتين، وشفيتين كنبته عنب أحمر قُطفت حديثاً، وغمازتين ألجمتاني عن الرد.

-صباح الخير.

يفتح عينيه بصعوبة ولم يرد.

-.....

-أنا آسفة إني جيت من غير ميعاد بس أنت وحشتني.

نظر إليها بدهشة فهو لم يعد يتذكر أحد ممن التقى بهم في سنواته الماضية، أخذ رشفةً من كوب الشاي بالحليب ليستجمع أفكاره ثم ثئاب بشكلٍ ملحوظ

-أنا.. وحشتك!!!!!!

-جداً.

- حضرتك أنا ماعرفكيش!

كان لا بد أن أغلق الباب سريعاً حتى لو كان بيننا علاقة فأنا قررت الانعزال عن الماضي، لهذا أعطيتها ظهري دون رد وكدت أن أغلق الباب إلا أنها وضعت يديها، فأغلقتة عليها وصدر منها آهة مكتومة جعلتني أتراجع عن قرارى.

-أنا آسف... إيديك كويسة؟

-آه... شوية... بسيطة.

لم ترفع عيناها عن نادر، ربما كانت تحاول أن ترسم ملامحه داخلها.

-طيب تمام.. أنا ماعرفكيش.

- حضرتك مؤلف رواية «حلم».

دهشةً في ملامح نادر وهو لا يزال يتثائب.

-رواية إيه!

-«حلم»... الرواية الى كتبتها عنى... أنا حفظها.

نظر إلى صدق عيناها وهى تؤكد على تلك الرواية.

-أنا أعرفك من الرواية وأنت تعرفنى كويس، وحسيت إنك الوحيد

الى ممكن...

أشار بأصبعه إليها لتتوقف.

-يبقى ماتعرفينيش... عشان مكتبتش رواية، وأنا عمرى ما شفتك قبل كده.

كان عليها أن تتمسك بالحوار إلى أبعد من هذا.

-يمكن أنت لسه مكتبتهاش بس هتكتبها... وأنا أعرفك جدًا...
مفيش خيال يخرج الكلام ده إلا لو كان موجوع... إلا لما يكون
حاسس بكل تفصيلة... النهاردة عدت سنة كاملة من ساعة ما
قرأتها... سنة وأنا مش عارفة أخرج براها... سنة وأنا مستنيك سنة
وأنا سايبة الدنيا وبادور عليك.

أشاح نادر بيديه مرة أخرى.

-أولاً أنا مش مهتم أعرف أحاسيسى كانت عاملة إزاي... ثانياً أنا
قررت إنى أكون وحيد من زمان.. ف أرجوكم امشى ومتجيش تانى...
وأنا مش بكتب، والله مش بكتب، أنا معنديش حاجة أكتبها.

-أنا هعتبر إنك مكتبتش حاجة بس أنا هفضل هنا لحد ماتسمحلى
بمساحة أحكى فيها قصتى.

يكفى هذا الحوار الذى استهلك طاقةً أكثر مما أعتدتُ عليه، أغلقت الباب مرةً أخرى وأنا حذر كى لا يتكرر الخطأ، نظرت إلى الفراغ المحيط ثم إلى كَمِّ الأوراق الملقى على الأرض، وسؤالٌ فى الأفق يتردد «هل أنا حقًا لى القدرة على الكتابة؟!» لا أظن، رغم تلك الأوراق التى غطاها الحبر الأسود بمشاعر لا أعلم كيف وُلدت إلا أننى على يقين أن هذه الفتاة تهذى، لا لن أخرج من صومعتى، صوت هذا الشخص المزعج يخرجنى من لحظات التأمل.

-يا عم نادر، أنا جبت اللى أنت عايزه، افتح.

كلمات قليلة هى التى استخدمها فى الحديث معه.

-وطى صوتك يا حبيبى أنت إيه! حلوف؟

ثم أغلق الباب ورأى ولكنه قاطعنى:

-ماتقوَلِّيش يا حلوف... أنا هربان من أمى عشان كانت بتقولى يا مقطوع، هو أنا مش عارف إيه مقطوع دى، ومقطوع من إيه بس زهقتنى.

-مش هقولك يا حلوف تانى... حاضر بس ده لا يمنع إن ده شعورى ناحيتك.

-أنت لىك فى المُززا يا عمنا؟

-مزز إيه يا حلوف..؟ معلش... يا سعيد.

-فى واحدة قاعدة برة مستنياك يجيلها يومين.

هل مريومان منذ حوارى مع تلك الفتاة؟! مستحيل.. هل أصبحت تفاصيل حياتى مكررة بدقة حتى أنى فقدت الزمن! لا أعلم إن كان قد مريوم أم لا، فأنا لا أعرف تاريخ الحوار الذى دار بيننا.

-هى قاعدة هنا بقالها يومين فعلاً!!؟

أشعل سيجارة وهو يهز جسده يمينًا ويسارًا وينظر إلى نادر المصدوم كليًا.

-باشوفها طالعة كل يوم الساعة ١٠:٣٠ كده وبتنزل الساعة ١٠ بليل... قول شفتها مرتين الصبح وزيهم بليل.

-كام يوم يعنى؟

-من إمتى بتحسب أيام؟

-هو أنت مش صغير ع السجاير دى؟

-مفيش هنا كبير وصغير... عيش يا أستاذنا.. ودى مش أى سيجارة، دى متكلفة. كان على أن أتأكد هل دار بيننا حوار حقًا؟ فتحتُ الباب بحدِرٍ وأنا أنظر من طرفه، كانت تجلس على الأرض

مستندة على سور السطح المواجه لهوايتي الجديدة -مشتلى الصغير-، خلعت قميصها من حرارة الجو فكشفت عن ذراعيها وعن رقبة عنقاء عاجية واستدارة في خصرٍ يُتَوَقَّعُ حزام لم أستطع تمييز لونه من انعكاس ضوء الشمس عليه، سارعت بارتداء قميصها في اللحظة التي أدركت أنني أسرق من جسدها نظرات، أغلقتُ الباب مسرعًا لكنني تذكرت السؤال كم من الوقت مر على لقائنا الأول؟ فتحت الباب وأنا أتحدى بجرأة زائفة واتجهت إليها ودون أن أُلقي عليها تحية من أى نوع سألتها:

-هو الحوار الى دار بيننا كان من إمتى؟

بابتسامة كشفت عن أسنانٍ بيضاء:

-مكنتش متخيلة إنك هتسأل السؤال ده.

-ليه؟

-عشان أنت كتبت الآتى؟

وقفت ثم بدأت فى إلقاء جزء من الرواية:

«كنت فاكِر إنها كل وقتى بس كل حاجة اتغيرت لما عرفت إن معاها ماكانش فيه وقت، يعنى مثلاً لو قعدت فى مكان إضاءته ثابتة وهى جنبى مش هيفرق عَدَى معاها قد إيه أو إزاي، أنا خرجت

من بُعد الزمن في اللحظة الى شفتها ومن بعدها قدرت أسيطر أنا عليه، ماكانش لازم أستنى كام ساعة عشان أشوفها أو اسمعها عشان ماكانش فيه ساعة... ماكانش فيه غير هي، اللحظة الى بتكون موجودة فيها ممكن تبقى عمر كامل»

ثم نظرت إلى نادر بعيونٍ مرتعشة.

-عشان كده مش مهم.

-بس الى كتب الكلام ده كاتبه لواحدة بيعحبها أكيد... مش ليكي أنتِ ومش أنا الى كتبته.

نظرت إليه وهي تضع رأسه بين راحتيها.

-ما هو أنا البنت الى أنت بتحبها.

-ماتزهقينيش، أنا لو كنت شفتك مرة مستحيل إني أنساكي.

-مش أنت بُعد الوقت حاجة قدرت تتحكم فيها...؟ إفتكرني بقي!

كان على أن أرد ولكن ألجم لساني مع التيار الذي سار داخلي من حرارة راحتها التي تسلفت إلى أطراف أصابعي.

-ولا أنت بتكتب حاجات مش مؤمن بيها...؟ أنت هنا عشان الوقت مايتحكمش فيك... ممكن أحكيك؟

وضعتُ كوب الشاي بالحليب على طرف السور.

-صح... أنتِ صح... مش مهم... وأنا مكتبتش ولا أعرفك... سلام.

-أنت صادق إنك ماكتبتش وأنا صادقة إنك كتبت، وأنا مستنياك
عشان عايزة رد.

-رد فى إيه؟

-هتكتب عنى الرواية الى أنت كتبتها...؟ يوروووه... هتكتب عنى
وخلص؟

-مش متعود أكتب حاجة ما حستهاش.

-ومين قالك إنك مش هتحسها؟

أخذتُ الكوب الزجاجي ونظرت إليها وإلى الضباب الذى يخفى تفاصيل
العالم من تحتى.

-معاكى فرصة واحدة بس... ولو محستش مش هكتب... بس عايز
أقولك حاجة مهمة أنا منعت نفسى إنى أحس من ساعة ما جيت
هنا.

-موافقة.

-نبدأ المرة الى جاية.

كانت قد غفلت إغلاق أزرار قميصها فالتحفت به وهى تهرول من خلفه.

-مفيش مرة جاية دلوقتى.

-مش هتخافى؟

-من إيه!!!؟

-إنك هتكونى مع راجل عايش لوحده؟

اكتفت بابتسامه وهى تسبقنى إلى الغرفة ناظرةً إلى ما بداخلها بدهشة مكتسية بحيرة ولم تتردد وهى تسألنى:

-بس؟

-هو إيه الى بس.

-ده الى فى أوضتك بس!!؟

لم يتبقى من شعيرات رأسه إلا قليل اكتسى باللون الأبيض، ألهمت التجاعيد وجهه، وشفته لم تعد قادرةً على مقاومة الرعشة حتى

قررت الصمت لم تعد أطرافه تعمل كما كانت ولم يتبق سوى عينان يُغمضهما ليعمل عقله بكامل طاقته وهو يفتح ذكريات عمره ذكرى وراء أخرى، اليوم كان مختلفاً بعد أن وضعت حفيدته أمامه كوباً من الينسون الدافئ، نظر إلى عينيها وشعرها المعصوب بصفيرة، وشفتيها تتحرك بهدوء.

-الينسون يا جدو يا جدو أنت سامعني؟

لم تتلقى رد إلا ابتسامة وهو ينظر إلى جسد امرأة نائمة أمامه، حرك رأسه ففهمت إنه يسمعها، لم تكد تترك خلوته معها إلا وأغمض عينيهِ وفتح أولى ذكرياته معها...

كانت تشبه تلك الحفيدة بتفاصيلها، هذا الوجه الذى يمتلئ بابتسامة لا تفارق الشعيرات التى تهرب من ضفירתها التى تكسر حاجز الخوف فوق جبينها، كانت اللحظة الأولى وهى بين يديه، اختفت تجاعيدها وأزاح الستار الحائل بين يديه وشعرها وبدأ فى شحن ذكرياته نظرت إليه وقالت بعينيها:

-أنا هستناك ماتتأخرش.

شعر بسعادةٍ بالغةٍ فهى لم تفتح عينيها قرابة الأسبوع تتحدث مع أناس لا يراهم، هو فقط يجلس مكانه وينظر إليها، تضع يدها بوهن فوق يده المستندة على عصاه الخشبية.

-خلى بالك من الأولاد، خليهم فى حضنك.

لم يتمالك دموعه فتحت باب سنوات عمره معها.

-أنا مش عايز غيرك.

بابتسامة باكية.

-أوعدنى إنك تعافر عشان الأولاد، هم محتاجينك لسه.

-أعافر إيه...؟ ماخلاص عافرنا سوا...

لم يتمالك أنفاسه المتلاحقة ودموعه تنهمر وهى تغمض عينيها مرةً أخرى وهى بين يديه...

نظر الجد إلى الحفيدة وهى تفتح الباب ثم سألها: -هم الأولاد محتاجين حاجة؟

بدهشة ردت: -الأولاد مين يا جدو؟

اختفت الرعشة من على شفتيه.

-أولادنا.

وقفت دون رد لم تستوعب ماذا يريد وأكمل الجد بصوت واضح:

-الأولاد كويسين أنا عارف، وممكن ماتسبينيش تانى؟

رفعت الحفيدة كتفيها.

-تحب أقعد معاك يا جدو؟

تحركت شفتاه بثباتٍ مرةً أخرى.

-لا مش لازم، أنا جايلك....

استعاد الواقع للحظاتٍ وهى يرى حفيدته.

-هو أنتِ بنت مين؟

-أنا بنت عاصم يا جدو... ابنك البكرى اللى تعبنى معاه... ابنك
تعبنى.

ابتسم وابتسمت وهى وتخرج لتجلس على الأرض مستندةً إلى الحائط
أمام باب غرفة جدتها.

وقفت تتلقت داخل الغرفة وهى تحاول استيعاب اللا شىء الموجود
داخلها، ظلت تتساءل دون إصدار أى صوت «هل حقًا يكفيك
هذا لتعيش؟» نظرت إلى البرواز الفارغ وهذا القلب الذى شعرت
معه برعشة داخلية وخوف غير مفهوم... حاولت أن تلمسه حين
قاطعها صوته:

-ده مش بيتحرك من هنا.. مش لللمس.

-ليه؟

-أنتِ عندك فرصة ماتضيعيهاش بالأسئلة الكثير.

-ليه مش عايزنى أسأل؟

لم أعتد على هذا الكم من الأسئلة حين ضربتُ بقبضة يدي طاولة الكتابة.

-أنتِ هنا عشان تحكى مش تسألى... سؤال كمان واتفضلى بره.

تركت القميص من صدمتها من عصبيته فانفتح ليكشف من جديد عن تفاصيل فصلتها بلوزتها البيضاء.

-آسفة.. آسفة... آسفة.

شعرت بضيق بعد أن نهرتها وبشهوة في جسدها، لا بد أن أرفضها الآن، لا بد أن أطردها الآن وليس بعد قليل لا يوجد شهوات هنا، لا مشاعر هنا، أنا وأنا فقط، عيناها العجريتان تحكى تفاصيل لا أفهمها وفجأة سألتها

-هو أنتِ تعرفينى فعلاً ولا أنتِ بتقولى أى كلام؟

-أنا قولتلك.. أعرفك من الرواية الى أنتِ هتكتبها عنى... وممكن

ماتزعلش؟

تجاهلتُ طلبها في عدم نهرها مرةً أخرى وكررت سؤالى.

-تانى.... أنتِ تعرفينى؟

-أنا...

-مش من الرواية... تعرفينى؟

-لو كنت أعرفك كنت أكيد هتعرف.

-أنا فقدت تفاصيل كثير من حياتى... أنا مش فاكـر غير اليوم الى جيت فيه هنا، والى قبل كده قررت أنى أنساه، ومش عايز حتى أفكر أنا كنت عايز أنساه ليه، أنا فصلت نفسى عن كل حاجة، والحاجة الى متأكد منها إنى مش عايز أرجع تانى لأى حياة أنا كنت عايشها... مش عايز.

وضعت يدها على عنقها وحاولت أن تهدأ من حدة المشهد وهى تميل برأسها قليلاً ناحية نافذة الغرفة

-شيش على الشباك... قديم أوى الجو ده

أعرف، أنها تريد تغيير دفة الحوار، وطاوعتها

-بيدخل هوا، وبيمنع الشمس... وممكن نبدأ عشان مش عايز

أضيع وقتي؟

-ممكن قبل ما أبدأ أفكرك بجثة من الرواية بتاعتك...؟ يوووه هافكرك بكلام وخلاص.

«القصة كانت لواحد قرر يعاني في صمت وبعيد عن عيون الناس، يمكن تكون شفته مرة وهو بيضحك بمرار وهو بيحاول يخفي تفاصيل حياته حتى عن نفسه، قصة واحد قررت الناس تحكم عليه من تصرف واحد عمله وتجاهلت كل التجارب اللي مر بيها وعدت عليه وداست على مشاعره، كان لازم أكون مؤمن وأنا بكتب قصته إن كل واحد مهما كان جواه غل، سواد أو حتى كره كان في يوم إنسان عادى قلبه لسة على الفطرة، ومع تراكمات احتلت مكان الإنسانية جواه، وفقد مشاعره، عمرنا ما اتولدنا بِنُكره، الطفل أول ما بيتولد بيكون مصدر الحب وكثير بيفكرنا إزاي نحب، هي قصة واحد كان طيب مع ناس مش المفروض يكون طيب معاهم، هي قصة واحد لما فشل يحب الناس القاسية قرر يقسى على الناس اللي بيحبوه»

استيقظتُ في تمام الحادية عشر صباحًا، نظرت حولي فلم أجدها.. اختفت، هل حقًا دار حوار بيننا يوم أمس؟ اللعنة على هذا الغموض الذى بدأ يحيط بحياتي، أغمض عينيّ - قليلًا فتُدهمني أحلام في

يقظتى، روحى صارت فى خفة الفراشات تحيط بى راقصات من شتى
بقاع الأرض إحداهن برازيلية، وأخرى فى بياض الحلم الأوروبى،
وأخرى شرق أوسطية، شعرتُ للحظات بمتعة غائبة، أيقظت نفسى
عنوة رفضاً لهذه المتعة، سعادة المتعة أولى درجات الضعف، عُد كما
كنت، الآن كان قرارى حاسماً لن ألتقى بهذه الغامضة مرةً أخرى لا
بد أنها نتاجُ أوهام، سوف أعود إلى طقوسى اليومية وسأرفض لقاءها
مرةً أخرى إن كانت واقعاً، وسأقتلعها من جذور مخيلتى إن كانت
حلمًا، لم ألبث أن فتحت زجاج نافذتى وواربت شيشه إلا ونظرت
إلى أوراق جانبي بخط يدي مدونٌ أعلاها عنوان «دُنيا» هل هذا
اسمها الحقيقى؟! كيف لى أن أتأكد؟ هل سألتها؟ هل بقيت معى
حتى غَطَّيْتُ فى نوم عميق؟ هى ليست خيالاً إذا «دُنيا» كتبت هى
واقع.... وبدأت فى قراءة ما كتبتة ولا أعلمه.

دُنيا

عدتُ هذا اليوم إلى منزلى وأنا أحمل فوق كاهلى همومًا أكبر من عمرى
عشرات المرات، لا أعلم بماذا أشتكى ولمن! لا يوجد لأمى متسع
من الآلام لى أحكى لها تفاصيل حياتى، إن كنت لا تعلم فهل لى أن
أخبرك القصة من البداية. نشأت على صوتِ بكاءٍ دائم مكتوم لأمى،
عندما أتممت عامى العاشر كنت أراها تخرج من غرفتها ليلاً شبه
عارية وهى تحدّث أبى «هدخل الحمام أخذ دش» ثم تُغلق الباب على

نفسها وتبكي، لم أفهم وقتها ماذا يحدث، أبي رجلٌ لم يبادلني مشاعر حب تمنيتها طوال حياتي وإن كان رجل مهمام، والدى يعمل بجِدٍ، يعملُ كثيرًا ومع الوقت بدأتُ أفهم لماذا تبكي أمي ليلاً وحيدة - أو هكذا كُنت أظن وقتها- على الرغم من أن والدى يوفر لها حياةً إلى حدٍ ما كريمة، ورغم أننا نعيش في زقاقٍ صغير في بيتٍ شبه متهالك داخل إحدى المناطق الشعبية، إلا أننا لم نقترض من أحدٍ يومًا، لكن أمي كانت تحتاج إلى روح، لا يوجد أحد يُقرضك روحًا، كانت تحتاج أن تشبع رغباتها كأني، أعلم أنني مخطئةٌ ولكني كنت أحاول أن أختلس السمع من غرفتها، سمعتها يومًا تقول: ممكن النهاردة على مزاجي. ليصب والدى غضبه عليها، المزاج هنا مزاجي وبس، ثم أتوارى تحت المنضدة لتخرج أمي ونصفها السفلى شبه عارٍ وتتأكد أن باب غرفتي مغلق وتُهرول إلى المرحاض ثم تبكي، لهذا قررتُ أن لا أحملها ما لا طاقة لها به، مع الوقت أدركتُ إنه كان على أن أخبرها بكل شيء، دعني أحكي لك عن هذا اليوم الذي كنت سأخبرك به قبل تلك المقدمة، يومًا ما وصلت إلى الفصل وأنا أشاهدُ نظرات فخرٍ وزهوٍ من إحدى صديقاتي وهي تتمايل مع أخريات ويضحكن، بالمناسبة أنا لست من المحبوبين أو المشهورين داخل الفصل وإن لم أكن أيضًا من المنبوذين فقط كنت رقم لا أحد يهتم بوجودي أو غيابي إلا صديقة وحيدة كانت في مثل منزلتي بين باقي الطالبات، ولكنها غائبة منذ عدة أسابيع بعد وعكةٍ صحية ألّمت بها، عرفتُ

بعد فترة طويلة أنها تعرّضت للضرب المبرّح من والدها بعد أن رأى شابًا يحاول الحديث معها، ولكن والدها أصرَّ أنها كانت على علاقةٍ به، كنت وحيدةً طوال هذه الفترة وازدادت وحدتى فى هذا اليوم حين نظرت إلى إحدى الزميلات غير الفاضلات وهى تحدثنى.

- كده مفضلش غيرك... إيه أنتِ هتفضلى صغيرة كده كتير؟

صوتُ ضحكاتٍ مكتومة تخرق أذنى وأنا لا أعلم عن ماذا يدور هذا الحوار، اعتدت على تقبُّل ضحكاتهن، وأنا كلِّ إيماناً أننى أفضل من الجميع دون أسبابٍ واضحة لهذا الإيمان، فقط كنت دائماً أخبر نفسى «أنتِ الأفضل»

-هى جاتلك؟

نظرتُ إلى زميلتى:

-هى إيه اللى جاتلى؟

نظرت إحداهن إلى المتحدثة وهى تقدم كتفها قبل كلامها:

-مينفعش تقوليلها هى صغيرة...

وضعت حقيبى وأنا أنظر بدهشة واستغراب كيف صرت محور حديثهم!

-هو في إيه؟

-أصل احنا كلنا عندنا ... قصدى كلنا جاتلنا «البريود» هى مجتلكيش؟

قالتها وهى تضحك، لا أعلم سر سعادتهن بهذا الألم الشهري الذى نفقد فيه كمية لا بأس بها من الدماء، تخور معها قوانا وتذبل مفاتننا، كانت اللحظة التى بدأت فيها اتباع حركاتهن، ونظراتهن، وحتى أكون صادقةً مع نفسى كانت اللحظة التى شعرت فيها أننى أنثى غير مكتملة على الرغم من أننى لا زلت طفلة، ومعها صرت أشعر بالانكسار مع كل دورة شهرية، على أيضًا أن أخبرك أن والدتى غالبًا نسيّت أن تخبرنى أننا نصاب بتلك اللعنة الشهرية.

وضعتُ النظارة أعلى منضدة الكتابة وأنا أترك الأوراق جانبي وأضغط على مقلتي بالسبابة والإبهام وأخذ نفسًا عميقًا لعل أدرك ما يدور حولي، بالتأكيد هى بشرية، سعيد رآها وأنا شعرت بدفء راحتها على وجهي وكتبت بخط يدها غير أنها تحكى تفاصيل بشرية، لا بد أن أستعيد نشاطي، خلعتُ ملابسى وأنا فى طريقى للاستحمام ووقفت تحت المياه حتى بدأت أشعر ببرودتها، نظرت إلى ذقنى غير المهذب وشاربى الكُثِّ ورفضت تهذيبهم، كنت بملابسى الداخلية حين سمعت صوت نقر أصابعها فقررت أن أخرج هكذا لربما تشعر بهذيان عقلى فترحل دون رجعة.

ما إن فتحت الباب حتى نظرت إلى ضاحكةً وهي توارى وجهها:

-أدخل إلبس حاجة.. إيه المنظر الزفت ده...؟ شكلك يضحك جدًّا

نظرتُ إليها وأنا أضغط على شفقي السفلى بأسناني غيظًا حين أكملت:

-ماتحاولش يا نادر تمنعني إني آجي.. أنا ماصدقت لقيتك... أنا

تايهة، تايهة ودلوقتي في حالة سكون تام، محدش هيسمعني غيرك

تركها نادر وتوارى لارتداء ملابسه، جلست دُنيا تُطالع كمّ الكتب المزدهم بالمكتبة الصغيرة، نظام دقيق في ترتيبها، هنا الروايات وإن كانت قليلة نسبيًّا مقارنة بأنواع الكتب الأخرى، حاولت أن تدقق في تفاصيل الغرفة ربما تجد ما يعينها على فهم كيف يعيش نادر حياته في هذه العزلة، تلفتت وهي تسمع صوته يدن بكلامٍ غير مفهوم، لم تلتقط أذناها تفاصيل الكلمات ولكنه يبدو كشعر موزون، طال انتظارها له لا تعلم ماذا يفعل اتجهت إلى الكرسي جلست عليه وضمت قدميها إلى صدرها واحتضنتهم لتغفو قليلًا وهي تنظر إلى صورة الفتاة المعلقة صاحبة الملامح الضبابية.

من هذه التي اقتحمت حياتي عنوة ودون سبب وكيف لي أن أتركها؟ أنا هنا منذ وقت ولكني مستمتع ربما أشعر بضيقٍ بين الحين والآخر من سببٍ لا أعلمه؛ ولكن كل شيء هنا مناسب إما للحياة أو لشعور الموت، الحقيقة أنني لم أعد أهتم بكوني حيًّا أو في عداد الموتي، أنا

الآن في لحظة حرجة إما إن أطردها أو تخرجني مما أنا فيه، لقد فعلها آدم وحواء يوماً، ولن اسمح بمعاودة الحدث مرةً أخرى ونُطرد سويًا، ما إن انتهيت من تهذيب لحيتي وأزحت الستارة، وجدتُها تغطُّ في نومٍ عميق في ثبات أموات ولكن صدرها ظل يرتفع وينخفض حتى اطمأن قلبي أنها على قيد الحياة، لا أعلم ماذا حركني وقتها هل شفقة أم أنني لا أريد أن أشاهد جسدها؟ في كل الأحوال سترتها بغطاء خفيف شعرت بالأمان بعدها، تركتها واتجهت إلى ممارسة طقوسي اليومية وأنا أحاول أن أختلس النظر إليها لأطمئن أنها لم تستيقظ بعد، أشعر بالتناقض أريد أن أطردها من حياتي وأن تبقى هنا لتؤنث وحدتي التي أحبها، هل مسنى الجنون؟ كم الساعة الآن؟ الشمس اقتربت من الرحيل ولا زالت جالس أمامها.

-تعرف إن مش دى بس المشكلة!

نظرت إليها كانت قد أزاحت عنها الغطاء ووقفت جانبي، وأنا في حالة من الهلع أصوات تتداخل في تلك اللحظة في رأسى أصوات صافراتٍ كثير حولى صوت يتردد داخلي «أنا معاك مش هسيبك والله مش هسيبك» أشعر بدفءٍ في راحة يدي أتلفت سريعًا، أنفاسي تتلاحق بقوة، بدأت في سماع نبضات قلبي، بدأت عيوني تصارع قطرات عرق من أعلى جبيني أغمضت عيني للحظة ولكني فتحتها سريعًا وهي تضع يدها على قلبي وتسند رأسها على رأسى وتردد بهدوء:

-اهدى... اهدى مفيش حاجة احنا هنا مع بعض... أنا موجودة....
نظرت إليها وأنا أستعيد وعي أكثر مع مرور اللحظات حتى هدأت
جميع أطرافى.

لا يعلم كم الساعة الآن ولكنها تبدو منتصف ليلة شديدة الظلمة
اختفى فيها القمر عن عمد حتى لا يتابع المشهد، فى زاوية جلس
يحتضن زوجته وهى بدورها تحتضن أطفالها الثلاثة، محاولات
مستميتة منه أن يُصدّر إلى زوجته دفء علّها تقوى أن تُصدّره إلى
أطفالهم، تهتز المشاعر مع أصوات أمواج متلاحقة، يحاول أن يبقى
ثابتاً وهو يهتف بصوتٍ مرتفع:

- غطّى ودان العيال ليجيلهم برد.

بصعوبةٍ ينظر ليطمئن عليهم على ضوء كشاف ضعيف، يشعر أن
صغيرته تشعر بالبرد فيخلع شالاً كان يربطه على رقبته.

- خُدِ الشال ده لقيّه ع البت الصغيرة.

أصوات الأمواج تعلو ويعلو معها هتاف رجل لا تختلف ملامحه عن
تلك الليلة.

- كله يمسك جامد فيه موج وهو شديد، الله يخربيتكم.
- يضغط الزوج بشدة على معصم زوجته.
- امسكى فى العيال جامد وأنا ماسكك.
- طب الهوا... أنت مش لابس حاجة يا مرزوق يا خويا.
- لما نوصل إيطاليا هنجيب كل الى احنا عايزينه وهانعيش زى
الفل، البلد دى مش عايزة تسبنا إلا بخلع الضرس، أنا رابط الأكل فى
رجلى الدنيا تهدى وناكل.
- ترتفع الأمواج بشدة، تضرب إحداها الكشاف الوحيد ليزداد الظلام
عتمه، لم يعد يرى شيئاً، ظل يردد:
- أنت هنا؟ سمعانى؟
- أيوه أنا ماسكة.
- العيال.
- أنا ماسكة أيديهم الثلاثة.
- شعور بالرعب يتسلل إليه، يسمع صوت بكاء.
- مين بيعيط؟ ماحدش يعيط ماتخافوش أنا ماسككم كلكم.

يرتفع صوت البكاء.

- ماحدث يخاف.

صوته بات غير مسموع من شدة الرياح، يرفع صوته أكثر:

- العيال كويسين؟

- أنا ماسكة إيد اتنين مش شايفة الثالثة.

يصرخ باسم أطفاله الثلاثة يسمع صوت اتنين فقط:

- فين البت الثالثة!!؟؟

صراخ الأم يهزم صوت الأمواج والرياح معًا:

- امسكى الاتنين كويس هنلاقيها.

تضرب مَوْجة الجانب الأيسر من المركب يميل معها بشدة وتُفَلت زوجته من يديه، يعتدل بصعوبة.

- أنتِ فين؟

يزداد صراخها: - أنا ماسكة بت واحدة.

يلطم على وجهه: - أنتِ فين؟ أنا مش شايفك...

يحاول جاهداً الوصول إليها، أصوات صرخات ممزوجة بصوت الريح ولطمات موج متتالية، لا زال يصرخ وينادى على زوجته وأطفاله الثلاثة:

- أنتو فين؟ امسكوا كويس انتو فين؟ لما نوصل هانعيش كويس والله هنعيش كويس.

مَوْجَة هى الأشد تضرب المركب ضربةً قاضية ليختفى بين أمواج ليلة معتمة، لا يعرف هل يصرخ أم يغلق فمه حتى لا تتمكن المياه منه، يصارع الموج بكل قوته، عقله يرفض الاستسلام يبحث عما تبقى من أسرته، يتخلى المركب عنه، أصبح وحيداً في وسط البحر لا يُرى، ولكنه ما زال يقاوم يأخذ نفسه تارةً، وتارةً يصرخ منادٍ عليهم، يضرب البحر بقوة لعله يشفى غليله منه، يمر الوقت لم يعد يقوى أن يهتف وأن ظل يردد بصوتٍ ضعيف:

- خلى بالك من العيال الموج عالى أوعى حد يفلت بلاش حد يموت بلاش، ده أنا مسافر عشانك، ده أنا مسافر عشان البنات، امسكوا جامد، يا عيال، انتو فين؟

الوحدة من جديد، هذا الصمت الذى اعتدت عليه، لا أريد العودة مرةً أخرى لقد فقدتُ الأمل ولا يزال الرحيل صعب المنال، رفضت

أن أتذكر كل شيء، تتحرك أطرافى دون إرادتى، أصوات أنفاسٍ من حولى لا أعرف مصدرها وإن كانت مألوفة، ربما من كثرة ما سمعتها أصبحت أعرفها.. «هو كويس...؟ هو عامل ايه دلوقتى...؟ هو فى أكل فى الشلابة... بس شوية أنا عايز أنا... من فضلكم أخرجوا برة...» «يا خلود أنتِ واقفة بتعملى إيه؟ حركى إيديه» الحل الوحيد دائماً فى الكتابة، أين ذهب دُنيا؟ الآن اختلط الواقع بالحلم، الآن أنا فى شكٍ هل هى حقاً إنسان أم أنها كتلك الكلمات التى تتردد؟ ودون مقدمات صوت من الخارج وأنا أغلق الشيش لأبدأ يومى.

-هو مين الناس الى حواليك دول؟

قالتها وهى تفتح الباب دون أن تستأذن، نظرت إليها وأنا أزيح الغطاء.

-الناس موجودين... ناس بتيجى وتروح محدش ثابت.

-وأنت ثابت هنا ليه؟

-مش عارف... بطل أسئلة.

-أنا آسفة.

أزاحت الغطاء عني وأنا أوجّه لها أمراً مباشراً.

-اغلى اللبن فى الكنكة واعمل شاي كشرى صبي نص الكوباية شاي

والنص التانى لبن مغلى وحطى ثلاث ملاعق سكر.

اتجهت دون أن تبدى أى اعتراض وأمتزج صوتى مع هدير المياه من أعلى الدُش.

-مش عارف أنا ثابت هنا ليه ومن أمتى... بس أنا مبسوط ومرتاح وناسى.

-فى حد يكون مرتاح إنه ناسى.

-أنا... أوعى تكونى فاكرة أن الذاكرة هى الأهم خالص، أهم من الذاكرة هو النسيان، لو مانسيتيش لحظات جرحك، لحظات الوجع، الغل، الندم، الحقد، اللحظات اللى بنفقد فيها إنسانيتنا كان زماننا كائنات عايشه عشان تموت بعض، النسيان بيعلم الناس تسامح.

خرج نادر مباشرة وهو يلف فوطة على وسطه ولا يكثر بنظراتها، أزاحت وجهها ووجهت له الحديث وهى تصب اللبن المغلى:

-طب أنا ليه مش عارفه أنسى.

-أنت اللى شكلك عايزة تفتكرى وده مختلف تماما.

وضعت دُنيا الكوب أمامه وفتحت الباب نظر إلى الفراغ الذى يخفى خلفه تفاصيل حياة من اعلى تلك البناية، تحاول أن تتذكر تفاصيل حياتها، هى حقا تريد أن تتذكر، هى لا تريد أن ترحل تلك الرغبة فى

الانتقام بداخلها، لم تعيش حياة مترفة، لكن على الرغم من معاناتها كانت تعشق الرقص، كم تمنى أن ترفع صوت المذياع على أعلى درجاته وهى تقف أمام المرأة وتتمايل لنفسها، كم تمنى لو كانت تمتلك من الأساس مذياعا، عشقت دُنيا كونها أنثى، لكنها كرهت كل لحظة عاشتها كأنثى.

نظرت إلى الخلف وعادت إلى الغرفة.

-لا أنا مش عايزة أفكر، أنت مش قلت فى روايتك.

يقاطعها بعنف: -أنا مكتبتش رواية... أنا مش بكتب لحد.

-طيب.. أنت هتكتب فى روايتك الاقبي « لازم فى لحظة نحكى كل الى جوانا، فى لحظة لازم نسيب مشاعرنا تعبر مهما كانت، لازم نسيب الناس تعرف انهم مش لوحدهم الى بيعيشوا مآسى، كله على عينك يا تاجر، لازم نحكى عشان فى ناس شبهنا وعاشين أوجاعنا بس معندهممش الجرأة أنهم يتكلموا، فاللى عنده القوة يتكلم.. يتكلم، مع أن الى بيتكلم بيثيل هموم الكون، وبيثيل حمل إن الناس كلها حاطين فيه الأمل إنه يحل مشاكلهم»

ترك نادر الكوب من يده، هو يتذكر تلك الكلمات لكنه لا يعرف متى كتبها.

-أنا كتبت ده!؟

-آه.

-لا لسه مكتبتوش بس أنا حاسة، أنا الكلام ده عارفه.... هو أنتِ
بجد.

أشعر بالغثيان، اليوم أزداد هذا الشعور، «أشنكل» الشيش خلفي
ليدخل الضوء، التفت فلا أجدها، وعاء اللبن فارغ، الكوب في مكانه
ونظيف، الأصوات تتردد مره أخرى داخلي...

«هو جاي أمتي... لا احنا كويسين... دعواتكم.... لا كله على
الله.... مفيش ميعاد معين»

يخرج بالفوطة حول وسطه وشعره مبلى يجدها أمامه وكوب الشاي
بلبن على المنضدة ونصفه فارغ... ينظر إليها بدهشة.

-ماينفعش تسييني وتمشي، أنا لسه محتاجاك، أنت مش ذنبك إن
الضعف جزء من كونك أنسان، ولا ذنبي أن الفشل جزء من النجاح
أوعى تكون فاكر أني هسيبك زيهم.

-هو أنتي هنا من أمتي... أنا مش فاهم حاجة من اللى بتقولوها.

- نادر... ممكن أحكيك.
- آه... أحكى أنا عايز أخلص منك... أنا مش فاهم حاجة.
- أنت عارف مشكلتك فين....
- مش عايز أعرف... أنا عايز أرجع للهدوء الى كنت فيه.
- يستيقظ مرة أخرى على طرقات الباب وصوت سعيد من الخارج:
- يا عم نادر أفتح... أنا سعيد.
- يبدو على نادر الوهن الشديد... وهو يفتح الباب ثم يعود إلى السرير مرة أخرى.
- مالك يا عم نادر بس... بقالك شوية مش مضطرب... أنت زهقت.
- أنا في واحدة بتجيلي ومش عارف هي بجد ولا تهيوأت.
- لو قصدك على البنت الى اسمها دُنيا... هي بجد بس زيها زى كل الناس الى بتيجي هنا ناس مش بجد... مش ثابتة على موقفها..
- هو ايه الى مش بجد وناس بجد..
- زينا كده.. أنا وأنت هربانين..
- هو أنت هربان من ايه يا سعيد... أنت عمرك ما حكيت..

-وأنت عمرك ما سألت؟

-أديني بأسأل..

-تحب أعملك شاى بلبن معايا..

-ماشى بس... أغلى اللبن جامد وحط عليه على طول معلقة شاى
وتلات معالق سكر وسيبه يغلى.

-أنا نفسى حد يحبنى زى ما أنت ما بتحب الشاى باللبن.

يتجه سعيد إلى المطبخ الصغير ويكمل:

-أنا هربان من الاكتئاب.

-وهو ده حاجة بنهرب منها.

-لا الاكتئاب محدش بيعرف يهرب منه بس تقدر تقول أنى هربان
من الست الحاجة أمى.

-الست الحاجة والدتك الله يكون فى عونها أساسا.. أنها خلفت
عيل زيك.

-أنت ماتعرفنيش... أنا هربان من الست أمى الى ياما تعبت وأنا
مش عارف أعملها حاجة مش منها نفسها فاهم؟؟

-لا.

-ولا هتفهم عشان أنت متعرفنيش أو تعرف بس كنت مخبي على نفسك.

-طب عرفني يا سيدى.

-أنا كنت إنسان عادى لحد ما فى يوم صحيت مش مبسوط...
قعدت شوية أحاول أفهم أنا ليه كده وايه الى حصل مفهمتش
وقتها... بس مع الوقت عرفت أن كل حاجة حاولت أنساها جوايا
ظهرت... كل مشاعر خبيتها قررت تسيطر على... كل ده حصل فى
لحظة واحدة وأمى قررت وقتها أن الحل فى الجواز... وزى ما كل
الأمهات بتعمل... بنت أختها الى مريياها هى أحسن اختيار..

-أنت هربت عشان والدتك عايزة تجوزك بنت أختها... أنت مجنون يا
سعيد... لا أنا هربت عشان أمى ماكانتش فاهمة الى أنا فيه... مش
مستوعبة إنى تعبان ومش فاهمة يعنى ايه أى حاجة حلوة فى الدنيا
مش عارف تشوفها، أمى مش فاهمة يعنى ايه إنك مش قادر تشوف
الحلو لا ده كمان كنت بادور على الوحش عشان أشوفه، فاهمنى...
أنا مكنتش بشوف أى حاجة حلوة حتى الناس الى بيحبونى... أمى
كانت مش عايزة تشوف الوجود الى جوايا.. أمى كانت فاكدة أنها لما
تعمل صينية بطاطس بالفراخ هقوم زى الفل واتجوز بنت أختها

الى هي بالتبعية بنت خالتي المترية... الى هتخلينى هادى، أمى
ماكانتش فاهمه يعنى ايه معندكش طاقة إنك تفتح عينك أو تشوف
النور، مش مستوعبة إني مش قادر أحاول أنى أقدر، أمى من كتر
حبها فيا قتلتنى وهى كل يوم بتفتح الستارة عشان الضوء يدخل ينور
الأوضة، أمى ماكانتش عارفة أن الضوء ده بيزود الوجع، أمى عشان
تعبت قوى مكنتش عايزانى أتعب.

-جربت تقرب لربنا.

-قصدك ع الصلاة والاستغفار يعنى...

-يعنى...؟

-لو أنت مش بتخشع فى الحاجات دى... يبقى مش هيحصل حاجة
كلام بيتقال ويتردد... الفكرة إنك توصل لمرحلة الخشوع وتفصل
فيها عن العالم وتسبب مشاعرك السلبية تخرج من جواك، تعرف
تعمل كده

-سعيد أنا كنت فاكرك تافه.

-لا ما هو ده لا ينفى أنى تافه... أدى اللبن فاريا عم واحنا بنرغى
فى أى كلام.

تنزع الفتاة السماعات من أذنها وتقف وهي تنفض ظهرها من الأتربة العالقة من الحائط والأرض، تفتح الباب على جدها وهو يجلس في نفس الموضع منذ أن أتت جدتها إلى هنا، وقفت في ركن الغرفة بهدوء واستمعت إلى الحوار.

-أنتِ بتروحي فين.

-ما أنا قاعدة معاك أهو يا حج... أقوم أعمل لك شاي.. أنت اتغديت؟

-يا حاجة شاي ايه بس... أنت بتقعدى تكلمى نفسك كثير ومستكترة تكلميني شوية.

-لا أنا كويسة... أنا مش باكلم نفسي خالص.. دول ناس معايا الناس اللى بحبهم محدش سايبني.

-وهو أنا مش بحبك؟

-أنا مستغناش عنك... أنت لابس حزام الضهر ولا بتقلعه... الدكتور قالك بلاش تقلعه طول ما أنت صاحى

-لابسه... ومش هقلعه عشان ماتزعلش بس شدى حيلك أنت بس.

-حاضر.

-يا حاجة... أنت نمتِ تانى... يا حاجة ماتسبنيش.

استند بذقنه على عصاه وعيناه تملؤها الدموع، احتضنته حفيدته من خلفه وهى تقول: -هانزل أجبلك واحد شاي وهاوصى يعملوه زى ما تيته كانت بتعمله.

-الشاي بيتعمل يا بنتى عادى بس نفسها مش فيه... مش هيظبط دماغى.

-جدو هى تيته بتكلم مين؟

-بتكلم ناس محتاجينها..

بدأ فى الاعتياد على اختفائها وظهورها دون مقدمات، لم يسأل عاد إلى حياته الطبيعية، هدأت الأصوات التى تمر على رأسه، نظر إلى البرواز الفارغ والقلب المصمت، وبعد لحظات من الهدوء عاد إلى طبيعته، لا يمتلك مشاعر الآن لتسيطر عليه، هو فقط من يعيش، تفتح دنيا الباب دون أن تستأذن.

-هو مش المفروض تخبطى مش يمكن أنا فى وضع مش لطيف.

-أنت يا إما نايم يا فى الحمام يا بتحلم بالكتابة... أو بتعمل شاي

بلبن .

-أنا مبسوط بالحاجات دى .

-وأنا مش بعاتبك عليهم .

-أنت مالكيش إنك تعاتبينى .

-أنا جيت عشان أحكيلك .

-براحتك .

-بس ممكن توعدننى بوعد .

-برده مالكيش حق فى ده .. أنا ما طلبتش إنك تحكىلى .

-مش هتخسر حاجة .

-قولى ..

-أوعدننى إنك ماتحبينيش .

يضحك نادر بصوت مرتفع .

-لا ماتخافيش أنا معنديش مشاعر .

-لا أنت عندك .. بس يمكن شايلهم .

- مش فارقة، فى كل الأحوال أنا مش بحب.
- أوعدننى.
- أوعدك... وهو الوعد بفلوس.
- لا.. بس لو حبتنى ممكن تعمل حاجة أنا مش عايزاك تعملها.
- هى ايه؟
- لما تكتب «حلم الاول».
- رجعنا للتخريف تانى؟
- امسك ورقة وقلم واكتب.
- أنا آخر حاجة كتبتها موضوع ال... ال... ..
- ماتتكشفش... قصدك على الوجع الشهرى..
- كمل.
- جلس نادر فى وضعية الكتابة.

دُنْيا

أنا زى ما قلتلك بنت منطقة شعبية، أنا مش بنت ناس مستواهم
الاجتماعى أو المادى على، بس كانت نفسى عزيزة، كان عندى
أحلام كثيرة، حلمت أنى أطلع ممثلة وحلمت أنى أكون مذيعة،
حلمت بأنى هتجوز واحد شكله حلو وعنده دقن، طول بعرض ومعاه
فلوس، هيجى يخطفنى بعريته السوداء الواسعة بس دايمًا كنت
أسأل نفسى هى العربية الكبيرة السوداء دى ينفع تدخل الشارع
بتاعنا، كل أحلامى تقع على الأرض واصحى وأنا واقفة قدام المראה
شايقة جسمى بيكبر وبارقص قدامها على شوية أغانى حفظها عشان
ماكانش عندى كاسيت، كنت ملكة أنا اللى نصبتها، كنت بافرح
بكل حنة بتكبر فيا، وعشان ماتقولش عليا إني بت شمال، كنت
بجها لنفسى، أنت غالبًا مش هتفهم قصدى ما هو أنت عمرك ما
كنت بنت ولا هتبقى، مش هتفهم يعنى ايه بتشوف جسمك اللى
هو المفروض ملكك بيبان، خلىنا نعدى الحنة دى وأكملك، أمى
الى كانت بتتوجع كل يوم كان عندها نصيحة واحدة بس لما شافتنى
باكبر، كانت دايمًا تقولى حافظى على نفسك عشان لما تتجوزى،
تعرف أنا كنت بسأل نفسى كل يوم لا كل يوم ايه كل ساعة وأنا واقفة

قدام المرايا، هو أنت مش جسمى أنا أزاى أحافظ عليه لحد لسه
ماعرفوش، أنا عايزة واحد أوهب له جسمى، أنت فاهم دماغى، دى
حاجة ملكك لازم توهبها مش حد يخطفها.

توقف نادر على الكتابة ونظر إليها.

-هو مفيش غير جسمك والبريود وعلاقة والدتك بوالدك..

-فى كثير، بس محدش سمح لى أنى أفكر فى الحاجات الثانية دى،
حاجات البنى آدمين، ماكانش عندى هواية، أنا كنت عايزة أبقي بس
أنسانة ماتتوجعش، الهواية دى مثلاً كانت طموح كبير قوى بعد اللى
حصل لى، وهحكيلك الموقف التانى اللى تقريباً دمر نفسيتى تماماً.

الساعة تشير إلى الثالثة عصرًا، الطالبات بدأن فى الرحيل المدرسة
شبه فارغة إلا من القليل، كانت دُنيا تنهى بعض الفروض المتبقية
قبل عودتها إلى المنزل فالיום هو حنة بنت عمتها الكبرى ومن
الواجب أن تكون جانبها، من طرف الباب كان يقف شابا حديث
الالتحاق بالمدرسة، مدرس شاب وسيم تستمتع بعض الفتيات
بمصاحبته، ولا يمانعن فى تجاوز العلاقة قليلا، فتح الباب ووجدها
جالسة، نظرت إليه « أنا باخلص بس حاجة يا أستاذ وهامشى »
نظر إلى فتحة قميصها، وعلى الاستدارة المرسومة عليه « لا براحتك
خالص » وقف خلفها ثم مد يده بهدوء على كتفها وقفت مفزوعة

لكن كان معصيه يطوقا خصرها من الخلف ويجذبها بقوة، يحاول أن ينال من كل محارمها، رفعت صوتها بأعلى ما تستطيع، قاومت بشدة أخرجت كل قوة من جسدها حتى استطاعت أن تفلت في اللحظة التي فتحت الباب فتاة أخرى أخذت دُنيا في حضنها وهي تنظر إليه « أنت وساختك دى مش هتخلص »

نظر نادر إلى كوب الشاي الفارغ ثم نظر إلى دُنيا.

-هو الموضوع ده كان معروف فى المدرسة؟

-الموضوع ده حصل معاه مرتين بس محدش من البنات قدر يتكلم، بس أنا بقى كنت الشملولة، واخدت بعضى ورحت لأُمى وحكىتها لها كل اللى حصل.

-برافو... برافو...

-لا برافوايه... أُمى قالتلى حسك عينك حد يعرف، لو أبوكى عرف هيدفنك حية.. أبويا هيدفننى عشان واحد مش نضيف كان عايز يوسخنى، وسكت وكتمت فى قلبى ومبقتش أقعد فى المدرسة لوحدى، تخيل كده لما المدرسة بتاعتك ماتكونش أمان لك.

-وبعدين؟

-قعدت فترة مش قليلة وأنا بحاول أنسى والأيام بتعدى وزى ما

سقى كانت بتقول الحزن بينزل من جبل ويخرج من خرم أبرة بس
بيخرج، أنت متابع.

-أنا متابع، يعنى والدتك كانت مش مهتمة بيك وكانت مش مبسوفة
مع والدك... نلخص الموضوع ونقول والدتك كانت سبب مشاكلك..

-لا مش هى السبب، أمى غلبانة قوى بس كان ممكن بكلمتين
تساعدنى كثير، أمى جنبى دلوقتى وأنا عارفة إنها بتلوم نفسها، بس
الى زينا مالوش صوت، بيخنق الهم جواه بيكون عايش لسبب ما هو
مش قادر يستوعبه، الى زينا بيكون الموت أريح له.

-وأنت ارتاحتى..

-أنا لسه ماموتش...

خرجت دُنيا من الغرفة ووقفت أمام شتلات الزرع الصغيرة حاولت
أن تشم لها رائحة لكن دون جدوى.

-هو الزرع ده مالوش ريحة؟

-لا... أنا اخترته كده، مش عايز أحس بأى حاجة أنا بس شكلها
بيكفى معايا.

-الشكل مش كل حاجة.

- لا هنا الشكل هو كل حاجة، هنا احنا بنبان على اللى جوانا.
- هو أنت ممكن تحكى لى حاجة عنك؟
- لا مش ممكن.
- ليه مش أنا بحكى لك أسرارى؟
- أنت جاية بإرادتك، أنا ما طلبت ده.
- طب قولى سر واحد من أسرارك، ما هو مش معقول أحكى لك كل حاجة عنى وتعرف كل أسرارى وأنا لا.
- حتى لو عايز أحكى أنا مش فاكر حاجة.
- أنت عامل زى، أنا مش عايزة أنسى وأنت مش عايز تفتكر، هو البرواز ده فاضى ليه؟
- هو شكله كده حلو، الصور مش بتحل.
- من غير ما تكمل الصور بتفكر وأنت مش عايز تفتكر، هى أمك قصدى والدتك فىن، عايشة؟
- أمى جنبى على طول وهى أكثر واحدة وحشانى.
- يعنى فاكر أهه؟

- ما قدرش أنساها، دى شالت كثير.

- احكى احكى احنا مش ورانا حاجة؟

- لا.

- ده أنت عِنْدِي بِشْكَل.

- مش عند، بس مش عايز أتعب أنا الى متأكد منه انى هنا بسبب
بس مش عايز أعرفه، أنا حاسس أنى ممل من كتر ما قولت مش
عايز أفتكر دى.

- لا ممل ولا حاجة احنا مع بعض ومش عارفة الوقت، تشرب شاي
بلبن أنت بقالك يجى شوية صغيرين ماشربتش.

- نعم؟

- لا ولا حاجة، بس كنت فاكراك مفطوم.

تنظر دُنْيا إلى صوت من الخلف.

- أنت رحت فين يا سعيد؟

- يا عم نادر قلت أرجع لأُمى شوية ماقدرتش.

- ايه الى حصل؟

-أحكىلك بس ماتضحكش.

جلست دُنيا على الأرض وجذب نادر كرسيها وبدأ سعيد يحكى آخر لقاء له مع والدته.

تفتح والدة سعيد باب الغرفة ثم نافذتها.

-اصحى يا سعيد.

-ماما سيبينى أنام شوية.. أقفلى النور.

-يا ابنى قوم الساعة ٩ الصبح النهاردة الجمعة، قوم صلى.

-مانا عارف إنه الجمعة يعنى إجازة عايز أنام.

-مالك يا واد مش عايز تقوم ليه؟

-تعبان شوية.

-هعملك كوباية ينسون بالليمون وهتخليك قرد.

-لا يا ماما أنا مش تعبان جسديا..

-جسمك مش وجعك يبقى برد فى العضم... قوم خد دش دافى وأنا هادهنلك أبو فاس.

-أبو فاس ايه يا حاجة العضم من الجسد وأنا جسدى تمام أنا تعبان نفسيا..

-جسد!! ايه الكلام الكبير ده الله يخرب بيت الفيس زفت الى خرب دماغكم.... لو مش جسمك يبقى هاجيبلك قرصين ريفو والصداع هيروح... الريفو ده سحر..

-أنا مش مصدع يا ست الكل... أنا حضرتك يعنى نفسيتى مش متظبطة.

-أنت بقيت شاذ يا منيل.... نهار أبوك أسود نفسية ايه.

-شاذ ايه يا امه.... أنا بس مكتئب شوية.

-يبقى تتجوز عشان تثبت لى إنك مش شاذ؟

-مكتئب يا ست الستات والجواز من مسببات الاكتئاب.

-طب انزل اتمشى وهات الفطار الاكتئاب هيفك... اسمع كلام أمك.

-هو أنا عندى شد فى عضلات رجلى عشان تفك.

-شفت مش قلتلك برد فى العضم قوم خد دش وهادهنلك أبو فا....

-ماما الاكتئاب بيوصل للانتحار وأنت بتضغطى عليا.

-شاذ وملحد.... تربيتي راحت ياريتني كنت رميت شوية اللبن في الحوض وأنت صغير ومارضعتكش... ملحد يا زفت يا ابن الزفت.

-ماما مش قادر أتكلم كفاية..

-ملحد شكلك باين أكيد بتقول إن أصلك قرد.... بس أنت أصلك جاموسة يا ضنايا مايנفعش تبقي ملحد.

-يا ماما مش قادر.

-يبقى زورك الى وجعك ما أنا قلتلك ينسون على ليمون.

-لا مش زورى.. أنا محتاج مهدئات.

-كمان مخدرات... عايز تاخذ مخدرات يا فاشل يا صايع... أنت حالك مش هيتعدل غير بالجواز.

-المكتئبين مش بيتجوزوا وأنا مش هتجوز.

-مالها بنت خالتك.

-مش هتجوز.

-تبقى شاذ أنا حاسة إنك شاذ.... قلبي وربي غضبانين عليك ليوم الدين... والله بنت خالتك حلوة وبنت ناس

ينظر لها بغیظ وهو یقوم من السریر.

-بلاش کذب یا ماما مین دی الی بنت ناس؟

-بتشتم أمك وأهلها یعنی مش بس شاذ وملحد وكافر وعایز تاخذ مخدرات أنت كمان جاحد علی امك ایه هتضربنی لما تكبر.

-كفاية یا ست الكل... أنا كویس بقیت كویس.

-طیب مدام أنت كویس انزل هات الفطار.

ينظر سعيد إلى دُنیا.

-أنتِ بتضحكى على ایه؟

-مامتك ظریفه جدًا.

-هى بتبقى ظریفه فعلا بس لما أكون أنا كویس، أمى كانت عایزانى أكون كویس بالعافیه، ما هو أنا كان لازم أهرب منها هى وبنت خالتي.

ينظر نادر إليهم محاولا تذكر كيف أتى إلى هنا، يتركهم ويقف أمام السور لا يعلم إلى ما ينظر فقط يشعر بغصة في قلبه، يزداد حنينه إلى شيء مفقود، يتجه إلى الغرفة ينظر إلى البرواز إلى تلك الصورة

صاحبة الملامح الضبابية، يعود إليهم وقد اختفى سعيد.

-هو أنت جيتى ليه؟ .. ما أنا كنت مبسوط ومكنتش بافكر أنا هنا ليه.

-أنا أساسا مش عارفة أنا هنا ليه، أنت سألتنى أنت مرتاحة.

-مش فاكر.

-أنا لسه ما متش عشان ارتاح... أنا لسه عايشة.

-مفيش حاجة يا دُنيا تقول إن الموت راحة.

-مفيش حد قال... بس أنا عايشة مش مرتاحة واللى مش مرتاح بيتعلق فى أى حاجة تخليه يهرب من اللى هو فيه، مفيش سبيل للراحة غير الموت.

-الموت وجع لكل الناس.

-لما تموت مش هتفكر فى الناس... أنت يا نادر عايش ليه؟

-عشان أنا خايف أموت!

-نادر أنت خايف تعيش أنما أنا مش عايزة أعيش... أنت لازم تعرف أنت عايز ايه.

-وأنتِ عارفة؟

-أنا عارفه بس أديني جيت هنا... ومش عارفه ليه جيت....
يمكن في حاجة أنا لسه معرفتهاش.... يمكن كان في حاجة
ناقصة في الحكاية.

-قصداك الرواية الى أنا كتبتها عنك... أو الى أنا هاكتبها عنك.

-لا... في حاجة ناقصة في قصتي في حكايتي... وبما إنك كتبت عنى
فيمكن عايزة أعرف أنت كتبتها أزاى.

-تعرفى يا دنيا، أنا من ساعة ما جيت هنا وأنا مرتاح يمكن عشان
لسه باسمع أصوات أنا عارفها بس مش فاكرها، يمكن أكون مرتاح
عشان بشوف ناس بتيجى وتختفى قدامى، يمكن عشان أنا مش
مرتبط بجد واقعى غير بنفسى، بس الى أنا متأكد منه أنى عارف
حكايتي.

-أحنا عكس بعض جدًا، بس أنا أحب أقولك إنك ماتعرفش
نفسك..

-هو أنت عينيك بتلمع كده أزاى..

صُدمت دُنيا من السؤال، ونظرت بريبة.

-أنت بتعاكسنى؟

-مش عارف بس أنت شكلك نضيف قوى.

-وهو أنا كنت جايا لك معفنة مثلاً.

-أفهمى... أنت شكلك مش متوسخ زى ما أنت حكيلى.

-أنا نضيفه من جوايا يمكن فيه ناس حاولت توسخنى بس ربنا واحد الى ساعدنى عشان أفضل كده.

-مدام أنت عارفة ربنا.. عايزة تموتى ليه؟

-ربنا رحيم مش يمكن خلق الموت رحمة.

-ربنا خلق الحيات رحمة مش الموت.

-ربنا رحيم فى كل الأحوال.

دُنْيا

كانت اللحظة الأكثر إثارة في حياتي عندما أهدتني إحدى صديقاتي فستانا، كانت المرة الأولى التي أحظى فيها بمتعة ارتداء ملابس أنثى، أتذكر أنني انتظرت حتى لحظات الفجر، ارتديت الفستان تحت عباءة سوداء وصعدت إلى أعلى السطح، خلعت العباءة وأصبحت ملكة وحيدة وبدأت في السير على أطراف أصابعي، اختفى كل ما حولى من العشوائيات وشعرت بهواء يتسلل من تحت الفستان، كانت اللحظة التي أدركت فيها أنني الآن قادرة على التحول من فتاة إلى شابة مكتملة الأنوثة، في تلك اللحظة أخذت الفتاة الصغيرة وألقيتها من أعلى السطح، في تلك اللحظة شعرت بالخوف من كل شيء في تلك اللحظة أدركت أن هناك شيئا من الممكن أن أخسره أدركت وأنا أشاهد العشوائيات تظهر مع بزوغ الشمس أنني أمتلك أنثى يريدون منى أن أحافظ عليها لرجل قد يكون مثل أبى لا يفهم شيئا سوى العمل الجاد وتفريغ الشهوة، في تلك اللحظة أدركت قيمة الفقد، هل تعلم أنا لا أكره أبى لكنى أشعر بغیظ شديد من أمى لماذا لم تعطه ما يريد مقابل.... مقابل ... هل أنا أدعو هنا لأن تكون المرأة قوية، طوال فترة معاناتي لم أستمتع بكوني امرأة

سوى فى لحظات ضعفى؁ لم تكن كثيرة بالمناسبة؁ أذكر أول أيام زواجى من رجل قررت والدتى أن تزوجنى إياه «عشان مناسب جدا» تلخصت فكرة الزواج فى مكان يحفظنى فيه زوجى؁ استمتعت معه فقط بأولى..... أنتظر لا لم يحن الوقت بعد لسرد قصة زواجى هناك القصة المتداولة الأشهر بين العائلات ألا تعرفها؁ ربما لا تعلم شيئاً عن تلك المرحلة التى يمر بها أطفال العائلات فى فترات بلوغهم «كله بيحب فى كله يا نادر» حتى تستمر أحداها ويزداد الأمل وتزداد معها لحظات اكتشاف الآخر؁ لحظات لا يدرك احد عنها شيئاً؁ هل تتذكر أنت مصدر معلوماتك عن العلاقة الكاملة بين الذكر والأنثى؁ قبل أن أخبرك عن مصادرى لم يعد الأطفال يعتقدون أن القبلات هى من أتت بهم إلى هذا العالم هناك أطفالاً لم يصلوا لسن العاشرة يعلمون عن هذا الأمر أكثر مما تعلم أنت؁ أعود معك إلى مصادرى؁ صديقاتى أو زميلاتى إن صح التعبير كانوا يتحدثون بشكل مفصل عن تلك العلاقة؁ أين أنت؟ تغفو مرة أخرى؁ لم أكن أعلم أنى سأحكى لك على فترات.

خرجت من باب الحديقة المطلة على بحيرة يحدها من الجوانب أشجار خضراء؁ وضعت خوذة على رأسها وجلست على «اسكوتر» وردى وانطلقت وهى تسمع صوت التقاء قطرات المطر مع خوذتها.

رفعت يديها وتركت المقبض، كادت أن تسقط عندما استيقظت على صوت شادى الأخ التوأم لها ينظر إليها.

-أنتِ كنتى بتحلمى؟

-آه

-بالاسكوتر برده؟

-برده.

-أنا مش عارف هيكون عندى عمر عشان أعرف أجبهولك ولا لأ.

-قسمًا بالله العظيم لو قلت كده تانى هزعل منك جامد.

-هو أنت عارفة أنت هتعمل ايه؟

-هاديك حته منى، يا شادى احنا توأم من ١٨ سنة، أنت أكثر واحد عارف وحاسس بيا.

-يا شدا... أنت فيكى حاجة أنا مبقتش فاهمها.

-يا شادى يا شادى، فاكر لما كنا بنحكى للناس إنك أنت اللى بتتوجع لما كنت باتحبط حتى واحنا مش مع بعض، طيب فاكر زمان واحنا صغيرين لما كان إحساسنا واحد، فاكر لما كنا بنفرح سوا ولما كنا بنزعل كنت أنا بعيط ليا وليك، فاكر لما البنت المعفنة دى سابتك

وأنا قعدت أسبوع متنكدة مع إني كنت بكرهها

-فاكر.

-الناس كلها فاكدة أن كل واحد له روح لوحده، احنا لا أنا وأنت
عندنا روح واحدة يعنى لو حصل لك حاجة أنا هتعذب، فـ يا نعيش
عيشة فلـ يا...
-ماتكـمـلـيش... أنا خايف.

-والله وأنا مرعوبة... أنا خايفة قوى بس مش خايفة قد ما خايفة
إني أفقدك.

-الى أنا فيه ممكن يتحل بطرق كثير.

-كل طريقة فيهم فيها ألم ووجع أنا مش هاستحملها.

-شدا لو جراك حاجة أنا مش ممكن أعيش.

-كده كده محدش هيعيش من غير التانى، دى حاجة أنا متاكدة
منها.

-أنتِ ضعيفة.

-لو أنا مستحملتش، نص روحك هيروح ولو راح يبقى أنا وأنت
هنكون فى مكان تانى.

-شدا!

-كفاية أبوس أيديك يا شادى، كده كده احنا لينا فى بعض، بس تحافظ عليها المرة دى ماتبوظهاش، أنت عارف أنى باحب أحافظ على حاجتى.

-أنت مش طبيعية.

-أنا نفسى أحس إنى طبيعية.

أشعر بالغثيان، لا زالت أشعر أننى أعيش فى حلم أو وهم، أين هى الآن أشعر بغربة للمرة الأولى منذ... منذ... منذ متى لا أعلم لا أتذكر، أصوات تتداخل فى راسى « أنا هفضل قاعدة... لا روحوا أنتو... ماما عايزة قهوة» هى المرة الأولى التى أخرج فيها من الغرفة منفردًا اسمع أصوات تخرج من غرفة بجانبى، الباب مفتوح نظرت خلصة حين فاجأنى رجل أربعينى.

-مين حضرتك؟

-أنا نادر ساكن وراك.

-أفضل.

نفس مساحة غرفتي أو أكبر قليلا. لا على ما يبدو أنها أكبر بكثير،
من الخارج لها نفس المساحة لكن من الداخل هناك أسرة كثيرة،
دمى فى الأرجاء، هناك طاولة طعام ممتلئة عن آخرها زى مدرسى
بألوان زاهية، تلفاز وصور كثير..

-أولادك دول؟

-آه...

-ما شاء الله... هم ساكنين معانا أنا عمري ما سمعت صوت أطفال.

-لا هم كانوا معايا وأنا رايحلهم الموضوع إن أنا أتخرت عليهم بس
معلش.

-هى أم الأولاد معاهم؟

-آه معاهم... ده اللي مصبرنى.

أعتقد إنه يريد مساحة لنفسه، إجاباته مقتضبه تركته وهو يعيد
ترتيب الغرفة التى تبدو كقصر ملكى من الداخل على غير هيئتها من
الخارج.

أشار:

-نادر نتقابل بالليل عشان مش قاعد كثير.

-آه تمام نتقابل.

تنادى دُنيا على نادر ينظر حوله إلى أن يجدها.

-نادر.. تعالى تعالى.

لم يتخط نادر حدود غرفته مطلقًا، يشعر بغربة لا زالت الأضواء تخرجه عن هدوئه.

-فى ايه؟

-أنا قررت أقعد هنا... مش هارّوح تانى.

يشير نادر إلى باب غرفة بعيدة.

-هتقعدى هنا.

-آه... بس أنت مش هينفع تدخل.

-مش عايز أدخل.... ما طلبتش أساسا.

-هو أنت ناشف قوى كده ليه؟

-هو أنت جيتى هنا ليه... ما أنا كنت قاعد فى هدوء.

يقطع الحوار رائحة طيبة تتجه دُنيا مباشرة إلى مصدر الرائحة، تنظر من خلال نافذة جانبية لامرأة تطهو طعام.

-تعالى يا بنتى ادخلى أنا بعمل صينية فراخ فى الفرن.

-فراخ....

-يا بنتى تعالى ماتتكسفيش وهاتى الواد الى هناك ده.... تعالى.

ينظر نادر دون اهتمام وإن كان شغف دنيا هو ما دفعه للاتجاه نحوها.

-بصى بقى... أنت اسمك ايه؟

-أنا دُنيا.

-بصى... لازم وأنتِ بتطبخى تدى كل حاجة حقها، سيبيك من إلى
بيقول أن التوابل تتحط فوق بعضها أو تجيبى توابل جاهزة، ده أى
كلام، أنت تقطعى الفلفل والبصل والطماطم، ترشى الملح وتعصرى
الليمون على الفرخة بعد كده تحطى القرفة بهدوء القرفة مش بتحب
اللهوجة، شوية زنجبيل صغيرين على القرفة زنجبيل بودرة وتلات
ورقات لورا وتلاته حبهان، لازم تحسى كل حاجة من دول لو رمتيهم
على بعض وخلاص هتبوظ أو هيبقى طعمها حلو بس....

تنظر السيدة إلى نادر.

-طعمها هيبقى حلو بس الأكل مش هيكون مبسوط وأنت بتعمله.

-هو الأكل بيتبسط؟

- كل حاجة فى الدنيا معموله عشان تبسطنا بس لما نبسطها الأول.... هو أنت تعرف يعنى ايه النفس فى الأكل؟

- لا وعمرى ما حسيته.

- زمان كانت أمى بتقف فى المطبخ وهى على سنجة عشرة، زمان كانت تلبس جلابية المطبخ وتربط شعرها كويس وايدها تبقى زى الفل وتشغل راديو قديم على أذاعه الأغاني، أمى كانت بتقولى لما تيجى تطبخى لحد لازم الأكل يحس إنك فرحانة إنك بتعملية للشخص ده، الأكل مش بيتعمل واجب.

تشير إليهم بالدخول.

- تعالوا الأكل قرب يخلص.

غثيان مرة أخرى فى صبيحة يوم جديد أو يوم آخر، أين السيدة العجوز! كيف أنتهى يوم... يوم هل كان يوم أمس أم يوم سابق أو منذ عام، كم مر من الوقت!!! ثم تظهر دُنيا من جديد.

دُنْيا

بعد تلك الليلة التي حلّقت فيها في السماء وأنا أتردى فستان أنثى،
بعد تلك الليلة كان على أن أخفى تلك المشاعر عمن حولي كان على
أن أخفى أى مشاعر عن الآخرين وبالتبعية مشاعر الحزن، ربما خوفاً
من انتهاك حرّمات الحلم الذى حلمت به، حلمى فى أن أكون فقط
فتاة.... هل أنا عشوائية فى سرد القصة، آخر ما توقفت عنه فى المرة
السابقة كانت مصادرى عن الآخر. صديقاتى، أنت تحتاج للتركيز
معى أنا عشوائية حقاً، كانت الفتيات من حولي يمارسن علاقات
سحاقية، لن إنكر هناك الكثيرات يقعن فى محظور العلاقة مع
المثل، لا يوجد علاقة بالمثل أساساً، العلاقة تكتمل ما بين موجب
وسالب كيف يجذب سالبين أو موجبين.... أخرج خارج قصتى مرة
أخرى، دعنى أذكرك والدتى التى كانت تبكى كل ليلة، صديقاتى اللاتى
كن يعايروننى بتأخر انفجار بويضاتى، وفستانى الذى حلمت أن
ارتديه، مصادرى فى العلاقات الجنسية وزوجى، تزوجت من رجل
كان كل ما يتابعه هو حدود صدرى، كاد يومها أن يثنى عليه فقط،
يومها حدثت أمى عن نظراته كان ردها إنه يتفحصنى، أنا البضاعة
التي عليه أن يتفحصها، هل كان على يومها أن اخلع ملابسى ليدقق

النظر! ربما أراد أن يأخذ فكرة أكبر عن محارمي، نادر... نادر هل تسمعني؟

في البداية رفضته، قاومته، قاومت رائحة الشهوة النتنة وهي تخرج لاهثة من أنفاسه، أنا دُنْيا المجبرة أن أكون بضاعة، هل تعلم قررت بعد الضغوط أن أكون بضاعة، قررت أن أستسيغ شهواته، فكرت يومها إنه ربما لو استطعت أن ألبى له احتياجاته أو أوقف تلك الشهوة. قررت أن أمتلكه، ولكن كم كنت مخطئة يا صديقي -نحن الآن في مرتبة الأصدقاء أليس كذلك- بعد أول شهر أدركت أن كل ما كان يعينني هو قلب يحبني وكان على التنازل لأصل إلى قلبه، فكان على أن أطفئ شهوته لكني لم أستطع فهو لم يشعل نور قلبي قط، لا ليس كما تظن هو ليس سيء على الإطلاق هو مجرد رجل لديه فكرة واحدة عن الأنثى بالطبع أنا لا ألومه على شيء، نادر من فضلك أنا لست مريضة أنت لا تفهم!

-يا عم نادر!

-ايه يا حل.. ايه يا سعيد.

-هي الست الطيبة دي مش هتعملنا أكل؟

-سعيد أنت مش بتشبع.

-أشبع ليه؟

-هو ايه الى ليه... الناس بتاكل لحد ما تشبع.

-ساذج أنت يا عم الأستاذ نادر.

-أنا.. ساذج!!

-يا عم ماتزعلش بس أنت ماتعرفش حاجة.

-عرفنى... يا سيدى.

-الأكل بالنسبة لى هو أكثر حاجة ممتعة بأقل تكاليف... قولى كده مين ممكن يبسطك زى الأكل بفلوس قليلة دى الستات عشان تبسطك... هو بالحق أنت الستات بتبسطك زينا كده ولا أنت ايه الى كان يبسطك؟

-أنا معرفش ايه كان يبسطنى زمان... بس واضح إن الستات كانوا مصدر إزعاج.

-طب لما هما مصدر إزعاج. مركز ليه مع ست الحسن؟

-احترم نفسك يا سعيد... أنا مش مركز مع حد.

يبتسم سعيد في خبث.

-تمام يا أستاذ تمام.

قطع الحوار صوت استغاثة فتاة، ظهرت غرفة أخرى على الجانب الأيمن أمام غرفة دُنيا مباشرة، هرع الجميع أنا وسعيد ودنيا والسيدة العجوز وهذا الرجل الذى يمتلك قصرا داخل غرفته، وقف الجميع على الباب إلا دنيا كالعادة فتحت الباب بهدوء ونظرت إلى تلك الفتاة المكومة على الأرض وهى تردد بهدوء كلمات لم يُفهم منها شىء سوى أنها نداءات إلى الله، خلف دُنيا دخلت السيدة العجوز ووقف الرجال الثلاثة أمام الغرفة.

جلست دنيا على ركبتها ووضع يدها على كتف الفتاة.

-أنتِ مين؟

تصمت الفتاة عن الكلام ويبدو على وجهها الدهشة.

-أنتِ عارفة أنتِ فين؟

نظرت الفتاة بضعف وهى تتحسس جسدها.

-لا.

-أنتِ كويسة؟

-أنا خايفة قوى.. أنت مين؟

-متخافيش...أنتِ ايه آخر حاجة فاكرها.

-أخويا فين.... هو أخويا جرا له حاجة ومش عايزين تعرفوني.

-مدام أنت هنا لوحداك فين شاء الله أخوكمي يكون بخير.

-أنا خايفة قوى.... أخويا حصل له ايه؟

-أكيد ما حصلوش... أنا هسالك ولو حكمت أرجع مخصوص عشان أطمئن عليه هارجع.

-ترجعي فين... والله العظيم أنا خايفة.

لم تنتظر السيدة العجوز كثيرًا.

-تعالى يا بنتي عندي.. دُش سخن واعمل لك شوية نعناع هيهديكي خالص... ما فيش حاجة يا بنتي تستاهل كده..... أنت اسمك ايه؟

-شدا... حضرتك تعرفي شادي فين؟

-اهدي يا بنتي اهدي كل حاجة بتعدي.

نظر نادر إلى السيدة العجوز.

-كل حاجة بتعدي حضرتك بس بتاخذ حاجة مننا، في حنة بتضيع

مننا مع كل موقف ... البنت خائفة.

-لا يا ابني مفيش حاجة بتضيع... بس فيه روح بتجمد جوانا وأنا هتصرف معاها ماتخافش دى زى حفيدتى بالظبط.

نظر إليهم الرجل صاحب الغرفة الملكية.

-والله أنا عايز أخلص ومش عارف أنا قاعد هنا ليه وأنتو مين أنا عايز أروح للبنات عشان اتأخرت عليهم.

قاطعهم سعيد:

-بقولك يا حاجة أنت عاملة أكل ايه النهاردة؟

تجلس دنيا أمام صورة الفتاة صاحبة الملامح الضبابية وهى تحرك قدميها يمينا ويسارا وتحاول أن تكتشف ملامحها، فى اللحظة التى استيقظ فيها نادر، توجهت إلى المطبخ الصغير وتركته ليقوم طقوسه اليومية وبصوت أقرب للعدوبة قالت:

-سبني أعملك الشاى باللبن على طريقي.

يصرخ نادر من تحت الماء:

-لا... أنا بشرب اللى أنا عارفه وبس.

يبدو على دنيا عدم الاهتمام وهي تنظر من جديد إلى الصورة.

-بقولك ايه هي دى صورة مين؟

-للمرة المليون.. أنت هنا عشان تحكى مش تسأل.

قالها وهو يستر نصفه السفلي فقط بفوطة فقد نسى أن يأخذ ملابسه معه.

-هعملك الشاى على مزاجى.

لكنه أجابها رغم اعتراضه:

-دى الصورة الوحيدة الى فاكرها من قبل ما أجي هنا... رسمتها أول فترة ومش عارف الفترة دى ممكن تكون قد ايه... أنا هنا بلا وقت... رسمت جسمها كنت فاكر تفاصيله كويس بس لحد الوش وعمرى ما افكرته ف خلите ضباب كده.

-ده الموضوع كبير بقى... عندك حبهان وقرنفل.

-مش عارف... شوفى فى التوابل.... ده لو عندى توابل أساسا.

فتشت دنيا فى الأدراج الصغيرة ونادر يكمل:

-بس تعرفى الصورة دى كل لما أشوفها بادخل فى حالة مش مفهومة!

-بتحس بإيه يعنى؟

-أنا مش قلت لك قبل كده.. أنا هنا بلا إحساس أو مشاعر... أنا
مش باحس لا بوقت ولا بأى نوع من المشاعر.

-بس أنت بتزهق.

-زهق مش مشاعر.

-أنت تعرف إيه عن المشاعر.... إيه أقصى حاجة شوفتها عشان
تفهم فى المشاعر... عمرك حسيت إنك محبوس جوه جسمك...
جربت... جربت؟

صمتت دنيا وأخذت نفسا عميقا.

-أنا لقيت حبهان وقرنفل.... بص بقى الطريقة دى مختلفة تماما
عن اللى أنت تعرفها.

-أنا عايز كوباية شاي باللبن عادى.

-استنى... هقولك عشان تبقى تجربها لوحدهك... أطحن الحبهان
والقرنفل كويس... على بعضهم.

-كام واحدة؟

-شوية قرنفل وكام واحدة حبهان.... بص خليه تلات فصوص

حبهان بس عشان الشاى ما يمررش وزيهم قرنفل وتغليهم فى نص
كوباية مايه مع ملعقتين سكر ولما يغلوا كويس صب عليهم كوباية
لبن وابقى زود السكر براحتك... ولما اللبن يغلى صفيه فى كوباية
كبيرة وادعيل.

-ايه القرف ده؟

-أنت جربت.

-لا.

-الحياة فيها حاجات كثير غير الى أنت عارفه وحابس نفسك
جواه... جرب... وكمل لى قصة الصورة.

-معنديش غير الى أنا قلته.

-معندكش ولا مش عايز تفتكر؟

-دُنيا.. ماتنعميش صوتك عشان أنا مش بتأثر.

-أنت بدأت تحبنى ولا ايه؟

يضحك نادر بشدة وهو يأخذ رشفه سريعة من الكوب الذى وضعته
أمامه، ويبدو على وجهه الحيرة.

-حلو؟

-مش عارف.. مش قادر استوعب طعمه.

-اشرب شوية كمان وغمض عينك.

-ليه؟

-هخليك تستمتع بالتجربة.

وقفت خلفه ووضعت يداها على كتفه وبدأت في تدليك رقبته.

-اشرب دلوقتي.

أغمض نادر عيناه بعدما شرب نصف الكوب ثم نظر إليها...

-أنا افتكرت صورة مين دى.

بلهفة جلست أمامه

-صورة مين!!

-أنا فاكر بس مش حاسس بحاجة ناحيتها... أنا افتكرت إحساس

الوجع بس أنا مش موجوع دلوقتي... أنا فاكر أنى كنت متضايق

ومخنوق بس الإحساس مش موجود.

-مش معقول حد خانقك ووجعك وترسم له صورة.

-هى وجعتنى.. بس ده لا يمنع أنى كنت مجبها.

-دى قصة كبيرة بقى!

-أنا فاكركل تفاصيل القصة بس مش فاكركل الشعور... أنا تقريبا مابقتش أحس.... تصدقنى أنا سعيد جدا.

-نادر.. أنت بتحس... أنت بدأت تهتم بيا؟

-هو بالعافية؟

-لا... مش بالعافية... بس أنت مش بتشوف نظراتك لى.... أرجوك ماتحبنيش.

-اطلعى بره... أنا كنت مرتاح من الهم ده.. أنت جيتى ومعاكى زهق.. وواضح إنك فتحتى الباب لناس تانية... المكان بقى زحمة... أنا واضح أنى همشى.

تتعالى الأصوات داخل رأسه.... يرتفع نبضه ويشعر بدفع فى جسده يقاوم تلك الأصوات ينظر إليها.

-أنا مش مجبك... أنا مش هاحب تانى.. أنا كل ما حب حد يوجعنى.

-طب ومامتك؟

-أنت تعرفيها منين؟

-أنت بتكلم نفسك وأنت نايم أكثر ما بتكلم معايا... وعلى فكرة

أنت قلت اسمي كذا مرة!

-أنا مش مجلم.

-أنت ماتعرفش... يمكن بتحلم ومش بتفتكر.

نادر

الساعة تشير إلى الواحدة مساءً، يجلس نادر في غرفته يستيقظ على صوت يحاول أن يبدو خافتاً، يرتفع الصوت تدريجياً يحاول الاستيعاب، صوت أمه يتردد « وطي صوتك العيال نايمين» يرتفع صوت والده «مالهم العيال هو أنت عايزة منى ايه» يفتح الباب ويخرج وهو ينظر إلى الغرفة التي اعتاد النوم فيها بجانب والدته، والده لم يأتي منذ ولادته سوى مرات لا يتذكر أنها تعدت الخمس مرات، هو دائم السفر وعندما يأتي يتحول البيت، يتغير صوت الهدوء إلى صوت هذا الرجل الذي يدعى إنه والده.

تقف الأم بهدوء رغم كل الضغوط.

-هو أنت عايز منى أيه... ننفضل وخلص.

-هو أنا كل ما أنزل تقوليل نتهيب؟

-أنا ما عرفكش... أنا آخر تسع سنين في حياتي قابلتك فيهم بالكثير حوالى خمس شهور، بتيجي وتطلب منى أكون زوجة، على أساس ايه تفتكر إني هتقبلك.

يقف والده وهو يرتدى ملابسه بعصبية بالغة لا تتناسب مع هدوء والدته.

-أنا غلطان أنى نزلت ما أنا مسافر ومرتاح من خلقتك.

-خلاص نرتاح من بعض خالص.

يتوقف وهو يرتدى القميص ولم يغلق زرار بنطاله بعد.

-سبى الشقة وأنا أطلقك.

بدهشة: -طب والأولاد أنت عندك بنت عندها عشر سنين وولد تمن سنين.

-مش أنت ماتعرفنيش عشان مسافر... أكيد بتزنى على ودانهم طول ما أنا مش موجود وبتقوليلهم كلام غلط عنى.

-أنا بنت أصول.. والى بينا حاجة والى بين ولادك حاجة تانية.

-مش ولادى... أنا ايه اللى عرفنى إذا كانوا ولادى ولا لأ.

ينظر نادر إلى وجه أمه الذى تحول إلى حمرة الدم.

-بص بقى كون أن أنت نجس وبتلف على النسوان وأنا عارفة مش معناه أنى زيك.... فوق.. أنت مش جايبنى من الشارع.... أنت تغور فى ستين داهية دلوقتى والصبح تيجى بمأذون.... تطلقنى

وأسيبك الشقة واخذ أولادى.

-يا شيخة بلاش قرف... ده أنا هرتاح.

فى تلك اللحظة اختفت كل مشاعر الغضب من على وجه الام، سألتها نادر:

-فى ايه؟

-مفيش يا عيونى... بابا عنده مشاكل فى الشغل ومتعصب... احنا بكره هنروح نقعد عند جدتك شوية.. فى مشكلة؟

-مش عارف.

-لا مفيش أى مشكلة المهم ادخل اقعد مع أختك دلوقتى عشان نصحى الصبح نلحق نلم حاجتنا عشان أوديكم عند تيته... قبل ما بابا يرجع عشان هو مش عايزكم تشوفوه وهو عصبى...

تجلس خلود فى زاوية الغرفة تنظر إلى نادر وتفتح يدها له، يجلس فى حضنها يرتجف جسديهما معاً تحاول أن تتذكر كلمات قد لقنتها لها جدتها لا تتذكر سوى «يا كاشف الغم فرج همى» ينظر نادر إليها.

-خلود أنا خايف.

-وأنا كمان قوى... بابا صوته عالى.

- هو أنت بتقولى ايه؟

- ده دعاء... مش فاكر لما تيته قالت لنا نقوله لما نبقي خافين قول معايا يا نادر قول.

يرردا معًا بصوت ضعيف « يا كاشف الغم فرج همى » يرتجفا معًا حتى رحل.

انقطعت أخبار هذا الأب المزعوم لسنوات، كان على والدته أن تبني حياة جديدة، تنازلت الأسرة عن الكثير حتى يصمدوا ولحسن حظها أن نادر كان على قدر المسؤولية لم يشتك يومًا لم يطلب المزيد، كانت الطمأنينة التى تُصدرها أمه إليه تكفى أن يبقى ساكنًا، وحين بلغ من العمر ما يساعده على العمل لم يترك إجازة إلا والتحق بعمل فيها، كان نادر وسيم حسن المظهر مما ساعده على العمل فى مجالات مختلفة، سنوات عجاف تمر ببطء لكنها تمر لا زالت الأم محافظة على ابتسامتها لم يراها يومًا تبكى ربما كانت تبكى وحيدة أو بعيدًا عن أعين الناس لكن نادر ظل محافظا على ابتسامتها فى ذاكرته ومحتفظًا بحقد لم ييح عنه يومًا لاحد.

تقف السيدة العجوز على راس الطاولة يجلس أمامها نادر جانبه على اليمين دُنيا وعلى يساره سعيد جانبه مرزوق الرجل صاحب الغرفة

القصر أمامه شدا.

ينظر سعيد إلى الأطباق المرصوة وينظر إليها.

-هو حضرتك اسمك ايه؟

تبتسم الجدة.

-احنا سلو بلدنا يا ابني عيب أن حد يسأل الست عن اسمها لما تكون مخلقة رجالة وعرفت تربيههم... أنا اسمى أم عاصم.

-ولو مخلفتش رجالة.

-يبقى أنا اسمى كريمة.

-طيب أنا أقول لحضرتك يا ماما كريمة ولا يا ست أم عاصم؟

-الى أنت عايزة...

يسيل لعاب سعيد وهو ينظر إلى الأطباق الممتلئة، دون انتظار أو إخطار يفتح آخر أزرار قميصه ويشمر عن ساعديه وخلصة يفك الحزام قليلا.

-أنت بتعمل ايه؟

-بوسع للأكل مكان يا أستاذنا هو الموضوع مش سهل كده يعنى.

تنظر شدا بتوجس تحاول الاستيعاب وهي تردد بهدوء «شادی... أنت كويس»، تنظر لها دنيا وتحاول أن تخفف عنها وطأة الصدمة.

-أنا اسمي دُنْيا... كنت بروح وأجى كثير بس دلوقتي أخذت أوضة جنبكم، ده يا ستى اسمه نادر فنان ومش عارف ولا حاسس بنفسه. ينظر إليها نادر.

-أنا مش فنان ولا حاجة أنا هنا باريح دماغى.

لم تعر انتباها لما قال وأكملت....

-نادر بقى كتب رواية عنى.. بصى هو هيكتب عنى بس هو مش عارف، الى قدامك ده مرزوق، كل الى أنا أعرفه عنه إنه شقيان عشان خاطر بناته وليل نهار بيقول إنه عايز يروحلهم.

يتحدث سعيد وهو يأكل: -طب ما تروحلهم!

ينظر نادر إليه

-سعيد... أنا شايف كرشك من جوه.. اقفل بقبك واتكلم بعد ما تبلع.

ينظر مرزوق إلى سعيد

-أنت بتعمل ايه فى حياتك يا أ. سعيد؟

-أنا مش أستاذ وأحسن حاجة باعملها أنى باكل... عارف تقريبا كل أماكن الأكل بأسعارها وعلى حسب حالتك المزاجية أأخذك وأأكلك فى المكان اللى يزيبط كل حاجة وبعمل حاجة كمان بس ميصحش عشان البنات.

-بس؟

يضع سعيد قطعة من اللحم كان على وشك التهامها وهو ينظر إلى مرزوق

-آه بس... أعمل ايه تانى؟

-ما جربتش تبقى مسؤول؟

وابقى مسؤول ليه يا أستاذنا أنا عايشها كده... بس تعرف أنا خايف.

يرد عليه مرزوق:

-ايه خايف تموت لوحدي؟

-لا أنا مش خايف أموت لوحدي.. أنا خايف أعيش لوحدي... خايف الناس اللى بتكلمنى عشان مطعم ولا أكلة ييجى عليهم اليوم ويبقوا مش محتاجنى، خايف أصحابى يخطفوا تدريجيا وألاقي نفسى قاعد لوحدي... عايش لوحدي.

-طب ماتت...

-هتعمل زى أمى وتقولى أتجوز... أتجوز!!! ايه الفكرة أساسا من الجواز.....

ينظر سعيد إلى الإناث حوله ثم يكمل:

-أنا آسف يعنى فى اللفظ بس تفتكر الناس بتتجوز ليه.. عشان يناموا مع بعض!

صدمة علت وجه شدا التى لا زالت لا تستوعب أين هى.. تهز دنيا رأسها يمينا ويسارا وهى تردد بصوت هامس «كلكم دماغكم كده» يرد عليه نادر:

-ايه يا ابني الى بتقوله ده؟

-بقولك ايه يا أستاذنا.... أنا مش عارف ليه أساسا ربنا حرم العلاقة مين غير جواز.. عشان اختلاط الأنساب طب مش هخلف... عشان الإشهار... هاقول لكل الناس إن دى صاحبتى وعایشين مع بعض ومفیش راجل غیرى هيلمسها.

تقطع السيدة كريمة جزءا كبيرا من فرخة أمامها وتضعها أمام سعيد.
-كُل دى يا ابني.

-والله حضرتك اللى فهمانى.

-تعرف يا سعيد... ربنا لما بيحط أوامر بيحطها مش عشان واحد،
بيحطها عشان مجتمع كامل بالى فيه مش عشان مزاجك، طيب أنت
يا سيدى زى الفل وهتعرف تعمل اللى أنت بتقوله ده غيرك هيعرف؟

-أنا مالى ومال غيرى ربنا بيحاسبنى لوحدى.

-ربنا هيحاسبك لوحذك بقانون اتخط لكل الناس.

-بصى حضرتك أنا مش ملحد زى ما أمى بتقول.

-وأنا مقولتش إنك ملحد يا ابنى... عايز تفكر فكر زى ما أنت
عايز بس لازم تعرف إن القوانين بتتخط عشان الأغلبية تمشى
عليها مش هنعمل حاجة ليك لوحذك.

ياكل سعيد قطعة الدجاج وينظر إليها.

-بتحطى عليها ايه يا حاجة؟

-محط عليها كل التوابل وأنا بضحك.

يصدمها مرزوق: -ما أنت مش شايلة هم حاجة.

-مين قالك؟

-أنا مش بحب الناس اللي بتقعد توعظ دى وهى مش عارفة حاجة.

-بص يا مرزوق كل واحد فى الدنيا فاكر إنه شاييل هموم لوحده... أنت ماتعرفش عنى حاجة... ولا تعرف أنا تعبانة ازاي... ولا عندى ايه... أنا بتمنى الموت كل دقيقة، تعرف يعنى ايه تتمنى الموت عشان ماتتوجعش، تعرف معنى إن دموعك من كتر الوجع مش بتنزول إنك تعافر عشان ماتعش إنك تعافر عشان تموت، تعرف يعنى ايه إنك تتمنى ربنا ياخذ منك نعمة الإحساس عشان تبطل تحس، إنك شايف العجز فى عيون اللي حواليك عشان محدش قادر يساعدك، إنك تتوجع مليون وجع فوق وجعك وأنت شايف عشرتك بتبكي على الأرض وهى ماسكة ايدك، إن جوزى يبقى بيصلى ويدعى عشان ربنا يشفينى وأنا شايفة عينيه بتقول لى موتى بس خدينى معاكى، تعرف ايه عن الوجع وأنت كل دقيقة فى حياتك بتحط هموم على أى حد بتحبه، تعرف ايه ونار ماشيه فى شرايينك وانت من الوهن مش قادر تقول لا، تعرف ايه عن الوجع وانت بتمنى الموت ومش طايله

ينظر إليها مرزوق....

-أنا عايش صاغ سليم وبتمنى الموت كل دقيقة عشان بناتى، حضرتك هتعرفى يعنى ايه عجز لما ولادك يموتوا قدام عينك وأنا كل اللي فى ايدى وقتها انى اصرخ، تعرفى ايه عن العجز؟

-أنا اعرف حاجات كثير يا ابني عن العَجَز.

تنظر دنيا إليهم وتحاول كسر حدة الموقف.

-تيجوا نعمل حاجة مختلفة بالليل... احنا واضح إننا مش هنقعد مع بعض كثير.

صوت سعيد يطرق على الباب من المؤكد إن ميعاد استيقاظي لم يحن بعد، هل سأستيقظ يوماً دون شعور الغثيان، اللعنة على هذا الشعور.

-أدخل يا سعيد تعالى.

لم ينتظر سعيد الرد فقد كان يضع احتياجات نادر في المطبخ الصغير وقبل أن يخرج نظر سعيد إلى نادر.

-أنت يا أستاذنا من امتي ليك في الحاجات الحلوة؟

-حاجات ايه؟

-في واحدة مستنياك بقالها كام يوم بره.

يعتدل نادر في جلسته، وياخذ نفس عميق.

-سعيد.. قصدك على دُنيا؟

-أقسم بالله أنت برنس... وكمان عرفت اسمها.

-سعيد أنت عارفها وشوفتها كذا مرة.

رفع سعيد حاجبيه

-بجد... والله يا أستاذنا مش فاكر.. بس مدام أنت مبسوط يبقى تمام.

-مبسوط بايه يا حلوف.. يا حلوف.. يا حلوف.

-تاني حلوف... مقبولة منك المرة دي بس عشان واضح إن الحلوة ماثرة عليك... همشى أنا بقى عشان عندى كذا مصلحة.

-سعيد استنى... هو أنت ابن ناس ولا من الشارع ولا أنت متعلم ولا جاهل؟

-أنا يا نادر على حسب الموقف... أنا زهقت أكون حاجة واحدة.. أنا طول عمرى نفسى أكون سعيد ما أنت عارف كل حاجة عنى، ولا هتنكرنى؟

يختفى سعيد ويخرج نادر بجذر أمامه المشتل الصغير كما هو، ينظر للخلف داخل الغرفة يجد الأوراق يعود سريعًا إلى مطبخه الصغير ينظر إلى بقايا فصوص الحبهان والقرنفل، يعود إلى الخارج ينظر فى

الركن يجدها،، كانت تجلس على الأرض مستنده على سور السطح
المواجه لمشتله الصغير، خلعت قميصها من حرارة الجو فكشفت
عن ذراعيها وعن رقبة عنقاء عاجية واستدارة في خصر يتوقه حزام
لم استطع تمييز لونه من انعكاس ضوء الشمس عليه، ما هذا نفس
الموقف من جديد، نفس الحالة نفس الفكرة يتكرر كل شيء هل
أنا حقًا نادر.

تتحرك دُنيا ناحيته وهي ترتدى قميصها ببطء عن المرة السابقة.
-متخافش يا نادر... متخافش... أنا دُنيا واحنا اتقابنا كثير...
وأنت هتكتب رواية أو كتبت رواية عنى... مش مهم.

-يعنى كل اللى حصل ده؟

-كل اللى حصل أو هيجصل أو بيحصل دلوقتى مش هتفرق المهم إنه
حدث موجود.

-أنا مش فاهم أى حاجة.

-تشترب شاي باللين زى آخر مرة... تعالى أدخل.

يقف نادر وهو فى حيرة تتردد أصوات جديدة صفارات متقطعة،
أصوات أطفال، هناك صوت لأحدهم يطلب طعاما، برودة فى أطرافه
رغم حرارة الغرفة.

-دُنْيا...-

تلتفت مبتسمة.

-أول مرة تنادى عليا.

-مالك مبسوطة كده.

-أنت محدش قالك لما راجل ينده على واحد باسمها وهى تسمع اسمها واضح بتحس بايه.

-لا الصراحة مفتكش أنى كنت بنت... وأنا بنادى عادى.

-تؤتؤ تؤ... أنت نادتنى بصوت مش عادى.

-أنا؟

-آه... والمفروض أتبسط.

-ايه اللى يبسط؟

-نفس الإحساس اللى كنت حساه وأنا لابسة الفستان ولوحدى وعلى السطح... لما راجل ينده عليا بحنيه قوى كده بحس أنى بنت.

يتفحص نادر أطرافه ويحاول تدفئتها... تضع دُنْيا مشروبه الساخن وتسأله:

-مش هنكمل؟

-آه.. نكمل.. وماله... نكمل.

-مالك؟

-أنا بتوه منك... مش عارف أنت بتكتبي ولا بتحكي ولا ايه بالضبط؟

-لا المرة دى هتكلّم مش هكتب.. هحاول أفضل معاك هنا.

-كويس... عشان أنت عشوائية جدّا فى الكتابة.

-ليه؟

يمسك نادر أوراقا ويضعها فى راحتها.. حين سار فى جسده تيار سقطت بعده الأوراق من يديه، نظرت دُنيا إليه.

-نادر.. أبوس ايدك ماتجنّيش.

-مش مجبك.

-هحاول أصدقك.. هحاول.

-مش هالمسك ومش هناديكى باسمك ولو عايزة تمشى امشى أنا هقعد تانى.

-لا نكمل... نكمل.

أشار نادر إلى الأوراق.

- ابقى اقرى الى أنت كتباه.

- هو أنا الى هكتب عنى.. أنا بحكى الى بيحي على بالى.

- كملى يا دُن.....

أزاح وجهه عنها.

- كملى يا أى حد كملى.

- عايز تعرف ايه؟

- ركزى فى الحكاية مين أصل المشكلة.

- كل حاجة كانت أصل المشكلة، أمى وأبويا والشارع والمدرسة وكل

حاجة مكانتش عايزة تعترف بى كينت، أنا بنت المفروض كل حاجة

تمشى على الأساس ده مش تدور على انى عكس ده.. بتعرف ترقص.

ينظر نادر إليها فى حيرة.

- رقص ايه!! ركزى شوية مش معقول.

- هو أنت مش سامع الأغنية....

- دُنيا أنت عارفة أن مفيش عندى أصوات... مفيش... أنا مش

سامع.

-تخيل يا نادر... تخيل.

-مممكن أسالك سؤال؟

-بما إنك واثقة من نفسك كده... خايفة ليه أحبك.. باعتبار إن ده
مممكن يحصل أساسا؟

-أنا مش خايفة من حبك... خالص، يا ريت كان عندى الرفاهية
دى، بس أنا معنديش.

-ليه؟

-الحب رفاهية مش للى زي، أنا طول عمرى مُجبره على العيشة كبت
من بره و.... يووووه نفس الكلام بكرره، تعرف ترقص ولا لا.

-بذمتك ده منظر واحد بيرقص؟

-هو احنا داخلين الأولمبياد... اسمع بس.

-مفيش حاجة تتسمع.

-والله فى... دائما فى حاجة بتتسمع.

-أنا بحب السكون وأنتِ من ساعة مظهرتى وأنا عايش فى قلق.

تقف دّنيا على أطراف أصابعها وترفع يديها إلى أعلى وتحاول الدوران كراقصات الباليه لكنها تفشل وتعاود الكرّه أكثر من مره ونادر ينظر إليها.

-تعرف في وقت معين لازم تسيب المشاعر الى جواك تعبر عن نفسها، تسيبها هي الى تسوق، إنك مثلا تعيط أو تصوت ومن غير ما تسال نفسك مالها، كل لحظة بتعدى عليك وأنت بتمنع مشاعرك بتخنقك، كمية وجع محدش بيحس بيها غيرك لوحدك.

تتمايل يمينا ويسارا وتملئ الغرفة بحركاتها الراقصة التي تفتقر إلى الاحترافية.

-الناس هتلومك عشان أنت مابقتش طبيعي، لو ماسيبتش نفسك دلوقتي هيجي لحظة وبعدها كل شىء بينهار حتى لو فكرت وقتها إنك تسيب مشاعرك هي الى تسوق ... عارف ليه؟

يقف نادر في الزاوية وهو يبتسم على حركاتها ولا يبدو عليه أى توتر.
-ليه؟

-عشان وقتها بتكون خنقت مشاعرك بما فيه الكفاية ومعهاها روحك بتموت عشان كده أنت مش سامع الموسيقى.

-وأنت مشاعرك بتقولك أرقصى؟

- لا... خالص بس أنا فرحانة سمعت أن جوزى طلقنى.

- سمعتى... هو أنت كل ده كنت متجوزة.

- احنا هنا بنسمع بس، ولو قصدك على الورق آه متجوزة على الورق بس مين قالك أن الجواز ورق وبس.

- يعنى ايه الجواز مش ورق يعنى ممكن تكونى مع أى راجل...

توقفت دنيا عن الرقص ونظرت إليه بحدة.

- حتى أنت فاكرنى شمال، حتى أنت الى سايبه الحياة وبحاول احكيه، أنا مش ش.... أنا مش بنت ليل يا أستاذ ومش باجرى وراء شهوة، هو أنت فهمت أى حاجة من الى أنا قلتها، هو أنت فاهم ولا أنت قاعد بتشرب زفت باللبن وبتاخد دش وسايب مخك، أنت أزاى أساسا تفتكر إني قصدى أكون مع أى راجل، هو ايه الرجالة مفيش فى دماغها غير كده، الست الى لابسة بتيبقوا هتموتوا تشوفوا الى تحت اللبس والى قالعة بتموتوا عشان تلمسوها والمطلقة شمال وايبويه، حرام عليك.

ارتدت دنيا حذاءها بعد أن كانت قد خلعتة وهى ترقص ونظرت إلى نادر.

- اسفه أنى جيت، وأنا كنت غلطانة لما جيت هنا، أنا همشى

واكتب بقى ماتكتبش واضح إن كده كده كلكم مش شايفينى
غيرع السرير.

-أنا ماقلتش أى حاجة.

-أنت ماقلتش.. أنت بس جرحتنى زيهم بالظبط.

يقف سعيد عند باب الغرفة وهو ينظر إلى دنيا.

-هو ايه جو الأفلام قوى ده.... هو ايه الى جرحك ووجعك الراجل
سأل سؤال ردى؟

ابتسم نادر فى وجه سعيد فربما يكون قد أنقذه من فقدانها قبل أن
يفهم.

-آه والله يا حل... يوووووه يا سعيد.

نظرت دنيا إليهم.

-طيب ادونى فرصة أعيط... أنا اتوجعت والله..

-يا ست الكل عيطى.

ينظر نادر إلى سعيد.

-هو مش أنت لسه كنت ناسيها.

-أنا!!!

-أمال مين وهو بيحبلى الحاجة شافها ومكانش عارفها.

-يا أستاذنا أنا دماغى دفتر... أنا أو غيرى المهم صالحها.

وفى دهشة: -هى راحت فين... يا دُنيا؟!!

يخرج نادر مسرعًا إلى غرفتها ولكنه وجدها خالية تمامًا.

نادر

يجلس نادر أمام والدته.

-ممكن أسألك سؤال؟

-عارفاه ومستنيه طول عمرى إنك تسأله.

-مين السبب أنت ولا بابا؟

-بص يا نادر... أنا طول عمرى وأنا بمحاول مكرهكمش فيه...
عشان وارد أكون أنا الى كنت غلط ومكنتش عايزة قراركم لما
تكبروا يكون مبنى على مشاعر أنا بنيتها، أبوك عندك روح وكلمه،
وقررر أنت براحتك

-أروحله مش هتزعلى؟

- تعالى يا عاصم أقعد جنبى... أنت ماجيتش ليه بقالك كام يوم!

رغم أنه لم يفارقها للحظة.

-حاضر يا أمي هافضل قاعد.

-كويس.

-بس من أمتي بتقوليلي يا عاصم مش يا ابني.

-عشان خلاص بقي أنا هامشي.

-طولة العمر ليك يا ست الكل.

يجلس عاصم على طرف السرير وهو يحتضن رأسها.

-لا كفاية كده خلاص.. أنا نفسي بقي يوجعني قوى وصدرى مش
مستحمل أنفاس تانية شغال بقاله عمر.. مع أن يعز على قوى أنى
أسيبك يا ابني بس الدنيا.

ينام بجانبها ويضع رأسه على كتفها.

-ماما هو أنت بتقعدى تكلمى مين؟

-حبايبى باكم حبايبى كلهم وناس تانية عايزين يمشوا مع إنه لسه
بدرى قوى.

تغمض عيناها وتنظر إلى أعلى وهى تبتسم «أنا مش ناسية هاسألك

يا بنت هاسألك» ينظر إليها.

-بتقولى حاجة يا ماما؟

تعود إليه.

-أنا تعبتك معايا قوى يا عاصم، سنين يا ابنى وأنت شاييل وجعى وشايفاك ومش عارفة أساعدك أنا مش قادرة أساعد نفسى يا ابنى والله.

تأخذ نفسها بصعوبة.

-كان نفسى أشوف بنتك فى فرحها إياك تعيط يا ولدى لما امشى أوعى تزعل أنا ما يخلصنيش أشوفك زعلان ما هو أنا أكيد هشوفك بس مش هاقدر أطبطب عليك... عاصم إياك تنسى أمك برده أنا عارفه إنك أصيل ومش هتنسى.

-لو بايدى كنت أخذت الوجد منك.

-ولا يوم أشوفك كده ولا يوم يا رب.

ممرضة تجلس أمام مرزوق.

-أنت آخر حاجة فاكرها ايه؟

-أنا فين وأنتم مين؟

-أنا هقولك كل حاجة.. بس قولى آخر حاجة فاكرها ايه؟

-بناتى فين... هو أنا عايش صح! بناتى فين؟

-احنا معندناش أى معلومات عنك أنت قول لنا أى معلومة عشان
نقدر نساعدك.

-ماتوا صح... الثلاثة ماتوا الصغيرة كانت ماسكة أيد أمها لا مش
مسكاها دى كانت رابطها بإيدشارب أخضر لقيتوا الإيدشارب... هى
كانت مربوطة فى أيد أمها اصل الصغيرة كان جسمها قليل وأنا كنت
خايف تضع أهى ضاعت يا ريتنى كنت رابطها فى ايدى أنا... طيب
أنا كنت هاربطها ازاي والبكرية كانت قاعدة جنبى عشان تحمينى
اصل البكرية كانت بتحبى وكانت خايفة هى ماتت اوعى تكون
ماتت وهى خايفة هى مش بتخاف من الضلمة لا يومها كانت الدنيا
ضلمة قوى والموج على.. الوسطانية أكيد عايشة البنت دى بتعوم
زى اللهلوبة بتعرف تعوم وأنا كمان بعرف أعوم قتلها لو حصل
حاجة خلى بالك من الصغيرة عشان مش بتعرف تعوم.. ومراتى
بتعرف تعوم برده أصل أنا وهى كنا ولاد عم وبنعوم مع بعض من
واحنا صغيرين فى البحر كنا بنهرب من أهلنا عشان نعوم... هى فين
دى عمرها ما سابتنى ده أنا كنت فى البحر عشانهم... ماتوا صح

كلهم ماتوا طيب أنا عايش ليه.. معلش يا بنتى أنا عايش ليه... أنتو
عايزين تحرموني منهم ليه سيبنى.. سيبنى يا بنتى.

-يا أستاذ أنا معرفش والله قولى بس أنت منين أو أى معلومة اعرف
أطمئنك بيها

-لا هم ماتوا اصل أنا كنت سامعهم وهم بيصوتوا لا لا لا محدش
صوت ماتوا على طول ماتوا... العيال ماتت كل حاجة كنت عايز
أعملها ماتت عيالى ماتوا أعمل أنا ايه دلوقتى كنت عايز أعمل فلوس
راحوا عيالى ومش هعرف أعمل فلوس ولا أرجع عيالى تانى... يا
بنتى سيبنى والله ماهقول إنك سبتينى أنا عايز أموت بقى.

أفتح عيني ومعها يعود الغثيان، أنظر إلى الكرسي الذى جلست عليه
دنيا على أجدها لكنها اختفت منذ اللحظة التى نهرتها فيها، لا أعلم
لماذا قررت الحكم عليها هل حقاً أخشى الوقوع فى حبها، أنا لا
أمتلك مشاعر.... أنا لا أمتلك مشاعر، أنا هنا صرت وحيداً مستمتعاً
بما أنا عليه، نعم أنا فى حالة هروب من كل شيء ربما أصبحت الآن
أضعف من المواجهة لكن لماذا اشتاق إليها، لماذا أفكر فيها رغم
كم التغيير الذى طرأ على حياتى منذ أن أتت، حمام ساخن وعودة إلى
روتينى المعتاد سوف ينسينى تلك الأيام، أنا صمدت هنا لفترات،

لا لا أنا لا أفكر في العودة مرة أخرى، لمن أعود.

يقف نادر وهو ينظر إلى قلبه الذى سيطر عليه اللون الأبيض وبروازه الفراغ ثم يرفع رأسه تدريجيا إلى صاحبه الوجه الضبابى وللحظة يعود شكلها إلى ذاكرته ومضة سريعة كفلاش الكاميرا وهو يلتقط إحدى لحظات السعادة لكن اللحظة خلفت شجن داخله، سار بشكل عشوائى داخل الغرفة، أو ربما ظن هذا كان يتتبع الأماكن التى رقصت عليها دُنيا، دخل وترك جسده لبخار الماء، أغمض عيناه وسمح لنفسه أن يبتسم وهو يتذكر أول مرة رأى فيها دُنيا، ابتسم وهو يتذكر اللحظة التى أغلق الباب على يدها واللحظة التى حاولت أن تخفى جسدها عن نظرات عينيه، فتح عينيه على صوت خارج الغرفة.

-مين بره... سعيد؟

لم يجب أحد حتى خرج نصف عار وهو ينظر إلى دُنيا، كانت ترتدى فستانها الذى أردته أول مرة أعلى سطح منزلها، فستانها الذى جسد أولى ملامح أنوثتها، كاد نادر أن يفقد غطاء جسده السفلى لكنه تشبث به فى اللحظة الأخيرة، وقفت أمامه فى ثبات، عجزت الكلمات فى تلك اللحظة على الاعتذار عما بدر منه أو إبداء الإعجاب بجمالها، أو إخبارها أنها كانت على حق حين أخبرته أنها شعرت بأنوثتها فى هذا الفستان، صمت دام لوقت، ثم باغتته بسؤال:

-حلو الفستان؟

تفحصها مرة أخرى.

-أنا آسف إني بتفرج عليكى... بس آه حلو.. وآسف إني اتكلمت عليكى وحش، وآسف إني قابلتك فى وقت ومكان مش مناسبين، وآسف إني مش عارف ولا فاهم أى حاجة.

-هتكمل الرواية اللى كتبتها عنى ولا مش هتكتب؟

-أنا مش عارف يا دنيا مش عارف.

-لا هتعرف... حاجة كمان قبل ما أكمل... أنا لبست كده عشان أثبت لك....

-مش محتاجة تثبتى حاجة، أنا مش مهم عندى أنت ايه أو كنتِ أزاى، أنا بجد مش عايز أحكم.

-مممكن لما تسمع الحدوتة تحكم.

-مش هحكم برده... أنت بتحكى حدوته أنا معرفش باقى الناس فيها، وارد تبقى صح ووارد تبقى غلط

-ووراد يكون كلامى صدق.

دُنْيا

لا أتذكر أين توقفت، هل أخبرتك عن تلك اللحظة قبل زفافي! هل أخبرتك عن كم الخوف من المجهول الذى عشت فيه! أو خوفاً من هذا الشخص الذى سوف يمتلك أعلى ما أملك.. أنوثتى، لا تقاطعنى ودعنى أحكى لك عن اليوم السابق لزفافي، جلست أعز صديقاتى كانت وقتها أعز صديقاتى لا أعلم اليوم عنها شيئاً تركتني هى أيضاً، كنت فى أشد الاحتياج إليها، كنت أظن أنها ستكون جانبي أستمّد منها قوة، ربما كنا على خلاف لكن هل للخلاف معنى بين الأصدقاء فى وقت الأزمات، أنا فى أزمة الآن يا نادر لا تضحك رجاء، لا يوجد علاقة بين الأزمة وهذا الفستان الذى أرتديه، لا لن أخبرك عنها سوف أكمل لك تفاصيل الليلة التى سبقت زفافي، صديقتى كانت جانبي فى فجر هذا اليوم ومعها جميع أدوات التجميل الطيب منها قبل المؤلم، مناطقى الخاصة كانت مستباحة لصديقتى وسيدة أتت بها أُمى، نهار كامل من الآلام فى عمليات إزالة سنوات الطفولة كاملة من على جسدى، رحلت صديقتى وتلك السيدة بعد معاناتى وتركونى وحيدة فى غرفتى، أغلقت الباب بالمفتاح ووقفت عارية أمام المرأة وابتسمت ورقصت لم أشعر بأى عيوب فى جسدى الهواء يلامس

جسدى وفى لحظة توقفت وتذكرت أن بعد أقل من يوم سأفقد كل هذا، هل تظن حقاً أن زوجى سىء كما أخبرتك، أو أن توقعاتى كانت أكبر من الحقيقة، لا تندهش أنا أخبرتك أنى سأحكي لك، أعلم أننى عشوائية لكنى حقاً لم يكن زوجى سىء هل يوجد رجل لا يبحث عن إراحة شهوته، ربما أنا فعلاً كنت جميلة وهو كان يستمتع بتلك اللحظات معى، هل أنا المقصرة، أكنت أنتظر منه كلمات حب وصفاء هل كنت أنتظر منه بعد يوم شاق فى العمل أن يأخذنى بين أحضانه لترقص معاً، زوجى كان هادئ الطباع قليل الكلام، نعم مرة أخرى كانت شهوته طاغية لكنه لم يترك شهوتى يوماً مشتعلة، هل كانت تلك طريقته التى كان يخبرنى بها بحبه، لا لم ينهرنى يوماً، كانت لديه مميزات كثيرة، لكنه لم يكن يخبرنى صراحة إنه يهتم، هل أبى كان مثل زوجى، هل كانت أمى تبكى بسبب اعتقاد خاطئ أن والدى يستغلها، أخبرنى أنت ما هى الحقيقة، أنا احكى لك عن حياتى، هل بنيت أحكاماً على والدى وزوجى؟ هل تعاطفت معى أنا وأمى؟ لا تصدر أحكاماً أصمت قليلاً ولا تقاطعنى وأنا أحكى، لست مجنونة يا نادر ولا تنعتنى بهذه الصفة مرة أخرى، أنا مشوشة هل رحيلى عن زوجى كان خاطئاً؟ نعم أنا تركته، أنا رفضت أن أكون صورة من أمى، ولكنى لم أسألها يوماً لماذا كانت تبكى، مرة أخرى أنا لست مجنونة، أنا أعلم لماذا أنا هنا هل تعلم أنت؟! أنا لا أمتلك قلباً فارغاً مثل هذا أو بروازك الفارغ ليذكرك إنك هارب من واقعك أو تلك الفتاة

التي تخاف أن تكشف عن ملامحها، أنا أفضل منك ربما عشوائية
لكني لست مجنونة، هل أصنع لك كوبا من الشاي بالحليب كهذا
الذي صنعته لك في المرة السابقة؟

تنظر شدا إلى دُنيا.

- هو احنا فين؟

يحاول نادر استيعاب الموقف منذ لحظات كان مع دُنيا والآن يعود إلى
طاولة العشاء، نظرت إليه دُنيا وقبل أن تجيب على شدا:

- ماتقلقش عدى وقت كثير من ساعة الخناقة بيننا أنا وروح
وجيت وأنت مكنتش موجود أو كنت مستخبي مش عارفة.

- بس أنا مش فاكِر.

- استنى هارد على شدا.

نظرت إليها.

- احنا هنا لا طايدين سما ولا أرض، متشعلقين فى همومنا وبس
وخايفين نرجع نواجهها، أنت هنا ليه؟

- أنا مش خايفة من حاجة خالص، أنا بس عايزة أطمِن على أخويا.

- نظرت إليها كريمة السيدة العجوز.
- لما أرجع هخلي الحاج يسأل عليه.
- يضحك سعيد والأكل يخرج من فمه.
- والله يا حاجة أنا آسف يعنى موضوع الحاج أبو عاصم ده مضحك...
- أنا مش هسألك ايه الى بيضحك بس بطل تضحك شوية عشان
كتر الضحك بيأسى.
- أزاي الضحك يأسى الواحد؟ - قالها وهو مستمر فى الأكل -
- عشان فى لحظة من كتر الضحك هيكون نفسك تتوجع ومش
هتقدر.
- ينظر إليها مرزوق.
- أنا آسف يا حاجة إني اتعصبت.
- خالص يا ابني... أنا الى شيلتك وجعى.
- يستيقظ نادر وبجانبه أوراقا... يحاول أن يطرد حالة الغثيان وهو
ينظر إلى الأوراق الملقاة جانبه ويحاول الاستماع إلى الأصوات التى
تدور داخل رأسه وأصوات تلك الصفارات المتقطعة.

يفتح شادى عيناه بصعوبة لا يزال تأثير المخدر يسيطر على راسه،
ينظر إلى والديه.

-شدا عاملة ايه.

ترد والدتهم:

-هى كويسة بس هتاخذ وقت لحد ما تفوق..

-هى كويسة.

-آه كويسة الحمد لله.

أشعر بالغثيان هذا هو حالى صباح كل يوم...

استيقظ فى تمام الحادية عشر صباحًا اعشق نور الشمس المتسلل
من فتحة النافذة، أشعر بدفء مع دوران ذرات الأتربة، أعود إلى
حضن جدتى وجلستى فى حجرها، كنت أستمتع بقصتها عن يوم
زفافها، كانت صور زفافها محلاة بالأبيض والأسود فقط، أتذكر ذلك
اليوم الذى كانت تحكى لى عن تحضيرات زفافها.

جلست جدتى أسفل النافذة وهى تضع أمامها سبرتاية لصناعة القهوة

وكانت دائما ما تصنع لى مشروبا معها فى معظم الأوقات كان شاي باللبن أو حلبة نظرت يومها إلى الصورة المعلقة لها مع جدى....

-ايه يا تيته الى أنتو كنتوا لابسينه ده؟

-دى كانت أشيك حاجة يا واد عندنا... كان الفستان معمول بالأيد، كانت خياطة فى ميدان لاطوغلى اسمها مدام «طلبة» كانت كبيرة وبيقولوا وهى صغيرة كانت بتشتغل للإنجليز فى أفراحهم كانت كبيرة بس ايديها تتلف فى حرير.

-إنجليز ايه يا تيته بس؟

-آه والله يا ابنى... نزلنا جينا قماش شيفون وجبير وقماش مخصوص للطرحة ما هو زمان كانت الطرحة كل ما هى عالية وطويلة كل ما كانت أشيك، كان فستان أخدوه بعدى عشر عرايس بس جدك مارضاش إنى ألبس واحد قديم وحلف لازم يفصلى الجديد.

-هو جدو الصراحة برده شكله...

-ماله شكله، شنبه كان منور وشه وشعره كان عامله سيشوار عند حلاق فى شارع بورسعيد.

-كان بيحلق برده للإنجليز؟

نظرت إلى الصورة وعيناها تدمع.

-والله وحشتنى ربنا يجمعنا فى الجنة.

-أنتِ كنتى بتحبى جدو؟

-مكنش حب وبس ... كانت عشرة عمر.

-يعنى ايه عشرة دى يا تيته؟

نظرت إليه.

-العشرة يا ابني هى كل تفصيلة بتعدى بين اتنين وقدروا يستوعبوا الاختلاف بينهم، العشرة هى كل سنة بتمر وأنت بتجدد جزء من شخصيتك عشان يستوعب شخصية شريكك، هى طبطبة من بعد خناق، هى السند هى المخدة اللى تمسكها وتقعّد تضرب وتضرب فيها وأنت مخنوق وتحضنها أول ماتيجى تنام، العشرة هى كل حاجة وحشة وعدت بين اتنين بصورة حلوة.

كنت أنظر إلى وجهها وأنا لا أستوعب نصف الكلام إلا أننى سألتها:

-يعنى بابا كده ايه؟

-أبوك يا ابني مختلف مش كلنا زى بعض.

-يعنى هو وحش هو وماما؟

-مش عارفة يا ابني بس أملك طيبة قوى وأبوك.. أبوك هيفضل أبوك.

تذكرت هذا الحوار طوال الفترة التي قضيتها تحت الماء الساخن، هذا اليوم قررت أن أزيل تلك الزوائد في شعري ولحيتي، كانت المرة الأولى التي اشعر فيها بمرور ماكينة الحلاقة الكهربائية وهي تلامس شعيراتي، أشعر بدفع البخار على وجهي، أخذت نفسا عميقا وأنا أزيل هذا الحمل من فوق رأسي، لم أنظر إلى المرأة منذ فترة طويلة لم استطع أنا أشاهد وجهي فالبخار قد حجب الرؤية، تذكرت الآن اني تركت الماء يغلي من أجل مشروبي الصباحي، أشربه وأنا انظر إلى تلك اللوحة المعلقة بالكاد بدأت أتذكرها، كنت أحبها لكن لو كنت أحبها أين ملاحظتها؟ أين هي؟! كيف كان صوتها لا أتذكر لكن قلبي؟ قلبي!!! ألم أنسى تلك المشاعر، أتذكر أنفاسي المتلاحقة عندما رأيتهما والابتسامة التي ترسم على وجهي، أتذكر أن نطق اسمها فقط كان يشعرني بسعادة بالغة، كان هناك دفء يسير في أوردتي عند ملامستها، لم تكن الأجمل ولكنها كانت الأروع، قشعريرة في جسدي تثير شعيرات يدي الآن رغم أنني لا أتذكرها، انتهيت من مشروبي الساخن وأنا أقف أمامها في ذهول من تلك الابتسامة التي على وجهي، من أنت يا صاحبة الصورة الضبابية، مشتلى الصغير لقد غبت عنه منذ فترة، وضعت الكوب وفتحت الباب في هدوء لم يكن هناك أحد جميع الأبواب مغلقة، سكينه لم اعتدها في الأوقات السابقة، لا زالت الشجيرات الخضراء في مكانها لم تذبل محافظة على شكلها، هناك رائحة ذكية تخرج من الأحواض بحذر اقتربت وأنا أجد

زهرات الياسمين أنا على يقين أنى لم أزرعها، ربما هى أين اختفت؟
وأين اختفى الجميع؟! لا يهم أنا عدت إلى سعادتي إلا من تلك
الأصوات التى تتردد فى راسى بين فترة وأخرى (هو مفيش أمل...
عايزة بطانية يا ماما الجو برد... عايز تتغدى) أطرافى تتحرك وحدها
أشعر بأن هناك من يلمس قدمائى، يكفى ما دار فى الفترة السابقة.

- كنت بتحبتها؟

رعشت فى جسدى من الصدمة وأنا التفت إليها.

- خضتيني!

- أنا آسفة.

- مين دى.. الى بحبها؟

- البنت الى فى الصورة ما هو أنا قاعدة أتفرج عليك قلت أسيبك
يوم تستمع بالهدوء.

- هو باقى الناس فين؟

- موجودين... بس أنت عايز تبقى لوحده فانت كنت لوحده.

- أنتِ شكلك حبتيني!

- أنا؟

- أصل حسيتك غيرتى عشان كنت بابص على الصورة.
- لا أنا سالتك بتحبها ولا لأ... ده معناه انى باغير؟
- أصل أنا بعمل حاجات كثير من الصبح وأنتِ ماسألتيش عن حاجة غير الصورة.
- ابتسمت وهى تضع رأسها داخل حوض الياسمين وتأخذ نفسا.
- أنا مش هاحب بسهولة... خلى بالك أنتِ بس من نفسك.
- ما هو أنا لو بحبها أكيد مش هاحبك.
- ليه أكيد.. مش الرجالة ممكن تحب أكثر من واحدة؟
- أنا ماجربتش.. الصراحة.
- يا راجل ده أنتم مأساة....
- أنتِ بتجمعى كل الرجالة فى جملة واحدة ليه؟
- وقفت على أطراف أصابعها وهى تنظر من السور ثم عادت تنظر إليه.
- عمرى شفت شوية رجالة قاعدة وفجأه تدخل واحدة بنت عليهم؟
- يعنى ايه؟

-قصدي شفت وشهم لما بنت تدخل عليهم؟

-لا... ما باخدش بالي.

-ولا من نفسك.

-أنت عايزة ايه؟

-يا نادر لما واحدة بنت بتدخل على شوية رجالة كلها بيقلبوا كيوت جداً، كله مرة واحدة بيكون شهم وصوته عميق وكله فارد صدره ومعتبر إن بنظرة واحدة منه البنت هتدوب فيه.

-يا سلام؟

-نادر... ماتعملش فيها ملاك.

-لا بس أنا واضح أني لو كنت بحب البنت اللي أنا مش فاكرها دي أكيد ما كنتش هابقي كده... أنا مش فاكر الصراحة.

-لا احنا لازم نشوف حل في موضوع الذاكرة ده.

-يقف نادر بجانبها على السور وهو ينظر إلى الفراغ.

-طب ولو في شوية ستات دخل عليهم راجل؟

-هههههههههههه.

-بتضحكى ليه؟

-أصل البنات بيبقوا عايزينه يمشى فى أسرع وقت عشان يرجعوا براحتهم.

يضحك نادر وهو يعود إلى الغرفة.

-تعالى ندخل الأوضة ريحة الياسمين صعبة عليا.

-يعنى هى ريحة الشاى باللبن حلوة؟

جلس نادر على الكرسي الهزاز وهو ينظر إلى الأوراق.

-هو أنا بجد كتبت رواية؟

-أنت بدأت تصدقنى!

-مش عارف... هو أنت من المستقبل؟

تضحك دنيا.

-أنت بدأت تتجنن عشان كده بدأت تصدقنى غالبا.

-مش عارف والله.

-هنا يا نادر مفيش وقت مفيش .. احنا هنا دلوقتى مع بعض ممكن أكون قبلك أو أنت قبلى فى وقت تانى.

-ايه فى حياة أخرى؟

-يووووه.. أنت هتقضيها تريقة!؟

-لا... خلاص احنا مش هنكمل.

-نكمل ايه؟

-هو أنت مش جيتى هنا عشان تحكيلى.. أنت نسيقتى؟

-والله نسييت.

-يبقى بدأتى تحبينى. « قالها وهو يضحك»

-أنا مش بحب حد الناس هم الى بيحبونى.

تضع شدا يدها فوق جبينها، يبدو أنها تشعر بصدا ع يعتصر رأسها،
فتحت عينها بصعوبة والتفت لتجد شادى على سرير آخر جانبها.

-شادى أنت عامل ايه؟

-أخيرا فوقتى... أنا اتخضيت.

-هو أنا بقالى قد ايه نايمة؟

-بقالك يوم كامل ٢٤ ساعة مفوقتيش ولا فتحتى عنيكى.

-غالبا كنت عايزة أنام.

-أنتِ كويسة؟

نظرت شدا إلى شادى.

-أنت باين عليك تعبان.

-آه ما احنا عاملين عملية كبيرة.. أنتِ كويسة؟

-آه.. بس مصدعة شوية... هى ماما فين؟

يرفع شادى يده بصعوبة وهو يشير إلى كرسي خارج الغرفة يراه من نافذة زجاجية.

-نايمة هناك... حلمتى بالبحيرة والاسكوتر؟

-لا... أنا كنت خايفة قوى.

-ليه؟

-الموضوع جه فى دماغى تانى.

-شدا.. أنت ماسمحتيش إني أعيش تعبان وادتينى حتة منك.

-شادی بلاش هبل احنا الاثنين واحد...أنا معنديش تفسير لده بس
أنا وأنت بنحس بكل حاجة مع بعض احنا بنكمل بعض كونك
تعبان وأنا ساعدتك ده مش جميل ده جزء منك.

-عشان كده مش هسيبك للهبل بتاعك.

-شادی أنا مخنوقة ومحدش حاسس بده... أنا خايفة من الموت
قوى.

-مش هسيبك تموتى.

-صدقنى أنا عارفه أنى قريب قوى همشى... أنا مش حاسة إن ده
جسمى.

أكمل هامسا..

-يا شدا المخ لما بيكون عليه ضغوط كثير بيدور على حاجة يفكر
فيها تكون صادمة عشان يشتمت المخ من الضغط ده.

-بس أنا مش مضغوطة يا شادی.. أنا كنت فى مكان تانى خالص .

يصمت شادی فى لحظة دخول الطبيب ومعه ممرضة يطمئنان
عليهما ويخرجان، يتحدث الطبيب مع الأم التى تضع يدها على
صدرها وتردد الحمد لله، تعود الممرضة لتضع لهم محاليلًا تضم

بعض المسكنات ليغفو كلاهما مرة أخرى.

تمسك شدا يد الممرضة وتجذبها.

-ممكن أسألك سؤال؟

-آه طبعا.. أنت كويسة.

-هو في هنا في المستشفى واحدة ست عجوزة اسمها كريمة.

-لا مش عارفة.. اسمها بالكامل ايه وأنا أسألك.

-معرفش.. بس هي سمراء شوية وجوزها قاعد جنبها على طول
وابنهم اسمه عاصم.

-مش فاكرة حد بالمواصفات دي.

-طب ممكن تبقى تسأل لو في حد بالمواصفات دي موجودة.

مرت ساعات وشدا في نومها وما إن استيقظت حتى وجدت الممرضة
جانبتها تنظر إليها بخوف، بهمس مالت عليها:

-أنا سألت، أنتِ كنتِ تعرفيها.

بوهن شديد:

-لا... مش عارفة يمكن كنت بحلم... هو مفيش حد هنا دلوقتي؟

-لا كان فى .

-عايز أشوفها ينفع .

-مش هينفع أصلها كانت هنا من يمكن خمس سنين وماتت .

يسير المسكن فى أوردتها وتغفو شدا مرة أخرى .

تعود السيدة كريمة وفى يدها كعكة كبيرة عليها قطع من الفاكهة
وهى تنظر إلى مرزوق .

-أنت كنت مسافر ليه؟

-كنت عايز أعيشهم كويس .. أصل احنا غلابة قوى يادوبك الرزق
على قد اليوم بيومه، ماحدش من البنات اشتكى بس مراقى كانت
بتشجعنى عشان نشوف سكة نجيب منها فلوس بس مش ذنبها أنا
الى وافقت إننا نهرب .

تضع كريمة الطبق أمامهم .

-وأنت مارضتش ليه يا ابنى؟

-كنت راضى ... بس الفقر والزن على الودان ... أنا مش عارف ليه
ربنا بيعمل كده فى الواحد رزق مفيش والصحة فى النازل والعيال

كمان... الدنيا كانت تعبانى قوى مع إنى كنت راضى.

تنظر كريمة إليه.

-تعرف يا مرزوق إن الدنيا مش دار عدل ولا دار بيتقسم فيها بالتساوى ولا رزقك متقسم بين صحة وستر. الدنيا دار ابتلاء، كان لازم تستحمل، كان لازم.

يأخذ سعيد قطعة من الكعكة وهو يضحك بسخرية على حوارهم.

-أنا آسف يا حاجة بس لو كده.. يبقى ربك ظالم.

تنظر كريمة بحده إليه.

-لا مش ظالم... وربى وربك واحد وعادل.

-طب ماتزعلش منى أنا آسف... بس هو فين العدل؟

-الدنيا دار شقا يا ابنى.. تخلف عيال وتفارقهم أو يفارقوك تبقى غنى وبعدها تفلس مفيش سعادة دائمة ولا حزن دايم، الأيام بتجرى ورا بعض أنت فاكر من سنتين زعلت كام مرة وحزنت كام مرة.

-حزن وسعادة ايه يا حاجة... ليه فى ناس فقيرة ومريضة وحياتها سودا وتلاقى شيخ جايلهم يقولوهم اصبروا... يصبروا ليه وعشان ايه؟

-مش يمكن يكون لهم الجنة؟

-ومين قالك أساسا إن فى جنة؟

-ومين قالك يا ابنى إنه مفيش؟

-يبقى احنا متفقين محدش عنده دليل.

-هو فى دلائل بس خلينى أقولك لو طلع مفيش حساب وجنة ونار بالنسبة ليه عادى إنما لو طلع فيه حساب بالنسبة لىك مش هيبقى عادى.

-يا ست أم عاصم أنا راجل هلاس ومبسوط.

-أنت مش مبسوط... أنت من كتر كسرتك عامل فيها مبسوط.

-أنا مش مكسور أنا عايز آكل من الكعكة دى.

بدأ شعور الغثيان يقل عن ذى قبل، يستيقظ نادر اليوم وعلى وجهه ابتسامة لم يشهدها منذ زمن طويل ترك النافذة مغلقة فى طريقة إلى حمامه الساخن ورغم قصر المسافة إلا إنه أخذ دورتين كتلك التى كانت ترقص دنيا، نظر إلى صاحبة الوجه الضبابى وألقى لها قبلة فى الهواء.. يبدو أنها لم تعد تثير فيه حيرة، قبل أن يبدأ نظر إلى وجهه

في المرأة وفي لحظة قرر أن يزيل الشعر الذي يغطي وجهه.. ظل لفترة وهو يحاول أن يبحث كل الشعيرات حاول جاهدا أن يتذكر ملامحه لم يتردد وهو يحدث نفسه «طب ما أنت زى القمر أهو أنت هربت ليه من الناس» وقف نادر تحت الماء الدافئ وأغمض عينيه واستمتع بملامسة الماء لبشرته.

يحدث نادر نفسه « ما هذا ألم أحلق ذقني مرتين من قبل؟ هل هي هلاوس أخرى؟ نعم أنا أزلت شعري من قبل وكل مرة أظن أنها المرة الأولى»

أخذ نفسا عميقا حتى كادت المياه أن تقتحم رثتيه، توقف للحظة وهو يحدق في شكله في المرأة، بدأت تعود له ذكريات، كانت هي.. تذكر، ارتدى ملابسه سريعا وخرج أمام مشتلته، تذكر لماذا زرع تلك الشجيرات، أخرج كل عدته وبدأ في تهذيب الأغصان أخذ ينهك نفسه في تفاصيل، كان لا بد أن يهرب.....

هناك صوت أنين يتردد ليس في رأسى، لا تستمع إلى شىء عليك أن تعود إلى نقطة البداية، أنا لا أريد العودة فلتنفضل مرة أخرى عن عالمك، لم اقوى من قبل أن أجاريهم كانت الحياة تستمتع بإذلالى، صورة خارجية رسمتها لنفسى حتى ظن الجميع أنني أعيش في حياة مترفة، اللعنة على الأحكام التى يطلقونها عليك لمجرد أنهم رأوك مبتسما، الصوت يرتفع لا يمكن تجاهله، فى خطوات بطيئة اتبعت

مصدر الصوت حتى رأيت شدا تجلس في غرفة مظلمة في زاوية، رحل كل همي وأنا انظر إليها مشفقا على حالتها، اقتربت بهدوء....

-مالك يا شدا؟

انطوت أكثر في الزاوية، حاول أن يخرجها من حالة الحزن، لم يلمسها أو يتحدث فقط جلس قليلا بجانبها وبعد لحظات.

-أنتِ ليه قاعدة في الضلمة؟

أخذت فترة حتى أجابته وهو يضيء الغرفة بكشاف صغير وينظر إلى وجهها.

-أنا طول عمرى عايشة في الضلمة، طول عمرى خايقة.. اسمك نادر صح؟

-أيوه صح.

-أنا هقولك يا نادر، أنت شكلك صغير مش كبير.

-احنا هنا كلنا في نفس اللحظة مع بعض مفيش كبير وصغير، خايقة ليه؟

نظرت شدا بعين واهنة وميل بالعنق بالكاد تحافظ على توازن رأسها.

-أنت عمرك حسيت بالوحدة وأنت وسط الناس؟

-أنا مش باحس.. أنا سبت كل حياتي ومشاعري وجسمي أنا هنا أنا وبس.

اعتدلت في جلستها وضمت قدميها إلى صدرها.

-أقولك.. الوحدة دي كأنك محبوس جوا جسم حد تاني غيرك مش شايف الناس اللي هو شايفهم، مش قادر يستوعب الابتسامات اللي حواليه مش قادر يتحب.

يغمض عيناه وهو يردد في صوت خافت «أنا كان مالى بكل ده» ثم يسألها:

-قصدك شخص مش قادر يحب.

-لا زى ما أنت سمعتها مش قادر يتحب... أنا أو الشخص اللي محبوسة جواه مش قادر يتحب، الضلمة هي الحل الوحيد للهروب من كل ما هو واقعي قدامك ونفسك يختفى، عايز الوقت يكون واقف ويكون ضلمة، الوحدة مش إنك لوحذك، الوحدة إنك محبوس لوحذك جوا شخص مش بتحبه، شخص بيشوف كل حاجة وحشة أو مش عايز يشوف أى حاجة حلوة، أنا جوايا شخصية تانية بتتحكم فيا، شخصية مش عايزة تحب أو تتحب.

-هو أنت مش بتحبي أخوكي؟

تنظر شدا بدهشة.

-أنا بحكيك كل ده وبتسألني بحب أخويا ولا لأ؟

-أصل اللى بيحب حد أعتقد مش بيكون وحيد.

-أخويا أنا بعشقه بس ايه العلاقة، أنا تعبانة وهو نفسه مش عارف يعمل ايه.. أنا اتبرعت له بحتة منى عشان أفضل جواه إنما أنا عارفة أخرى ايه.

-ازاى عرفتى؟

-أنا مش موجودة فى الحقيقة أنا مش عايشة غير مع أحلام مش بشوف غير الوجدع بس باحس بالراحة فى الوحدة عشان كده أنا لازم أهرب.

-أنتِ ليه مش بترتاحى غير لوحديك.. أخوكى موجود.

-هو ده بالظبط... أنا مش لوحدى وعازية أكون لوحدى... وقررت إني أهرب.

-مفيش حد يقدر يقرر هيموت امتى.

-إلا لو هانتحر!

-ولا الانتحار... لو مش مكتوب إنك تموتى مش هيحصل.

-أول واحد أكلمه على الانتحار ويرد الرد ده.

-أصل أنا فكرت فى الانتحار مليون مرة قبل كده وبالمناسبة أنا برده
حسيت بالوحدة بس لما....

أخذ نفسا عميقا من صدره وبكى بشدة يبدو إنه قد بدأ يتذكر،
لم تسأله شدا عن شىء فقط وضعت رأسه على كتفها وتركته يبكى.

فتح نادر عيناه وهو فى غرفته ينظر إلى صورة صاحبة الملامح
الضبابية وخلفه وقفت دنيا أمسكت يده برفق.

-ايه افتكرت؟

-أنا افتكرت كل حاجة لما شدا.....

ينظر حوله وهو يتذكر إنه كان مع شدا.

-هى فين شدا؟

ضحكت دُنيا.

-يا ابني هو أنت لسه مش واخد بالك...

-واخد بالى من ايه؟

-افتكرت ايه قولى؟

-أنا افتكرت صاحبة الصورة دى وافتكرت اسمها.

أصوات تتردد داخل رأسه « هاتوا الدكتور... عينيه مالها.... بسرعة
الدكتور»

تتدفق الذكريات، الأشواق، مشاعر الحب المتوارية خلف حد منيع
من النسيان، تقسو الساعات عليك وأنت وحيد تتذكر الابتسامة،
تتذكر روحها التى استوطنت روحك، تتذكر فرحة عينيك فى لحظة
الالتقاء بعينها، تتذكر العمر الذى تمنيت أن تعيشه معها، تتلصص
على كل ذكرى معها وأنت دونها، دقائق غريبة تمر بساعات لا تمر
كسنوات، الذكرى مؤلمة إحساس العجز فى عدم الوصول إليها، تمر
الدقيقة الأولى تتذكر أول لقاء كانت طفلة خميرية مفعمة بالحياة
كانت تكفى تلك اللمسة الأولى نظرة خجلها الأولى شعورى الأول
بالاحتواء شعورنا الأول معا، مرت سنوات أمامى هى كبرت نحتت
ملاحمها الأنثوية وكبرت مشاعر الغيرة، رجولة زادت مع كل لمسة
من لمسات الأنوثة عليها، الدقيقة الثانية كبرياء جمالها وأنا أقف
من أعلى نقطة أتحدى بجمالها الواقع، لا زالت الدقائق تمر ببطء ولا
زلت أنظر إلى ضبابية اللوحة رويدا رويدا بدأت فى استعادة ملاحمها،
لونها الخمرى، عينيه، غمازات، طابع الحسن، أنفها كل شىء بدأ
يتضح، افتقدتها بشدة شعور العجز لا يزال يلزمنى كيف أعود

ولماذا؟ كانت الصدمة التي أتت من ضلعها الذي اعتقدت يوماً أنه سيكون لك، الحمل الذي تركته تحت هذا الضلع، الحنان المفقود إلا من راحة يدها، شعرها المفروود على كتفي وهي تستند برأسها، قواي خارت مني عبر سنوات.

هل أذكر اسمها، دعوني قليلاً لكي آخذ القرار.... ممممم...
سأخبركم!

نادر

اسمها نور كانت.. لا لم تكن فقد كانت ولا زالت نور أضفى على حياتي متعة في ظل الإخفاقات التي عاشتها الأسرة، نور كانت «بنت الجيران» لكنها كانت مختلفة منذ اللحظة الأولى لرؤيتها لم تفارقني راحتها أبدًا، كان لها عبق يشعل لهفة داخلي يكفي أن تصعد على السلالم قبلي بلحظات لأكتشف أنها كانت هنا، كانت رؤيتها حياة جديدة كل يوم، وكانت ابتسامتها نور، امتلكت فيها كل شيء لا تستطيع هي إخفاؤه، شكلها، حضورها، راحتها، شفتاها وهي تقاوم الابتسامة كلما رأتني أمامها، بالتأكيد في تلك الفترة لم أخبرها عن مدى الحنان الذي يسيطر على كلما رأيته، لم أخبرها قط أنني كنت انظر إلى السماء ليال طوال وأنا أصل بين النجوم لأرسم وجهها، نور كانت كل المشاعر التي افتقدتها من هذا الأب والتي لم تقوى والدتي أن تعطيني إياها وهي تركض من أجلنا، كانت بنت الجيران الأجل، أتذكر أول مرة موجت فيها شعرها وتركته ينسدل على أطراف كتفيها ولمعة لون عينيها العسليتين أنارت خمرية بشرتها، لم أقوى يومها على إخفاء مشاعري واستسلمت وأنا بين يديها وأخبرتكم كم كانت جميلة وأخبرتكم أنني أعشق عبقها، عطرها.. أعشق اللحظة التي تمر

فيها من أمامي، أخبرتها أنني أعشق كل شيء حولها، نعم استسلمت وأخبرتها بمشاعري لكنني لم أستطع أن أعكر صفو حبي لها بان أخبرها كم أنا أحبها، أمسكت يدها وتركتني وهي تنظر بذهول إلى كم التوسل الذي يخرج من عيني، لم تقاوم وإنما خرج لحن عذب من أحبال صوتها:

- أنت ماتعرفنيش!

لا لم أضحك أو أبتسم فقط لم تترك عينيّ لون عينيها ولو للحظة.
-أنا عارفك والله كويس جدًا.

رفعت كتفيها بتعجب لكنها لم تسحب يدها.

-عارفني منين؟

-عارفك من الحكايات عارفك من كل مسافة وقفت فيها بعيد عنك
عشان أشوفك، عارفك من كل قصة حب أنا قريتها أنت كنت فيها،
عارفك عشان كل يوم كنت برسم وشك بين النجوم.
ابتسمت.

-ايه كلام الأفلام ده؟

كادت قواي أن تنهار لكنني تماسكت

- ما هو أنا عرفتك من كل فيلم.

سحبت يدها ثم رفعتها من جديد كأنها تلقى التحية.

-اسمى نور.

نعم كما تفكرون لقد كنت ضعيفا بين يديها، كان هذا اللقاء الرسمى الأول بيننا، التاريخ الذى دونته كبداية للحياة، كانت هى الحلقة المفقودة فى حياتى، مشاعرى، احتضنتنى، كنت استمع إليها وهى تشكرنى على المتعة المفقودة لسنوات، نور كانت كل شىء، لا نور كانت أشياء لا يكفى زبد البحر أن يخبركم عنها، يجب أن تعلموا أن هناك حب بهذه الصورة، لكن لا أحد يدرك مدى هذا الحب، يبدو أنها ظنت أننى أبالغ فقط ولكنى كنت أحبها.

وضعت دّنيا يدها على رأسى.

-أنت سخن كده ليه؟

-مش عارف.. يمكن عشان افكرتها؟

-ولا عشان بدأت تفتكر؟

-من ساعة ما جيتى وأنا حالى اتشقلب... أنا كنت مرتاح.

-عمر الهروب ما كان راحة.

يقف سعيد عند طرف الباب وهو يصفق.

-الله على الدراما... أوفر جدا.

-هو أنت عارف احنا فين... يالى بتتريق عمال على بطل؟

-أنا مش أهبل يا دنيا، كل الى هنا هربانين كلهم.

-لا طبعا مش كلهم .. يعنى تيته كريمة هربانة من ايه؟

-تيته كريمة ههههه... هربانة من الناس الى بتحبهم..غالبا
بتعودهم على البعد... أنانية ومش عايزة تستمتع معاها بآخر أيامها.

يعتدل نادر فى جلسته.

-سعيد هو أنت جبلة فعلا؟

-لا.

-طب أنت جنس ملتك ايه؟

-بنى آدم.

-سعيد أنت مسلم ولا مسيحي ولا يهودى ولا بتعبد العجوة؟

-هو ليه كلکم بتسألوا السؤال ده ليه؟

-أصلک تايه يا سعيد... باين قوى إنک تايه وفكرة إنک عمیق أو
عايز تعمل عمیق مش واکله معايا.

-وتاکل معاک ليه.. هتفرق معاک لو كنت بأعبد عجوة أو بأعبد
ربنا؟

-أنت ايه يا ابني ايه؟

-أنا اسمی سعيد.

يضحک نادر وهو يقول «أهلا سعيد».

-أنا جنس ملتی تعب، تعب من الروتين وتعب من الدوران في نفس
الدائرة المفتوحة الى مالهاش حدود، أنا عايز أعيش تافه وابقى
مبسوط، عايز لما أغلط محدش يقولی إني کافر وبره الملة، عايز
أقعد مع ستات وأنام معاهم کمان وعايز آکل كثير وعايز أضحک
وعايز مبقاش مربوط، أنا عايز أفضل أجرى إلى ما لا نهاية، بس أنا
خايف لا کون باجرى على جهنم أنا خايف أرفض وجود جهنم بس
عايز أعمل کل الى أنا عايزه، بس أنا باجرى وعايز آخذ کل حاجة مع
إني مش قادر افتح عيني في النور، أنا... أنا عايز أعيش مبسوط.

عدد من الأسرة يرقد فوقها مرضى كثر، مرزوق وحيداً في سرير في آخر الغرفة، رأسه متورمة نتيجة اصطدامها بإحدى جنبات المركب بعد انقلابه، غيبوبة شبه كاملة إلا من كلمات يرددها، ينادى على ابنته الصغرى، اعتاد أن يلعب معها في حقل خلف منزلهم الصغير، كان منزلهم بلا سقف عذبتهم الأمطار كثيراً وقبل محاولة هربه مع أولاده وزوجته تبرع أحد الأشخاص فصار للبيت سقف، كانت المرة الأولى التي يشعر فيها بالأمان، كان مرزوق ميسور الحال، باعتبار إنه يكفي أسرته المكونة من خمس أفراد هو وزوجته وبناته الثلاث، لكن الحال لا يدوم لم يعد قادراً على تحمل مشاق الحياة فقد عمله دون سبب، صار بلا عمل ثابت فقد عمله لكنه حافظ على روحه، اعتاد أن يلعب مع الصغيرة يحملها فوق كتفه ويجرى كانت تستمتع بالهواء الذي يطلق لشعرها العنان وهو يطير، ترفع يدها تلامس أفرع الشجر المتدلية، تمسك في رأسه أو من شعره حتى لا تسقط ضحكاتها كانت تشبع روحه يتذكر كلماتها الأخيرة ويردها رغم حالته الآن، يتذكر تلك اللحظة وهو ينادى على زوجته «امسكى البت كويس» لحظة الرعب وهى تصرخ «آبآآآآآآ» وهو عاجز عن الوصول إليها، تصرخ مره أخرى «الحقنى يا آبآآآآآآ» يصرخ هو الآخر لا جدوى من صراخه، يتذكر الحلة وهو يضرب بقبضتيه الماء بقوة بحثاً عن حلم ضائع وسط أمواج بحر في ليلة معتمة، يضرب كل شىء وصوتها يبتعد تدريجياً، يصرخ عليها يصرخ على زوجته، ابنته

الوسطى كانت عروس جميل أنثى منذ صغرها تهتم بشكلها ونظافتها رغم أنهم لا يمتلكون من المال الكثير إلا أن لباسها كان مهندما، ترتدى فى قدمها نعل لا تحب أن تتسخ قدمها كانت تستحم كل يوم، تصفف شعرها قبل أن يسقف منزلهم، كانت تحاول دائما أن تصنع دروة صغيرة فوق مكان نومها، مكانها كان مرتبا هادئا كملاصحتها، ذكية كانت تردد دائما أنها من المؤكد ستعوض والدها عن لحظات شقائه، فى اليوم المشؤم وقبل الحادث مالت على كتف والدها وقالت بصوت ضعيف «بلاش يابه... نرجع أنا خايفة» كان هو أكثر خوفا منها حاول أن يبدو متماسكا إلا أنه كان يشعر بخوف المدفون حيا فى قبر، لم يتذكر ماذا قالت إنما شعر بها فى لحظة وهى تحاول أن تجذبه من ثيابه يعلم يد ابنته الناعمة رغم قسوة الظروف لمست رقبتة وهى تحاول أن تجذبه، كانت تريد أن تتمسك به، لا تريده أن يبتعد، الكبرى كانت البندول الذى يدق لينظم كل شىء، خطبت قبل سفرهم لرجل قتل غدرا وهو عائد من عمله، صدمت توقف بندولها عن الحراك اختفت حمرة الوجنتين التى زينتها منذ أن كانت صغيرة، اشتاقت للموت، هل وصلت إليه الآن هل ارتاحت، لم توافق أو ترفض على فكرة الهروب كانت منساقه، ظنت يومها أنها نهاية الحياة، كان صوتها الأقوى والذى ظل يسمعه بعد غرقه «امسك كويس يابه.... امسك كويس.... أنا ماسكه أخواتى... أمى معاك»، اذا لقد رحلوا بين يد أختهم الكبرى هى قوية من المؤكد

أنها لم تفلتهم، رحلوا وهم في حضنها، كان على أن أوفر لهم شيئاً من الأموال كانت الحياة قاسية، ضيق ذات اليد جعلني عاجزاً ولكني لم اكن قد اختبرت العجز الحقيقي بعد.

يفتح الباب بهدوء، الغرفة مرتبة بعناية، ثلاث أسِرَّة، ورابع كبير، يشير مرزوق إلى نادر.

-افضل يا نادر .. ولا اقولك يا أستاذ ما تاخذنيش .

-لا نادر.. تمام.

-محتاج حاجة؟

نظر إلى الغرفة بذهول... لا يمكن أن تكون مساحتها هكذا من الخارج هي أضيق بكثير.

-هي أزاى أوضتك واسعة كده؟

-أنا حابب تكون كده، في مكان لكل حاجة.

-بس مش باين؟

-يا أستاذ نادر..

-نادر... قولى نادر.

-ميصحش حضرتك شكلك..

-ماله شكلى.. أنت قد أبويا الى أنا ماشفتوش.

-هو ميت؟

-لا.. بس هو سابنا.

-ليه؟

-ظروف... هو أنت بتلم حاجاتك ليه؟

-أنا ماشى مش هقدر أقعد بعيد عن عيالى أكثر من كده.

-هترجع...

-لا خلاص مفيش رجوع؟

-أنت منين؟

-أنا من أسيوط.. عزبة ابو القاسم.. لو حابب تيجى تزورنى أسأل

عليا عند مسجد الحظايزة.

-مسجد ايه؟

-الحظايظة.. مع إن بختنا مايل!

-ربنا يصلح الحال... أنا معطلك؟

-لا مش معطلى كده كده أنا قربت أمشى أمتى مش عارف بس أكيد هامشى.

-أنت ايه اللى جابك هنا يا حج مرزوق.

-حاول أن يهرب من الإجابة واستدار وهو يعيد ترتيب أشياء هى من الأساس مرتبة لكنه التفت وهو يبكى.

-تعرف يا أ. نادر الستات مخلوقين ليه؟

-عشان نتجوزو...

-لا.. لا مش ده قصدى.

-قصدك ايه؟

-اعذرني يعنى لو اتكلمت بجهل بس ده اللى أنا حاسه.. أصل أنا مش متعلم بس البنات الثلاثة كانوا بيتعلموا.

-لا يا حج حضرتك على رأسى.

-الستات موجودين عشان يعدلوا المايله، يعنى لما يلاقوك بتقع

يقفوا سندك، لم يلاقوك هتنخ تقوم زعابهم عشان تفوق، لما يلاقوك
شايفلك شوفة يسودوا عيشتك، الستات موجودين عشان يبقوا ظهر
عود صلب واقف ورا الراجل مثبت رجله، الستات يا نادر موجودين
عشان يبقوا الحضن الى آخر اليوم ترجع ترمى نفسك فيه عشان
ترتاح، الستات يا بيه مش نص المجتمع بس الستات هم المجتمع،
عارف أنا لما جبت البنت الثالثة الناس كانت فاكره إني هزعل بس
والختمة الشريفة ما حصل، أنا يومها كان قلبي مسنود وواقف بقول
ربنا اداني اربع عواميد صلب اتسند عليهم، بس تعرف بقى على قد
ده كله لو الست قررت ماتكونش سند الراجل بينخ ويقع، زى الى
حصلى كده.

يشير مرزوق إلى نادر بالجلوس ونادر يسأله:

-هو ايه الى حصل؟

-أنا مراتى كانت سند، نخلة واقفة ومحاطة على البيت، احنا لا مؤاخذة
ماكنش عندنا سقف بس ياما شفتها مغطية العيال بصدرها، كانت
سند ليا وسعادتي ومتربعة على قلبي، كانت تاكلها بدقة أو حتى تنام
جعانة ماشفتش فى عينيها يوم اعتراض بس ولاد الحرام بقى.

يبدو على نادر الإنصات الشديد

-زنوا فى ودانها على موضوع إننا نهرب فى مركب، ستات سو شغالين

مع رجالة نصابة، زنوا ياما على ودانها، والزن سحر والله سحر، أوعى
تكون مش مصدق ده متقال فى القرآن، سحروا لها وفى يوم وليلة
السند بقى سهم مغروز فى ضهرك، ويوم مع يوم أنا ببقى أضعف،
يوم عن يوم بتقرب لولاد الأبالسة أسلاف الشيطان دول وهى بتغز
فى ضهرى، بعث كليتى بعث واحدة بخماستاشر ألف جنيه والله ما
خدت منهم شلن هى خدتهم ودفعتها للمركب.

يقف مرزوق فى وسط الغرفة وهو يصرخ بقوة:

امسكى يا بت فى أختك أمسكى العيال يا وليه.

-أنا عيالى ماتوا وأنا مش عارف أنا قاعد ليه، أنا.. أنا فى صوت فى
رأسى صوت جامد قوى.

-مالك يا حج مرزوق مالك؟

اسمع معايا كده.

» تاريخ الوفاة السابع عشر من يناير «

أشعر بالغثيان هذ هو حالى كل صباح، لا أتذكر متى أغفو أنا فقط
أستيقظ، لماذا أشعر بثقل فى صدرى.

يعود نادر إلى ممارسة طقوسه اليومية، «يشنكل» شيش النافذة يقف قليلا وهو يتأمل حبيبات الأتربة المنيرة على طول خط شعاع يتسلسل من النافذة يضع يده بينهم ويحركها يستثير الأتربة أكثر تدور أسرع يبتسم، يخلع كامل ملابسه يضع رأسه تحت الماء الساخن يغلق عينيه وينظر إلى أعلى، تصطدم قطرات الماء بوجهه تشعره بنشوة يفتح فمه يدخل الماء لا يبتلعه ويتركه ينهمر على وجناته، يسمع صوت فوران الماء يخرج سريعاً يضع معلقتين من الشاي ويترك الماء يغلي لدقائق ويصب فوقهم اللبن وثلاث ملاعق سكر ترك الخليط على النار لدقائق ثم وضعه في كوب، وقف أمام مشتل الصغير ونظر أمامه، نظر إلى الكوب الفارغ وإلى الغرفة المحيطة، تضع دنيا يدها على كتفه يبتسم وهو يميل برأسه على يدها.

-أنا مبعثش أستغرب أنت بتيجي أمتي أو بتمشي أمتي؟

-ايدى يا أستاذ.

يرفع نادر رأسه ويلتفت إليها.

-فين الفستان اللي كنتي لابساه؟

-لا ما هو مش كل شوية... وصلت لحد فين.

-فى إيه؟

- فى الرواية الى أنت لسه هتكتبها عنى .

-أنا غلطان من اليوم الأول الى

-نادر أنت بقالك قد ايه هنا!!!

- كثير .

أشارت بيدها نافية .

-مستحيل تكون كثير... أنت لسه جاى هنا .

-أنا حاسس إن بقالى عمر .

-الإنسان ممكن يتعود على أى مكان جديد فى أقل من يوم.. وكمان ممكن ينسى القديم... بالمناسبة أنت الى كتبت الكلام ده مش أنا .

-دنيا... هو أنت حقيقة؟

-لا كارتون .

يصطنع الضحك وهو ينظر إليها بسخافة .

-طب سؤال بجد من غير ما أقصد بيه حاجة..

-قول.. أكيد مش هتقول أكثر من الى أنت قلته عنى .

-أنتِ لسه متجوزة؟

-لا يا نادر.. أنا اطلقت.

-جوزك طيب كان كويس ولا كان وحش؟

-السؤال ده أنت أبقي رد عليه... وعلى فكرة كل الاحتمالات وارده
الى من ضمنها إن احنا الاثنين وحشين

-بس أنا مش شايفك وحشة!

تدخل الغرفة وتجلس على الكرسي أمام اللوحة.

-أنت أساسا ما شفتنيش عشان تحكم، أحكم عليا لما تشوفني
قدامك وأنت مكسور ومن رد فعلى هتعرفني، أحكم عليا لما أكون
ضعيفة وباستنجد بقشاية، أحكم عليا لما تعيش معايا لحظات
وجع مش لحظات فرح، احكم عليا لما تغلط وتشوف رد فعلى
ايه، احكم عليا لما تشوفني بعد سنين حمل وأنا قد الحمل ده ولا
لا، احكم عليا لما تعرف كل تفصيلة أنا عشتها، احكم عليا لما
أكون فى ضهرك ممكن أكون سنداك أو بشدك عشان تقع، أنت
ماشفتنيش يا نادر.

-ايه أنا الى كاتب الكلام ده كمان؟

-لا ده كلامى والى أنت هتكتبه.... نادر أنت متعرفنيش ماتحكمش عليا.

-مش ممكن تكونى السبب فى إنى أرجع تانى للحياة؟
وقفت دنيا وهى تنظر بحدة.

-بص حتى لو أنا هاكون السبب إنك ترجع إياك أنت تكون السبب فى إنى أرجع إياك.

صوت طرقات على الباب ثم تدخل شدا.

-أنا سمعتك وأنت بتقول هترجع.. ممكن طلب؟
التفت نادر إلى شدا.

-شدا. أنتِ كويسة؟

-آه أنا تمام.

احتضنتها دنيا وسألتها:

-هو أنتِ حزينة ليه؟

-أصل أنا هسيب أخويا.

-هى مش العملية نجحت؟

-عملية ايه... العملية نجحت من عشر سنين فاتوا!

تفحص نادر في ملامح شدا وجد أنها لم تعد صغيرة كما كانت، على مضض تفحص جسدها وقد صار له ملامح.

-شدا أنتِ كنتى...

-مش مهم كنت ايه.. المهم حضرتك لما ترجع هتروح لشادى أخويا وتبلغه إنه ممكنش فى ايده حاجة يعملها بسبب الى أنا كنت فيه.

-شدا أنتِ مشفتيش الى كثير شافوه.

-مش دنيا لسه قايلالك متحكمش على حد؟

-مش باحكم.. أنت زعلانة ليه طيب؟

-أهى ده الحاجة الوحيدة الى معرفتهاش من وأنا صغيرة، أحلامى دايمًا أكبر من الحقيقة، باحلم طول عمرى ببحيرة قدام بيت واسع وبحلم انى سايقة موتوسيكل بسرعة أكبر من الى ممكن يمشى بيها، باحلم إنى دايمًا باطير بس أخويا هو الى كان مانعنى، هو ماقاليش ماتعمليش بس أنا فضلت عايشة الحياة العادية عشان ماسبهوش لوحده، هو كان تعبان ودلوقتى خف، أنا ضحيت من زمان.. على فكرة أنا المفروض كنت أمشى من زمان عشان أنا مش عارفة

أعيش زى البنات.

-شدا أنتِ هتنتحري؟

ابتسامة حزن ارتسمت على وجهها ولم تجب.

-يعنى أنتِ دلوقتى..

-مش مهم دلوقتى أنا فين....

ينظر نادر إلى دنيا.

-أنا مش فاهم حاجة.. أنا ليه هنا طيب؟

لم تجبه دنيا ونظرت إلى شدا.

-يوصله ازاي؟

-أنا بلغت شادى إن فى حد اسمه نادر هيجيله فى يوم... شادى
صحفى مشهور دلوقتى اسمه شادى الدرينى... هتعرف توصله.

-أنتِ عايزة نادر يقوله ايه؟

نظرت إلى نادر.

-قول له... إنه مكانش ينفع أفضل طول عمرى محبوسه جواه،
مكانش ينفع أفضل كل عمرى خايفة يتوجع عشان أنا بتوجع قد

وجعه عشر مرات، ربنا خلقنا كده، احنا روح واحده فعليا بس اتركب لها جسمين ومشاعر مختلفة ونفسييتين عكس بعض، قول له إن فى حته من جسمى جواه فأنا هفضل دايمًا معاه بس قوله إني مبقتش قادره على إني أضحي أكثر من كده، روحى هتفضل معاه إنما الباقي مش بتاعه ولا بتاعى وأنا مش قادرة على الحمل مش قادره على نفسى ولا جسمى ولا مشاعرى ولا قادرة أفضل فى ضهره ومش عايزة أكون نقطة ضعف له، قول له إني مشيت ومستنياه بس مش دلوقتي خالص وقوله لو خلف بنت ما يسميهاش شدا، يسميها أى حاجة غيرى لازم تكون غيرى.

حلقة جاف تمامًا، يفتح عيناه وهو يحاول ضم يده، يتحسس أطرافه لا يرى بوضوح، يغمض عيناه قليلا ويفتحها مرة أخرى يتحول النهار إلى ليل يخفى ضوء الشمس وتظهر عند طرف الباب وهى ترتدى فستانا ورديا يخفى تفاصيل جسدها ويبرز ملامح أنوثتها، لا لم ينظر إليها بشهوة إنما تلك النظرة التى بُنى الكون عليها، نظرة الرجل ليخبر أنثاه كم هى رائعة، نظر إليها وهو فى كامل حلته، اقترب منها بحذر، اقتربت هى دونه التقت أنفاسهما، ضحكت.

-أعملك شاي بلبن؟

ضحك هو الآخر.

-لا مفيش ده تانى.... أنتِ جميلة قوى النهارده.

-أنا خلاص أنا كمان ماشية.

-رايحة فين... لا ماتمشيش أنا هجيلك فى أى حته.

-نادر احنا متفقين إنك ماتجنيش.

-مش مجبك، بس وجودك مريح قوى وجودك محسنى باني ممكن
يكون ليا مكان.

وضعت يدها على كتفه.

-ترقص معايا؟

-دلوقتي وهنا؟

-مفيش وقت تانى بقولك ماشية.

-قصدك راجعة.. هارجع معاكى.

-لا مش راجعة أنا ماشية.

-طب خليكى هنا.

-لا هامشى وأنت لما تيجى تكتب عنى، قولهم إن دنيا كانت مجنونة وعشوائية بس طيبة وعاقلة، قولهم إنى مسامحة كل الناس، قولهم عادى هى كانت صادقة وكدابة وملعونة والبركة بتحل على أى مكان تروحه، قولهم إنى مكنتش عايزة حاجة من حد ولا كنت عايزة حد يجرى ورايا، قولهم انى كنت موجودة بينهم وهم سابونى أضيع، قولهم والنبي انى مش وحشة، قول لسعيد إنه محدش يبجى ورا السعادة فى صفايح الزبالة، ارقص معايا.

وضع يده على خصرها وجذبها لكنها تركت مسافة.

-نادر اكتب عنى أنا عارفة إن جواك كلام أكثر بكثير قوى من الى ممكن أقوله، مش عارفه ممكن نتقابل تانى ولا لا، مش عارفة ممكن ربنا يغفر ليا ولا لا، هتوحشنى قوى وابقى ادعيلى كثير، ارقص معايا احضنى أنا خايفة، نادر أنا خايفة قوى.

نبضاتها ترتفع تتصب عرقاً، يضع نادر يده فوق رأسها يحاول أن يمسح تلك القطرات.

-دنيا خليكى معايا.

-نادر أنا مش عايزة أمشى أنا أضعف قوى من إنى أمشى، نادر خليك ماسك فىا جامد.

-أنا مش عارف أعمل إيه.

-أنا بموت.. أنا حاسة إني بتسحب منك قوى، أنا مش قادرة نادر.

يتغير مشهد الغرفة يقف نادر في وسط غرفة على السرير تنام دنيا ترفع يدها إليه لا يستطيع الوصول إليها، تجلس والدتها على الأرض تمسك يدها الأخرى، لا تملك إلا الدعاء تردد الأم «يا رب بنتي» تقف من على الأرض تجلس جانبها تحتضن رأسها «سامحيني يا بنتي» تنظر دنيا إلى نادر العاجز عن الحراك، يدخل طبيب أمامه مسرعًا، لا تقوى الأم على الوقوف ترتكز على كرسي في الركن وهي تبكي بصوت مكتوم تضع يدها على فمها لا تريد أن تسمع دنيا بكائها هي لا زالت على قيد الحياة، يحاول أن يقترب تنظر إليه وتحرك شفتاها.

-أنا قلتلك ماتحبنيش!

تردد أصوات وهي بين أحضانه في غرفته فوق السطح:

-حد يجيب دكتور.

-لا إله إلا الله... يا بنتي.. دنيا!

-خليكي معايا.

-الدكتور جاى يا طنط.

-أشهد أن لا إله إلا الله... يا دنيا فتحي عينك!

ينظر إلى عيناها تسقط يدها من فوق كتفه ويسمع صوتا

«لحظة الوفاة السابع عشر من يناير»

أشعر بالغثيان...

ما هذا الصوت هل هو حلم جديد، أغمض عيني قليلا ربما هو نتاج تلك الهواجس، أين دُنيا هل كانت هاجس بالتأكيد لا هناك شدا قد مرت من هنا ومرزوق أين الجدة كريمة، لا زال صوت الصراخ يعلو من الخارج، لا لن أتحرك اليوم أشعر بالإجهاد منذ أن رقصت معي دُنيا، أين دُنيا! هل رحلت هي أيضًا هل كانت لحظة موتها!!! هل ماتت؟ أين أنا لماذا أستيقظ فقط متى أغفو؟ ما هذا الصراخ، يدخل على سعيد مسرعًا.

-الحق يا نادر... المشتل بتاعك متكسر.

أخرج مسرعًا لا أعلم خوفًا على المشتل والذي لا أدرك لماذا قد بدأت في زراعته أم لأن الفضول كان يقتلني، أشعر بالخوف وأنا

أشاهد شتلاتي الصغيرة ملقاه على الأرض، أشعر بها وهي تموت، أنا خائف للغاية بل أنا مرتعب من فكرة الموت، أعود مسرعًا إلى الغرفة أنام في وضعية الجنين، هي المرة الأولى التي يصارعني فيها هذا الشعور، يرتعد جسدي بدأت في حالة من التشنجات.

أنا أدرك كل التفاصيل التي تدور حولي لكنني أشاهد نفسي من مكان مختلف أنا أرى جسدي المتكور عند زاوية السرير، لوحة معلقة لنور أعلم من هي جيدًا تلك الفتاة التي أحببتها بكل جوارحي وهي لم تبادلني قط هذا الشعور، برواز فارغ فقط لأدرك أنني أعيش حلم لم أستعيد وعي بعد، أنا للمرة الأولى أشاهد نفسي من الأعلى، بالتأكيد هذا أنا لدى حالة من الاستنكار، هذا حقًا شكلي الذي يراه الناس، جسدي ممتلئ قليلًا من الأجانب، شعري ليس بتلك الجودة التي أظنها، تلك العضلات التي كنت أظن أنها متناسقة تحتاج لتدريب بشكل أكبر، ما هذا أصابع قدمي ليست متناسقة على الإطلاق ويبدو أنني بدأت في فقد جزء من شعر راسي، لست وسيماً كما كنت أظن، ما هذا ليست فقط الأطراف الممتلئة، ما هذا!! اللعنة أرى سعيد يدخل مسرعًا وهو يجلس أمامي.

يعتدل نادر وهو ينظر إلى سعيد الذي يتحدث:

- في إيه يا نادر مالك؟

لا زلت أشاهد المشهد من مكان مختلف، أشاهد نفسي وأنا أدير حواراً مع سعيد.

-سعيد أنا خائف.

يأخذني سعيد بين أحضانه ويحاول أن يسيطر على انفعالاتي، قليلاً من الماء ظل جانبي حتى هدأت.

-أعملك شاي بلبن يمكن تهدى.

-سعيد... أنت عندك كام سنة أنت هنا جنبى ليه... أنت مامشيتش زيهم ليه؟

-فى ايه يا نادر... فى حد يسأل شاب حليوة السؤال ده عيب.

-هو ايه اللى عيب؟

-عيب تسالنى...

-أنت مين؟

-سعيد... أنا سعيد صاحب عمرك.

-أنا معنديش صاحب عمر... سعيد أنت عارف أنى معنديش أصحاب... أنت مين؟

لا زلت أشاهد المشهد من مكان مختلف لا زلت على السرير وأنا أحدث هذا الشخص المدعو سعيد لا أرى وجهه بوضوح لحظات ونظر سعيد إلى أعلى وابتسم كانت الصدمة سعيد هو أنا... أنا كنت أحدث نفسي وأشاهدها من مكان آخر.

نظر سعيد إلى نادر.

-أنت كل ده مش عارف أنا مين، أنا أنت يا نادر.

سعيد هو الشخصية التي تمنيت إخفائها طوال سنوات عمرى تلك الشخصية المتمردة الراضة للقواعد، تلك الشخصية التي جعلتني أرتكب من الحماقات ما ندمت عليه طوال عمرى، سعيد هو الشعور الراض لكل ما هو فرض عليا.

-لا أنا مش زيك.

-أنا موجود جواك... أنت اللى خلقتنى.

-أنا مخلصك حد.

-نادر... مش هينفع تضحك عليا أو تكذب مش هتعرف تخبي.

-أنا معنديش أفكار.

يقف سعيد الصورة المطابقة لنادر.

-لا عندك... أنت مش عايز تلتزم بالدين صح وعايز تعمل كل اللي نفسك فيه تحب أقولك حاجة أنت بس اللي تعرفها.

يعتدل نادر في جلسته.

-أنت رافض فكرة ربنا ومقتنع تماما إنه ملوش وجود بس خايف ليكون موجود عشان شهواتك، حلمك إنك ترتبط بأى واحدة وقت ما تحب وتنام معاها وتتبسط وشوية لو ما كنتوش مبسوطين تسبوا بعض، حلمك بالإله العجوة.

يتوقف سعيد وهو يضحك بقوة.

-بس تصدق العجوة حلوة مفيش كلام.

-عادي.. كل الناس بتفكر في حاجات.

-بس مش كل الناس بتسأل هو أنا ليه راسى فى مخ ومين اللي وافق على إنى أحمل الأمانة واتحاسب، مش أنت بتسأل نفسك كده كل يوم ولا فى حد تانى؟

-أنت ماتعرفش حاجة عنى... وماتعرفش حاجة عن تفكيرى.

-بلاش دى... طب أنت مش حبيت نور وكنت مخليها تحبك... خليت دُنيا تحبك ليه؟

أصوات في رأسه ترتفع:

« يا دكتور... يا دكتور... بيتشنج تانى جامد»

« حد يجيب الحقنة بسرعة»

« امسكى ايده كويس»

«نادر... ركز معايا»

«عينه بتستجيب للضوء»

تجلس الحفيدة «نور» على كرسى فى إحدى زوايا غرفة المستشفى تضع سماعات وردية فى أذنها وتمسك فى يدها جهاز كان قد أهدها لها عمها فى آخر زيارة له من الخارج، تستمع إلى البوم عمرو دياب الجديد «تملى معاك» تنظر إلى جدتها التى توقفت عن الحديث مع أشخاص لا وجود لهم، تغلق الجهاز وتتابع حديث جدها إلى جدتها الذى نظرت إليه وهو يتحدث:

ايه يا حاجة هتمشى خلاص... هو أنا أعرف أعمل حاجة من غيرك، يا ضحكة عمرى خلاص، ملعون أبو الزمن اللى يبعدنا عن بعض، مش بأيدى والله إني مكنش معاكى، مش بأيدى إني أسيبك لوحدك بس أنا عمرى مش بأيدى، عارفه لو كان بأيدى كنت اخترت أن

آخر نفس يخرج مننا احنا الاتنين فى نفس اللحظة، يا أم عاصم
يا كريمة يا حبيبة قلبى يا أحلى ست فى الدنيا يا أهلى وناسى، مش
عارف مين من بعدك هيفكرنى بالدواء أنا أساسا مش هأخذ الدواء.
تضع يدها على يده دون أن تقاطعه.

ده أنت الوحيدة اللى بتبقى عارفه أنا محتاج ايه مين هيعمل القهوة
ومين هيحط ايده على زهرى الموجوع ماتخليكى يا حاجة معايا
شوية، خليكى لحد ما أنا اللى أموت الأول، أنت طول عمرك الجامدة
اللى باتسند عليها، رجلك دى اللى مامشيتش إلا عشان سعادتى، يا
كريمة استنى شوية، البنت بنت عاصم شبهك قوى أول مرة شفتك
فيها.

يدخل عاصم فى تلك اللحظة وهو يشير إلى نور بالخروج، يقف عند
رأس والدته يبكى ويغلق عيناها ينظر إليه والده.

-سيبنى لوحدى معاها.

-بابا.. تعالى معايا.

-أطلع بره...

-بابا.. ماما خل...

يقاطعه: -اطلع بره.

يقف عاصم خارج الغرفة قليلا ويعود يضع يده على كتف والده.

-مش يالا يا بابا عشان... بابا.... بابا.

يصرخ عاصم: « إن لله ما أعطى وإن له ما أخذ»... «لا حول ولا قوة إلا بالله»

تدخل نور مسرعة وهي تنظر إلى والدها بذهول فقد فقد والده ووالدته في نفس اللحظة.

« لحظة الوفاة السابع عشر من يناير»

ضبابية في المشهد حولي، ضوء مُركز يضرب في حلق عيني لكنه لا يؤثر بشكل كبير، حلقي جاف ما هذا الأنبوب الخارج من فمي، لماذا لا أستطيع الحراك! أين أنا، ما هذه الرائحة، صوت يتردد بقوة:

-نادر لو كنت سامعني بص على الناحية الشمال.

نعم أسمعك لكني عاجز عن الرد، مستسلماً أحرك عيني ناحية اليمن، يعود الصوت مرة أخرى:

-بص ناحية اليمين.

يضغط بشيء حاد ناحية أذنى اليمنى، أنظر إلى تلك الجهة، استعيد وعي تدريجيًا، يردد هذا الشخص مرة أخرى:

-تعرف تبص على مامتك؟

تتحرك مقلتي بهدوء وأنا أتابع وجوه ضبابية أنا لا أعلم كيف تبدو والدتي جيدًا، تتوقف عيناى أمامها، أسمع صوتها:

-ألف حمد وشكر لك يا رب.

ينظر إليها هذا الرجل الواقف جانبي.

-استجابة كويسة جدًا.. فى تقدم وواضح إنه عايز يقاوم.. نحمد ربنا جدا إنه ما طولش عشان كان ممكن وظايف فى جسمه تتوقف.

-هو هيرجع كويس يا دكتور؟

-مفيش حاجة مؤكدة.. بس خيلنا نحمد ربنا لحد كده.

هى الحقيقة الغائبة، من أين أتيت؟ وأين أنا الآن؟ رحلة عناء منذ طفولتى، لماذا لم أحظى بحب مستمر؟! ما هذا الوهن الذى احتل أوصالى؟ أنا لا أقوى أن أتحكم فى أى من أطراف جسدى، حزن يطغى على كل لحظة سعادة تمنيت يوما أن أعيشها، لماذا الجميع يقف واجمًا أمامى، أين نور لماذا لا أراها؟ نفسى تقاوم مشاعرى، جسدى يقاوم ضعفه لا يريد أن يموت، إنسانيتى تسيطر على المشهد، لا لن

ارحل الآن على العودة، على أن أنهى حياتي بصورة أفضل لن أترك بواقى
منى وحيدة، اللعنة على تلك الدنيا التى لم أشاهد فيها خيرًا، أين كنت
طوال تلك المدة؟ أنا لا أتذكر كيف أتيت إلى هنا، مرارة فى حلقى
أريد أن أشرب لا أستطيع الحديث، لماذا أنا صامتٌ هكذا، المكوث
هنا مستحيل بعد الآن، الكل هنا يأتى ويرحل قليلا منهم يقف أمامى
للحظات لا أعلم لماذا؟ هل يتشفى أحد منى وهو يرانى عاجزًا؟ هل
حان الوقت للمواجهة؟ لا زلت اشعر بهذا الغثيان أصوات تتردد
داخل راسى تعلو رويدا رويدا، من هؤلاء؟ وأين نور؟ أين دُنْيا؟ أين
أنا؟ لماذا لا أستطيع التحدث؟ أدرك كل ما هو حولى لكن ببطء أنا
أشاهد فيلمًا سينمائيًا يدور ببطء شديد، لماذا تضحك والدتى؟ أنا
هنا بلا حراك، أنا افتقد كل شىء هنا، يتحرك الجميع عندما أحرك
إصبعًا أو أنظر فى اتجاه مغاير، لم يتحرك أحد سابقًا عندما سُلت
مشاعرى، عندما أصبت بالاكْتئاب عندما جلست وحيدًا وأنا لا
أدرى كيف أكفر عن ذنوبى... ذنوبى... أين دُنْيا؟

مع الوقت يقل عدد الأسلاك المتصلة بجسدى مع الوقت أستعيد
وعىي تتحرك أصابعى، بدأت أشعر بأطرافي لماذا فى كل مرة يزورنى
هذا الطبيب يضغط عليهم بقوة؟ ما هذا الغثيان المصاحب ليقظتى؟
يمر وقت لا أستطع أن أحصيه وأنا أشاهد الجميع يبتسم فى وجهى،
يمر الوقت وأنا أستعيد فى كل لحظة قدرة كانت من أساسيات حياتى،
لم أتحدث إلى الآن أسمع هذا الطبيب وهو يطمئن أمى فى كل مرة »

ما تخافيش يا فندم هيتكلم.. الاستجابة مدهشة»

يجلس نادر مستندًا مستعينًا ببعض الوسائد، تجلس والدته أمامه.

-ألف حمد الله على سلامتك يا ابني... كنت هموت عليك.

-ماما هو أنا بقالي قد ايه؟

-مش كثير يا ابني... بس وقعت قلبي.

-هو ايه اللى حصل؟

-أنت عملت حادثة.. حادثة كبيرة بس من فضل ربنا عليا إنك دلوقتي بقيت أحسن.

-طيب هو محدش قالك هنمشي أمتي؟

-الدكتور قال بس نضمن إن كل حاجة كويسة... أصل الغيبوبة اللى أنت كنت فيها دى كانت كبيرة... يقولوا معجزة إنك فقت ومن غير أى مضاعفات.

تتركه للحظات وهى تقف مع طبيبه.

-هو كده بقى كويس؟

-آه طبعا كل حاجة سليمة.. بس ممكن يكون في تأثير على المخ
احنا مش شايفينه.

-طيب نطمن ازاي؟

-مع الوقت هنطمن.

أسبوع يمر وفي كل يوم تحاليل جديدة ومع كل تحليل تقل عدد
الأسلاك المتصلة إلى جسدی أستعيد عافيتي بشكل كبير، لماذا هذا
التمسك بالحياة ألم يحن الوقت للرحيل، هل أنا حقًا مستعد للرحيل،
أحدث نفسي كثيرًا في تلك الأثناء أشم تلك الرائحة التي لازمتني
لسنوات على درجات سلم عمارتنا، تقتحم بنورها تلك الظلمة التي
أعيش فيها، أرفع بصری قليلا وبحذر نعم هي نور تقف أمامی.

-نادر أزيك؟

هل ابتسم؟! أم أصب غضبی عليها؟! هل أنهرها أو أحتد عليها؟
خواطر تتوالى في راسی في لحظة سؤالها ولكن كيف لى أن أنهرها لا
زلت ضعيفا أمامها.

-الدكاترة يقولوا إني كويس.

يجلس نادر على طرف السرير وهو يبدي أمامها بعضاً من القوة ربما تكون زائفة لكنه لا يريد أن تراه ضعيفاً.

-طيب الحمد لله إنك كويس.. احنا قلقنا عليك جداً.

-بجد...؟ طيب.

-طمنى عليك!

نظر إليها دون وهن، تبتسم والدته بعد أن عاد بريق ولو لحظى إلى وجهه وتوجه الحديث إليه.

-حبيبى هاروح أعمل أنا اللي قلت لك عليه.

-هتعملى ايه يا ماما؟

-مش فاكرة بس هاروح أنا وخلاص.

تسحب نور كرسى وتجلس فى مواجهته.

-طمنى عليك بقى.. أنت كويس صح؟

-أنا كويس... الدكاترة بيقولوا إنى قوى ومش من السهل حد يقدر يقاوم الى أنا كنت فيه.

تضع يدها فوق يده، يسحب نادر يده بهدوء وهو ينظر فى اتجاه

الأرض.

-أنت مجد كويس .. أنا مش...

يقاطع حديثها:

-لو قصدك على جسمى أنا تمام.. ايدى كويسة أهه كانت صوابى
بتبرد على طول أصلهم بيعلوا التكييف جامد هنا.
يرفع أصابعه أمامها.

-باعرف أحركها ومفيهاش مشكلة، رجلى برده تمام بتتحرك الحمد
لله وبقدر أروح التواليت بيها وأرجع، كانوا بيحركوها وأنا فى الغيبوبة
عشان ميحصليش مشاكل فى العضلات.
يرفع قدمه إلى أعلى ثم يضغط بها على الأرض.

أنا كمان فايق جدًا وفاكر كل حاجة بتفاصيلها قبل الحادثة الى مش
فاكر عنها أى حاجة، بس هما قالوا ده عادى، وظائف جسمى ميه
ميه وأحسن من ناس كثير.

تأخذ نور نفسا وهى تقترب أكثر.

-أنا كنت خايفة أجبى وأنت فى الغيبوبة دى.

-ليه..؟ كنت تعالى مكنتش هابقى حاسس.

- بطل الأسلوب ده بقي.. أنت عارف أنى.....

- ششششش... أنا مش عارف حاجة.. شفتی بقى هانسی واجب الضیافة تشربی ایه.. اُکید شای بلبن صح.. هکلمهم.

-نادر والله العظيم أنا كنت بموت أنت ليه بتعمل كده؟ ليه كمية التوتير اللى أنت فيها دى؟

-الدكاترة قالولي بلاش توتر... وأنا مش متوتر والله خالص.

-نادر انا بموت!

وقف نادر أمامها.

-وأنا مت يا نور.. مت ورجعت تانى للحياة عايزة ايه؟

-أنا بموت عشان أنا كنت السبب.

ابتسم نادر ونظر مرة أخرى إلى الأرض ثم أزاح وجهه ونظر إلى النور المتسلل من النافذة وهو يحاول أن يخفي انفعالاته.

-بصى يا نور... أنا كنت إنسان مليان وجع، مليان لحد آخر حنة فى جسمى وأنت كنت الغطاء الى بيمنعنى من الانفجار، كنت دايمًا بقول لنفسى هى دى الى كفيلة تنسيك الوجع الى شفته فى حياتك، أنا كنت بحبك

-كنت!!

نظر إليها ولمعة في عينيه

-سبييني أكمل... سبييني... أنا كنت بجبك بكل حاجة أملكها،
النفس الأمارة بالسوء دى ماكنتش بتفكر إلا فى الخير عشان أنت
فى حياتى، مشاعرى كلها كانت ملك ايدىك، كنت مسلوب تماما فى
حبك وعشان أكون صريح معاكى أنا كنت مستمتع جدًا بفكرة الحب
الأفلاطونى ده... الحب الى من غير أى مقابل، بس لما دخلنا فى
الجد ورفضتيني الغطاء الى كان مغطى هموم الدنيا اتشال وانفجرت
كل لحظات الحزن.

-نادر والله العظيم أنا مكنتش متخيله كم الحب ده.

-ماكنتيش ايه؟ مكنتيش بتشوفى عينى مثلاً وهى بتبص لك ولا
يمكن محستيش بايدى وهى بتلمسك أو يمكن ماوصلكيش
إحساس الحب النضيف وأنا ببص لشفافيك وهى بتتكلم، يمكن
ماشوفتيش الوجة الى كنت بابقى فيه لما كنت بتتوجع، ماحستيش
بايه يا نور؟ ماتخيلتيش إنى كنت بعشق اللحظة الى بتعدى فيها من
قدامى

-نادر... أنا آسفة والله العظيم.

-وأنا كمان آسف يا نور.. أنا كمان آسف... بس واضح إني كنت بحب واحد. تانية.

يجلس نادر على السرير ويضع يده فوق رأسه، تجثو بركبتيها على الأرض وتمسك بيده الأخرى.

-كلنا بنغلط.. أنا محتاجة فرصة.

-يا نهار فرص... ده أنا أمتى اتذلت ذل بسببك يا نور.. الست الى حضنتك أول لما دخلت دى اتذلت بسببك.

-هى سامحتنى.

-هى تسامح أو لأ ده حقها، إنما أنا مش هاسامح نفسى لو فرطت فى حقها عليا مرة تانية.

-طب هو أنت لسه بتحبني؟

-هاقولك حاجة بس ماتقوليش عليا مجنون... أنا مش فاكر أى حاجة من أول الحادثة لحد ما فقت بس أنا تقريبا حبيت واحدة تانية.

يغمض نادر عيناه فى محاولة فاشلة لأن يتذكر هذا الحلم الذى كان يراوده فى غيبوبته.

-هو كان حلم جميل قوى.. هافتكره أكيد فى يوم.. أو هلاقيها هى فى

يوم... أنا تعبنا يا نور ومحتاج أناام

تعود الأم وتقف نور من على الأرض وتنظر إليها بحسرة وندم،
تحتضنها والددة نادر وتقبلها وتقول لها بهمس:

-بتعطى ليه هو زعلك؟

لم تجب نور.

-هو أكيد تعبنا وبكره لما يكون كويس.. كل حاجة هتتصلح.

-لا يا طنط أنا بوّظت كل حاجة ومفيش حاجة ممكن تتصلح.

تدريجياً تعود حياقي إلى طبيعتها، تدريجياً كل شيء بدا يتحرك إلى
الأمام إلا أنا، أنا لا زلت هناك عالق، أنا عالق فيما قبل تلك الحادثة،
أنا عالق في تفاصيل حلم لا أتذكره، آخر شيء يأتي في ذاكرتي تلك
الفتاة التي كانت تجلس في المقعد الخلفي وتبكي.

عاد نادر إلى المنزل بعد رحلة علاجية كان فيها أصرار وعزيمة منه
أن يعود، صار الحنين في جسده عندما لمست أنفاسه مكان نور، هنا
التقيا للمرة الأولى.

-أنا نادر ساكن فوق في الخامس.

-أهلا وسهلا.

-أنا عرفت أن تيته وجدو توفوا ف حببت أقولك البقية في حياتك
يعنى.

-شكرا... أنا اسمى نور.

-نور تمام... نور حلو جدا.

-أفندم!؟

صاحب تعجبها ابتسامة.

-لا مفيش ولا حاجة.

يصعد نادر درجات السلم ويصل إلى الحد الفاصل بين الدور الأول
والثانى، هنا صرح لها بحبه.

-نور أزيك؟

-أزيك يا نادر؟

-مممكن كلمة.

-هنا؟

-آه هنا.. ما هو مينفعش مكان تانى غير هنا.

-ليه؟

-عشان أنا مش هاعرف أقولك ده غير هنا.

-فى ايه يا نادر مالك؟

-أنا معجب بيكى جدًا وعازيز نرتبط ببعض.

يصعد إلى الدور الثالث يقف أمام باب شقتها القديمة يتذكر الوداع.

-نور خلاص هت عزلوا؟

-متخافش يا حبيبي... هنتقابل كثير.

-بس مش هشوفك كل يوم!

-صعب نتقابل كل يوم.. بس أنا هارنلك كل يوم.

-لا رنة ايه... أنا هشحن مخصوص وهكلمك.. بصى لو هتصل بيكى من السنترال هرنلك قبلها لو رنتيلي هتكلم.. هتوحشيني قوى.

-نادر أنا مش مسافرة يا حبيبي.

يصعد الدرجات المتبقية بوهن شديد، لا يزال يشعر بالضعف، أخيرًا يجلس على الأريكة التى طالما كانت شاهدة على خطباته لها، كانت نور تحب الرومانسية المفرطة كانت تعشق أن يكتب لها، هنا جلس

للمرة الأخيرة يكتب إليها:

حبيبتي نور:

ربما هذا خطابي الأخير أو الأول في علاقة جديدة وارتباط رسمي، اليوم اكتب إليك وأنا كلى إيمان أنك لو قبلتي سنعيش معاً قصة من قصص العشق التى تتلمذت فيها على يديك، اليوم أطلب منك أن تنصتى إلى قلبى وليس قلبك، اليوم اطلب منك أن تلمسى روحى، أن تشفقى على كل نبضة للقلب وأنت بعيدة عنه، اليوم أنا أستطيع أن أتحمل مسؤوليتك كاملة، اليوم صرت على قدر من الرجولة التى لن تكتمل إلا بك بين أحضانى، اليوم أعتذر لك أننى لم أخبرك شيئاً عن والدى، اعتذر عن خوفى لتظنى يوماً أننى قد أكون مثله، اعتذر إخفاى لسنوات هذا الأب الذى لم أتشرف به يوماً، اعتذر لك من خوفى على صورتي أمامك وأن تعلمى أننى عشت سنوات من الشقاء، عشت سنوات وأنا أخفى عنك حقيقة حياتى لكنها لم تكن حياة أتشرف بها، ظلم من رجل فُرض على أن يكون والدى، ذنب اقترفته والدى وأتحملة أنا، دعى الحاضر يخبرك عنى أكثر، دعى عشقك لوفاة جديك معاً يشفع لى وأنا أعاهدك أن تبقى يدك فوق رأسى وراسك مرفوعان دون انكسار، أعلم أن والدك رفضنى مرة وقد يفعلها ألف مرة أخرى وأعلم أنى سأطلب فوق ألف ألف فقط لو أخبرتيني أنك ستنتظرى.

أنا نادر عاشق لكل ما لمستيه يومًا أتضرع لله أن تقبله مرة أخرى.

أرسلت هذا الخطاب مع صديقتها، وقتها كنت على يقين أنها سوف تستجيب لتوسلاتي، كنت أعلم أنها تحبني لكن الخطاب عاد إلى من جديد وفي الأسفل فقط كتبت « أنا آسفة ».

تقف والدتي أمامي بطبق كبير به حساء ساخن ودجاجة كاملة.

- أنت مش هتقوم من مكانك غير لما تاكل ده كله؟

- أكل الفرخة دي كلها... ماما هو أنا باكل فراخ.

- آه بتاكلها.

- هو أنا ناسي الحادثة آه بس مش ناسي باحب وبكره ايه.... مش بجهها لدرجة فرخة كاملة ومسلوقة كمان.

- طب اشرب الشورية.

- ماما أنا مش هاكل.

- اقسم بالله لو ماكلت ل...

- من غير حلفان والنبى... أنا مش هاكل بدل ما أروح أغيب تانى.

- لا خلاص أعملك شوية مكرونة مسلوقة.

-ماما هو أنا ايه علاقتى بالملسوق؟

-وحشة.

-يعنى أنت عارفة... صح.

-صح يا حبيبى.. بس دى مكرونة.

-يعنى هى مكرونة بالجمبرى..؟ ما هى مسلوقة فبلاش.

-طب بص... خالتك وبنتها جايين و....

-و أنا تعبان يا ماما.. أنا تعبان.. بنت خالتى هتفضل بنت خالتى..
أنا حضرتها فى أوقات صعبة جدًا يا ماما، أنا شفت شنبها وهو ييخط
يا ماما ماينفعش، احنا كنا بنتخانق ضرب مع بعض يا ماما، بنت
خالتى لما كانت بتلعب معانا عريس وعروسة كانت هى بتبقى العريس
ف مينفعش.

-طب المكرونة؟

-ماما أنا هدخل أنام.. كل أنت الملسوق بتاعك..

-طيب أعملك لحمة مسلوقة.

-طيب أنا هروح انتحربقى.. هاخبط دماغى وسلمى على خالتو
وبنتها عشان أنا هنام.

مر وقت منذ خروجي من المستشفى صحتي في تحسن مستمر وحالتي النفسية في توقف تام، يسيطر على الاكتئاب بشدة، الحل الوحيد كان في الخروج ربما أقاوم تلك الرغبة الملحة في النوم المتواصل، الآن أسير وحيدا هائما بين طرقات هذا المول التجاري الشاسع، أشاهد ألواحاً زجاجية خلفها منتجات فقدت المتعة في متابعتها انظر فقط إلى انعكاسات الأضواء على تلك الألواح، أصوات لغات مختلفة تنادي على أطفال يملؤون الجنبات بصيحات لم أعد أتحملها، تنظر لي امرأة أربعينية لعلها تجد في نظراتي شوق لم تحظ به منذ زمن، اللعنة على من اخترع عربات التبضع، اللعنة على من قرر أن يجعل هذا المول ملاذاً، اللعنة على أنا أيضاً فيما كنت أفكر عندما قررت القدوم هنا، ماذا تنتظر من بعد نور؟ فلتتحرك قليلاً إلى الأمام فلتجد أنثى جديدة، أنت لا تحبها فقدت هذا الشغف لم أعد أريد أن أشعر بالحب أو أحب لم يعد لي بال للانتظار عانيت ما عانيت ولا زلت انتظر خلاصاً لم يحن موعده، متى سوف أقبّل هذا؟ متى ستتحوّل نور إلى ذكرى فقط ذكرى دون أوجاع؟ يصطدم بي عامل النظافة فأثور بلا داع لم أعد أطيق شيئاً سوى لحظات الانهيار لماذا لم أرحل في المرة الأولى أنا لا أريد دنيا أخرى، دنيا أخرى... كان اسمها دنيا، تلك الفتاة التي راودتني في أحلامي، أنا أحاول تذكر هذا الحلم كثيراً وأفشل تنقطر تفاصيله بين الحين والآخر، كيف كان شكلها؟ ما هذه

السعادة التي اجتاحت قلبي عندما تذكرت اسمها؟ أسير مسرعًا إلى أقرب مكتبة داخل هذا المول الشاسع، مجهود لا يختلف كثيرًا عن الركض وراء أحلامك لا أحد يعرف خبايا هذا المول، صمم هذا المول على هيئة متاهة، أكثر من عامل استنجدت به بحثًا عن أى مكتبة إلى أن وصلت أخيرًا، أحاول أن أبحث بين الأرفف عن كتاب يساعدني لأستعيد هذا الحلم الضائع، محاولاتي باءت بفشل ذريع فى أن أجد كتابا يساعدنى أو حتى فى شرح ما أريد لعامل المكتبة، بعد معاناة أقف عاجزًا أمام رف للروايات أنا لا أحب القراءة لماذا أقف هنا؟ ما هذا الكم من الروايات؟ من هؤلاء؟ أعتقد إنه لم يبق إلا أنا ليكون كاتبًا... وميض قوى يضرب فى رأسى وفتاة أحلامى تخبرنى « أنت كتبت رواية عنى» ..

دُنْيا

كانت طفولتى محل سخرية من الجميع، لا أعلم لهذا سببا سوى أننى كنت شخصية منطوية أحب الاختفاء عن الأنظار، كان الجميع يبادلوننى نفس الشعور فأنا الغير مرغوب فيها، وأنا فى المرحلة الثانوية شعرت للمرة الأولى بدغدغة الحب، ولكم أن تتخيلوا شخصية من أحب، أحببت شابا كان معى فى إحدى دروسى وبما أنى أمتلك حظا سيئا للغاية، كان يعانى من مرض لم يذكر أحداً تفاصيله، كانت أسرته تحاول التكتم على مرضه لا أعلم لماذا، ورغم كل هذا حاولت الاقتراب منه، ربما بداعى الشفقة أو ربما حقاً أننى أحببته، لم تكن مصيبتى فى إعجابى بشادى حدث الكثير فى هذا الوقت، مصيبتى الحقيقة كانت فى أخته، كان لشادى أخت توأم لم تكن رقيقة مثله لكنها كانت تحب شادى حبا كبيرا، كان هذا واضحا فى تعاملها معه، كانت تعامله كوالده لم أرغب فى أن أبحث عن أسباب، على ما أظن كنت افتقد الاهتمام وبحثت فى شادى عن الاهتمام بنفسى، لا يهم إن كنت لا تفهم دعنى أخبرك قليلا عن شدا، كان حديثى المباشر معها بعد انتهاء أحد دروسنا.

-ازيك يا دُنيا؟

-شدا عاملة ايه؟

-تمام.. بقولك ايه هو أنت معجبة بشادى؟

-أنا لا طبعًا... ايه الكلام ده؟

دعتنى للسير سويًا حتى محطة الأتوبيس وهى تحتلق أحاديث كثيرة.

-تعرفى يا دُنيا أنت شكلك طيب جدًا... ممكن أحكى لك حاجة؟

-آه أحكى.

-بس سر.

-سر ليه أنا؟ احنا أول مرة نتكلم أساسا!

-لا عادى أنا مش بيفرق معايا الكلام ده.

-طب قولى سرك فى بير.. اصل أنا أساسا يعنى مابتكلمش مع حد.

-ما هو عشان كده هاحكيلك.

أمسكت يدى ووضعت رأسها على كتفى، اندهشت مما تفعله لكننا توقفنا قليلا خلف محل لبيع أسطوانات الأغاني وبدأت فى الحديث.

-عمرک جریقی تتباسی یا دُنیا؟

-نعم.. اتباس ایه؟ ایه الی بتقولیه ده؟؟

-وطی صوتک یا مجنونة.

-أنا برده الی مجنونة!

-طب اسمعی للآخر.

-اللهم طولک یا روح.

-عمرک بجد فکرتی فی کده؟

-معرفش یا شدا.. ایه الی أنت بتقولیه ده؟ أنت عایزة تتریقی علیا
أنت کمان.. مین مسلطک علیا.

-والله ابدأ وأنا هتریق علیکی لیه ده أنت جمیلة والله ما أقصد...
طب بصی أنا هاتکلم وأنت اسمعی.

-شدا مش عایزة أتأخر.

-خمس دقایق.

-قولی.

-طول عمری وأنا بفکر فی أول واحد هیبوسنی، تعرفی أنا عندی

بنات صحباتى بيحكولى عن الموضوع ده، عن النار الى بتولع جواهرهم
والحاجات الى بتزغزغهم، عن إن البنات بعد البوسة الجامدة بتكون
قد ايه مسلوبة وممكن تسبب نفسها يتعمل فيها الى هى عايزاه.

-دى قلة أدب قسمًا بالله.

-الصراحة أنا جربت مرة.

-ربنا يهديكى ويهديهم ونمشى بقى عشان ماولعش فيكى وفى
نفسى.

-أنا جربت يا دُنيا ومحصليش أى حاجة من الى هم حكوا عليها،
مفيش حاجة حصلتلى نهائى ولا زغزة ولا تخدير، ولما سألتهم قالولى
عشان أنا كئيبة وإنى مسترجلة وضحكوا عليا وكانوا هيموتوا يعرفوا
مين المجنون الى جاله نفس ييوسنى ده.

-هو بغض النظر عن السفالة بتاعتك وبتاعتهم بس بصى أنا عارفة
يعنى ايه حد يتريق عليكى على طول وإنك تبقى مصدر الكوميديا،
لإن ده دورى من ساعة ما كنت صغيرة فما تزعليش منهم وممكن
نبقى أصحاب بشرط بلاش موضوع صحوبية الولاد ده نهائى مش
ناقصة هى أصلها.

اقتربت منى شدا فى وقتها كثيرًا أصبحت صديقتى المقربة فى وقت

قصير، والحقيقة عندما اقتربت منها اكتشفت أن إعجابى بشادى
كان من باب الشفقة لا أكثر، شدا كانت من مستوى اجتماعى اعلى
منى كثيراً وبالتأكيد مادی ربما كنت ابحث فيها عن شىء ينقصنى.

-بت يا دُنیا!

-ایوه.

-عمرک لبستی فستان صدره مفتوح وقصير؟

-أنتِ مجنونة.. ده أنا اتدبح فيها دى.

-بصى خدى الفستان ده وابقى جريبه لوحداك.. أنا متأكدة إنه
هينطق عليكى بجسمك ده.

-هو ايه اللى بجسمى ده مش فاهمة.

لم أرتدى من قبل فستانا بلا أكتاف ومفتوحا من الصدر فوق الركبة،
أبى سوف يقتلنى لو رآه، لا لن يحدث لن يراه أحد بالتأكيد ولا
حتى والدتى، سوف أعيده إليها فى أقرب وقت ولكن أين سأرتديه،
لم أستطع النوم فى هذا اليوم، تسلل الليل وأنا أنظر إلى السماء
لساعات، أفكر فى الفارس وحصانه الذى سيخطفنى افكر فى الحب
والعشق والهيام، لكن أين هو هذا الشاطر الذى لو اقتحم حارتنا
بالحصان لاتسخ هو وحصانه أو لسقطنا ثلاثتنا قبل الخروج منها؟

كانت الساعة تشير إلى الثانية بعد منتصف الليل والسكينة تكسو المكان، هدوء معتاد إلا من أصوات بعيدة لمقهى عند أول شارعنا وسواد محكم في ليلة اختفى فيها القمر كاملاً، نظرت إلى الفستان الذى يشعر بنفس وحدتى ودون تفكير خلعت ملابسى كاملة إلا من حاملة صدرى والتى أحكمتها وأنا أرفع بها نهداى إلى أعلى وارتديت الفستان، تسلت دون حذاء وأنا أنظر من خلف كل باب لكى أتأكد من خلو المكان صعدت إلى سطح المنزل مسرعة وأنا ارتدى إسدال طويل أسفله الفستان توجهت إلى أكثر مكان نظيف، خلعت إسدالى ووقفت على أطراف أصابعى وتركت الهواء يختلس لمسات من كل جسدى، يداعب كل ما أخفيته عن الناس وأنا أستمتع، شعرى غير معصوب يطير على أكتافى وهواء فيه لذة البرودة فوق نهداى، لم أتوقف لكنى بدأت فى الدوران أرقص وأتمايل على أنغام موسيقى أسمعها فى رأسى ، لا مانع من أن أ لمس جسدى لا مانع أيضاً من أن أحتضن نفسى، لم اجد أحدا وقتها يشاركنى تلك اللحظة سوى المدعو شادى أترك لنفسى حرية الخيال، يحتضنى بقوة يتلامس أسفلنا أشم رائحة ذكية تخرج منه، أشعر بالبرودة، أرقص بين أحضانه تركت أنفاسه تتحسس عنقى شفتاه تحاول الظفر بكل جزء مكشوف من جسدى، لا زلت أرقص وحيدة بين يديه حتى شعرت برعشة فى جسدى وبرودة ما هذا البلب الذى أشعر به، ما هذه السعادة لماذا أشعر بالخوف لم يلمسنى أحد، أعود مسرعة إلى غرفتى أترك

الفيستان وحيداً مرة أخرى وأنطوى تحت الغطاء دون ملابس، أعلم أن أمي سوف تقتلني إن رأته هكذا لكنني أحتفظ جانبي بعباءتي سوف أرتديها عند الاستيقاظ رغم الخوف إلا أن الابتسامة ظلت تعلو وجهي لساعات وأنا مستيقظة حتى تذكرت كلمات أمي عن هذا الجسد الذي لا أملكه، أسمع صوت بكاء أمي، لماذا تبكي؟ هل أخبرتك من قبل لماذا تبكي والدتي؟

مع الوقت أدركت السبب الحقيقي وراء بكاء أمي ليست المشكلة في العلاقة الجسدية كما كنت أظن، كم كنت ساذجة، الوضع كان أعقد من هذا وإن بدا بسيطاً، والدتي لم تكن تشعر بالأمان رغم الأجواء المحيطة ومجهود والدي المبذول في أن يبقينا في أدنى درجاته، أمي لم تكن تشعر بالأمان لأنه لا يوجد لديها ملاذ سوى بيت زوجها والدي وبيت جدي والدها، أمي لم تكن تشعر بالأمان ماذا لو تركت أبي قليلاً وعادت إلى والدها هل ستكررها كثيراً لو كان سببها أنها فقط تشعر بالضيق؟ أو لأنها تريد أن تستجمع أنفاسها مرة أخرى؟ بالطبع كان سيرفض فعلها كثيراً أمامي « يا بنتي بيتك وأولادك أولى بيكي... بيت أبوك مفتوح وقت ما تحبي بس بيتك» في الحقيقة لم يفتح باب جدي لأمي سوى لأيام معدودة عند أي خلاف وتعود بعدها والدتي لأن «بيتها أولى» والدتي كانت تبكي لأنها شعرت بالخوف أن تكون امرأة غير مرغوب فيها كانت تبكي لخوفها من أنها قد صارت دمية، كانت تبكي لخوفها من أن تبقى مجرد « بيتها أولى»

أمى كانت تبكى لأنها لم تمتلك قط رفاهية أن تخرج ولو قليلا لتسير بين الطرقات، أمى كانت تبكى على حالها لأنها تزوجت دون إرادتها من رجل صارت هى ملكية خاصة له وهو ملكية مباحة لمن يريد، أمى كانت تبكى لخوفها من المنافسة وهى تنهار كل لحظة فى مملكة وهمية اسمها «بيتك أولى» أمى كانت تحب والدى وهو كان يعشقها، لكنه أرث نشأت عليه، الخوف الدائم ومنعها من اتخاذ أكثر قراراتها مصيرية.

بالمناسبة أنا مثل أمى ورثت الخوف عنها، فى الحقيقة أنا دائما ما أشعر بالخوف، أشعر بالخوف أن يرى الناس حقيقى الأنثوية وما أمتلك فأنهش بلا رحمة ربما أنهش بنظرات أو لمسات متعمدة، أنا أيضًا أشعر بالخوف من أن أترك نفسى ليرانى الآخرين فيسلب منى جسدى بدافع الحب، أنا مثل أمى فى كل شىء، هى تنازلت من قبل عن حق موافقتها فى اختيار شريكها وإن كانت محظوظة وربما سوف يصير حالى مثلها يومًا.

عذرًا على هذا الكم من الشكوى لكنها كانت صدمتى الحقيقية فى شدا

كنت أشعر بهذا الحلم الذى عشته فى غيبوبتى لكنى لم أتذكر

تفاصيله، فشلت كثيرًا في محاولات استجماع خيوطا منه إلى أن قررت أن أبني هذا الحلم، ومع كل ومضة تأتي منه كنت اكتبها، هلا أخبرتكم عن والدتي عندما دخلت عليها بأوراق وأقلام رصاص.

-ايه اللي أنت جايه ده يا نادر؟

-مسدسات وصواريخ....

-يا ابني رد عدل ده أنا أمك.

-ما هو أنت شايقة ده ورق أبيض بيحتاج أقلام عشان يتكتب عليه ودول الأقلام عشان يتكتب بيها يا ماما.

-هتذاكر تاني..!

-لا أنا قررت أكتب رواية.

-يا خيبتى.

-مالك يا ست الكل؟

-لا مفيش.. ربنا يوفقك إن شاء الله بس بقولك ايه لما تخلص ماترميش الورق.

-عايزة تقرى اللي أنا هكتبه؟

-لا أقرأ ايه هو أنا فاضية، أنا هاطلع عليه بطاطس.

أمى على الرغم من همومها كان لديها حس مرح، لم أسألها من قبل ربما كانت تخفف به ضغوط حياتنا، ربما كانت تتسلح به أمام الاكتئاب.

-ماما ممكن سؤال!

-مدام قلت ماما يبقى عايز فلوس...

-لا بجد والله.

فى لحظة تدرك أن مسار حديثي يستدعى الجدية، فترسم على ملاحظها الاهتمام.

-خير يا نادر يا ابني؟

-أنتِ ازاي كده؟

-كده ازاي يعنى.

-ازاي بتعرفي تضحكي وتهرجي طول حياتنا وأنت كده؟

أخذتني بين أحضانها.

-زمان يا نادر قبل لما أتجوز أبوك كنت على طول مبتسمه وسعيدة

وشايفة الحياة جميلة، كنت دايمًا بقول مهما حصل لى فأنا أكيد هفضل فرفوشة وكنت بستغرب قوى من الناس اللى فجأه تلاقى على وشوشهم حزن مع انهم كانوا عاديين قبلها، كنت بستغرب من أى حد يقولى أصلك مش فاهمة ولا عارفة ايه اللى أنا فيه وأنا كنت الصراحة بقولهم أى حاجة ممكن تعدى وأحاول أضحكهم واتبسط، كنت فاكدة إنهم بيبالغوا فى مشاعرهم دى عشان يستعطفوا الناس، بس بعد أبوك ويوم مع يوم والمشاكل بتزيد والضغط بتزيد اترسم على وشى الحزن والههم، وبقيت بردد كلام صحابى بتوع زمان وأقول للناس أصلكم مش فاهمين وبقيت بارتاح قوى لما أشوف نظرة استعطاف فى عيون حد، أنا استمتعت وأنا بلعب دور الضحية والناس بتتطبب عليا وهم شايفين الراحل ده بيعمل فيا ايه، والرمية اللى كان راميهالى، بنت فى سن صغير معاها طفلين لسه وكآبة الدنيا جواها، فضلت كده لحد ما أنا وأبوك اطلقنا وكان لازم وقتها أقف على رجلى، كان لازم أسد عشانك أنت وأختك.

-أنت عملتى أكثر بكثير.

-على فكرة أنا كان نفسى أعملكم أكثر مليون مرة، المهم وقتها كان قدامى حل من اتنين يا إما أكمل وأنا مكتئبة وأنتم مالكوش غيرى فكان هيطلع عليكم الاكتئاب ده، أو إني أحاول أرجع البنت بتاعة زمان ووقتها قلت لنفسى أكيد مش هتبهذل أكثر من البهذلة

والذل الى شفتهم وواحدة بواحدة رجعت كده، أكثر حاجة كانت بتوجعنى شغلك وأنت صغير.

-دى أكثر حاجة أنا بحمد ربنا عليها... أنت ماتعرفيش الشغل ده عمل فيا ايه.. ممكن سؤال أخير ومن غير زعل.

-عارفاه ومستنية طول عمرى إنك تسأله.

-مين السبب أنت ولا بابا؟

- بص يا نادر... أنا طول عمرى وأنا محاول مكرهكمش فيه...
عشان وارد أكون أنا الى كنت غلط ومكنتش عايزة قراركم لما
تكبروا يكون مبنى على مشاعر أنا بنيتها، أبوك عندك روح وكلمه،
وقرر أنت براحتك

-أروحه مش هتزعلى!

-ازعل ايه بس.. أنا هزعل بس على كمية الورق الى هتترمى فى الزبالة
دى.. مش حرام الفلوس دى كلها.

تقتحم خلود خلوتهم تنظر إلى نادر وهى تقبل رأس والدتها وتلقى
التحية على نادر الذى يردها ببرود.

-نادر تحب تخرج أو تيجى معايا سينما..

-لا مش عايز.

-هو أنت مش أخويا... خرجنى.

تخرج خلود محملة بخيبة أمل فى أن تستعيده وخلفها والدتها.

-ماتزعلش منه.. طول عمره شايل هم أكبر من سنه.

يبدو أن الحياة أعطتني خيارات أخرى بعد عودتي من الموت،
سمحت لى أن أشاهد والدى كما سمحت لى أن أخرج من أسر نور
إلى عبير آخر.

التقيت بوالدى ثلاث مرات آخرهم كان عند موته.

-الو.. بابا أنا نادر.

-أهلا يا ابنى... ازيك محتاج حاجة؟

-لا بتكلم بس.. أسأل عليك.

-أنا كويس.. مع إنى كان نفسى تكلمنى من زمان.. ابقى تعالى
زورنى.

كنت سعيدا بطلبه الزيارة لكن المدهش أن اللقاء تم على مقهى لم

أفهم لذلك سببا، رسمت المشهد كالآتي بمجرد أن يرانى قادما نحوه سيقف ويشد على يدي ويجذبني ويحتضنني بقوة، من المؤكد أنني سأشعر معه بالطمأنينة، لكن حدث العكس بمجرد وصولي إلى المقهى.

-أزيك يا نادر، كبرت أهه أنا آخر مرة شفتك كنت لسه عيل.

-ازيك يا بابا؟

-اقعد تشرب ايه، بتدخن تاخد سيجارة ولا أجبلك شيشة!؟

-لا مش بدخن.

-طب تشرب ايه.. أقعد واقف ليه يا واد... أقعد.

لم أستطع الصمود أمام هذا الرجل كثيرا، ربما لأنني توقعت ما هو أكثر بكثير من هذا الجفاء أو ربما هو لا يستطيع البوح بمشاعره ربما لأننا نجلس على مقهى ربما لا يريدني أن أرى المنزل الذي يقيم فيه من الممكن أن يكون دون المستوى ويخاف.... لماذا لا زلت أبحث له عن مبررات سنوات عمرى كلما أتى على خاطرى أسوق له من الأعذار ألفا.

أكيد هو وماما ماكانوش متفاهمين، أكيد هو بيحبنا بس الظروف، أكيد مسافر وهيرجع ويعوضنا، أكيد فى ست واكله دماغه وهيرجع

لعقله... كفى تلك الأعذار.

-لا أنا مش هاقعد كثير..

-أمك عامله ايه كويسة؟ اكيد كويسة ما هي طول عمرها عاملة جامدة.

كنت على وشك الرد ولكني آثرت الصمت.

-اختك تمام وأنت تمام؟ لو عايز حاجة قولي!

كنت على وشك الرحيل لكنه صدمني مرة أخرى.

-ياللا قوم روح أنت بقي عشان الوقت مايخدكش.

طلبت مني والدتي أن أعطيه فرصة أخرى ربما مع المرة الثانية يرق له قلبًا أو يشعر بمشاعر الأبوة.

-ماما احنا مش محتاجين حاجة منه.

-أنا عارفة بس يمكن أنت محتاج مشاعر أب في حياتك، روح له مرة كمان، مرة واحدة..

كان اللقاء الثاني في المنزل الذي طردنا منه أنا وأمي وأختي منذ زمن بعيد، وقفت عند المدخل.

-تعالى أدخل.. بيتك.

قررت أن أهاجمه هذه المرة ربما يشرح لى ما لم أفهمه عنه طوال حياتى.

-مش هو ده البيت الى أنت طردتنا منه من سنين؟

-أنا كنت صغير وقتها و.. ووالدتك...

-مالها كانت صغيرة هى كمان؟

-بلاش تحكم عليا.

-بس عشان أكون واضح معاك جدا... أنا هنا عشان هى طلبت منى أجيلك مرة ثانية، بعد المقابلة بتاعة القهوة.

-أدخل.

جلست مع والدى أقل من نصف الساعة فى تلك الفترة سمعت أصواتا تصدر من داخل إحدى الغرف، حاولت أن أسأله مباشرة عن سبب ما فعل لكن من الواضح أن هذا الشخص لم يتغير كثيرًا عن الماضى.

-هو فى حد جوه عندك؟

-لا مفيش. بتسال ليه؟

-أنت مش سامع أصوات؟

-مش مهم... لو عايز حاجة قولى على طول أنا أبوك برده.

-أمشى يعنى؟

-ابقى تعالى زورنى.

-أنا مش فاهمك أنت عايز تقعد معايا وبتمشينى بعد نصف ساعة،
دى عادة عندك بقى إنك تطردنى

احتد عليه.

-أنت ازاي تكلم أبوك كده؟

ضحك بشدة.

-أبويا... الحاجة الوحيدة اللى هتخلينى ما اردش عليك هى أمى
ربتنى على احترام أى حد كبير... أو أى حاجة فاش هارد عليك.

-واضح إنها ماعرفتتش تربيك.

وقفت أمامه ندًا.

-كله إلا دى... ممكن تتكلم فى أى حاجة إنما الست اللى أنت
عذبتها وأنا صغير بقى ليها راجل مش هيسيبك تهينها تانى... أنت

فاهمنى صح ولا أفهمك أكثر.

-ايه هتضربنى؟

-تانى الست الى أنت رميتها زمان ربتنى كويس... أنا الى منعنى عن إنى آخذ حقنا منك هى الست الى أنت بتقول مش عارفة تربينى، طب أنت كنت فىن عشان تربينى، أنت تعرف عننا حاجة، أنت عارف أنا اتبهدلت بسببك قد ايه من زمان ولحد دلوقتى، أنت عارف إن الناس بتعايرينى بيك.

-أنت ولد قليل الادب.

-أنا هقوم أمشى... عشان أنا خلاص عرفت ماما سابتك ليه.

-غور فى ستين داهية برده أنا أبوك.

-أبويا ميت... دى الكدبة الى كنت بكذبها على الناس بس دلوقتى بقت أكثر حاجة صدق فى حياتى...

كان نادر مُصراً أن يعلم من معه فى الشقة انتظر أمام الباب لساعات حتى خرجت امرأة ترتدى عباءة سوداء وتضحك وهى تقبله وهو يضع يده على صدرها.

لقاؤنا الثالث كان بعد موته، مات وحيداً فى إحدى المستشفيات

نظرت إلى أخته التي من المفترض أنها عمتي التي لم التق بها.

-مش حرام تسيب أبوك في آخر أيامه.

-حضرتك عمتي صح؟

-أنت نسيت عمتك.

-هو أنا مكنتش بشوف عمتي أساسا عشان أنساها.

-مالك بتتكلم كده ليه.. أدخل بص عليه وسلم عليه وقوله إنك مسامحه.

-أنا اسامحه!! لا طبعًا مش هسامحه.

-ايه الجحود ده يا ابني ده ربنا وصى عليهم.

-ونبي محدش يكلمني بكلام ربنا مع واحد ماكانش يعرف ربنا أساسا.

لم استمر معها في نقاش سنصل فيه سويًا إلى نهاية مسدودة، كان على فقط أن أنهى إجراءات الدفن لكنه لم يدفن في المدفن الذي ابتاعته لنا والدتي، أنا تركته يدفن في مدافن عائلته وتركت لهم تنازل عن أي حق لنا في ورث منه، له منى لعنات لن تتوقف.

دُنْيا

أنت لا تعلم شيئاً عن عالمنا، كل شيء يبدأ في مرحاض السيدات، السيارة الأولى، أول مرة تستخدم فيها مساحيق التجميل، عمليات شد الصدر للإغراء، عمليات إزالة الشعر، كل شيء كنت أشاهده للمرة الأولى داخله، لكنى لم أكن أتوقع أن أخوض تلك التجربة لم أكن أتوقع أبداً، كانت خطوبة صديقة لشدا ودعتنى للخطوبة، نزلت من بيتى يومها بملابسى المعتادة ومررت على شدا فى منزلها هناك أصرت أن أغير ملابسى وأرتدى فستاناً مشابهاً لهذا الذى أهدتنى إياه، كنت مرتعبة طوال الطريق أن يرانى أحد من معارفنا لكن من المستحيل أن يأتى أحد من أقاربنا هنا، هذه ليست قاعة أفراح إنما احدى القصور الخيالية التى حلمت بها.

-دُنْيا تيجى معايا الحمام؟

-آه.. آه طبعاً.

وضعت يدها حول خصرى فى طريقنا إلى هناك ثم كانت الصدمة.

-فاكرة يا دُنْيا لما حكيته عن بوسة الأولاد وإنها محركتش فيا

للقمر، هذه كانت تجربتي الجنسية الوحيدة قبل الزواج، أحمد الله
أننى كلما تذكرتها أشعر بضيق فى صدرى أنا أريد أميرا، أريد أن
تكتمل الصورة الطبيعية أمير على حصان يخطفنى من هنا، كيف
ستخطفنى أميرة؟ ازددت وحدة بعد تلك التجربة وازداد جسدى
أنوثة، مرت الأيام وأنا أرفض كل من يتقدم لخطبتي، ظنت والدتي
أننى على علاقة بأحد.

-يا بنتى لو فى حد قوليلى أنا أمك... ييجى ويتقدم ولو ظروفه مش
مساعده نستنى.

-والله ما فى حد يا ماما.

-أوعى تكونى غلطى وخايفة تتفضى.

-ايه الى أنت بتقوليه ده.... يا نهار أسود يا نهار أسود.. ازاي
تفكرى كده؟

-ما هو مينفعش ترفضى كل الناس.

-ماما أنا مش عايزة أكون زيك.

هنا تابعت دموع أمى.

-ماله زي، ما أنا زى الفل، أبوكى راجل محافظ عليا وعلى بيته

وعليكم، راجل بيعمل كل حاجة ممكنة عشان نعيش مستورين،
ماله حالى ما أنا زى الفل الحمد لله، آه زمان ما كنتش بحب الراجل
الى ما كنتش أعرفه واتجوزنى بس كنت غلطانة، حبيته عشان هو
كويس.

-طب يا ماما لو الى جالى طلع مش كويس؟

-ضل راجل ولا ضل حيطه.

-لا يا ماما الحيطه أحلى من ضل واحد مش طايقاه.

-هو أنت لحقتى تعرفى حد من الى اتقدملك؟

-لما يا ماما أشوف واحد ويكون فى قبول.. ممكن أعرفه بس
مينفعش أتجوز من أول قعدة.

-بصى بقى عشان الكلام المايه ده... الراجل الى جاي لو كويس
أبوكى هيجوزك على طول... أنت بتكبرى النهارده فيه عرسان بكرة
هنقعد جنب الحيطه.

-وليه نقعد جنب الحيطه ما نقعد وسط الناس عادى.

-خلاص بقى.

أجلس بين أوراق كثيرة من الواضح أننى لا أجد فن الكتابة لكنى
أريد أن أتذكرها، ومضات فى رأسى نبتة الياسمين أمام المنزل، رجل
اسمه لا أتذكر اسمه لكنه ضحى من أجل أبنائه، فتاة انتحرت، امرأة
عجوز، لا أعلم كيف أستعيد صورة دُنيا تلك الفتاة التى لا زمتنى
فى غيبوبتى.

-أنت لسه قاعد تكتب؟

-بحاول.

-وكتبت حاجة؟

-لا يا ست الكل ولا الهوا.

-مش بقولك أنت حلوف بس بتاع مشاعر.

-مين قالك إنى بتاع مشاعر.

-أنا مامتك، وعارفة إنك رومانسى وعارفة أنت بتفكر ازاي، سيبك
من الجو الى أنت راسمه حوالين نفسك، اكتب ... بقولك ايه عايز
الورق ده ولا أخده أمسح بيه الإزاز... أنت عارف الورق بيخلى
الإزاز زى الفل.

-ماما... أخرجى.

أشعر بالفراغ أفتح هاتفي المحمول وأتصفح صفحتي على موقع التواصل الاجتماعي وجدت نور وقد كتبت على صفحتها.

« النهارده ذكرى أجمل اثنين شفتهم بيحبوا بعض، النهارده الذكرى الـ ٥١ لتيته وجدو، لو ماتعرفوش الاثنين ماتوا في نفس اللحظة تيته ماتت الأول وبعد كده جدو، ماتوا وهما ماسكين أيد بعض، وحشوني قوى»

ضغطت على إعجاب فالיום يمثل لي الذكرى الخامسة عشر على لقائي للمرة الأولى بنور، وأنا أقدم لأسرتها أنا ووالدتي واجب العزاء، في مثل هذا اليوم ضغطت نور على أوردة العشق في قلبي، في مثل هذا اليوم ظهرت نور، تركت الهاتف وقررت أن اكتب مشاعري تجاهها على الورق حين أتت رسالة.

-أنت عملت like فأکید أنت صاحی.

أنظر إلى الرسالة وأنا متردد هل أجيبها، ربما تكون علاقتنا انتهت لكن ما زلت مسلوب الإرادة أمامها.

-آه صاحی .. عاملة ایه؟

-النهارده ذكرى تيته وجدو.. فاکر.

-فاکر ... ١٧ يناير الساعة ٨ ونص بالثانية.

- كنا أول مرة نشوف بعض.

- (:

- وش بيضحك ده الى قدرك عليه ربنا؟

- ما الذكرى دى بتخلينى ابتسم... ده شعورى دلوقتى.

توقفت نور قليلا عن الكتابة.

- تعرف البنت الى اسمها شدا الى كنت بحكيلك عنها زمان إنها على طول مكتتبه دى عندنا فى الشغل، ماتت النهارده فى نفس المستشفى الى ماتت فيها تيته وجدو.

- ايه الصدفة دى.. بس هى كانت صغيرة؟

- آه.

- كانت عيانه

- لا.. دى انتحرت.

- ايه؟

- والله... عملت زى الأفلام وسمعت إنها كتبت جواب لأهلها وأخذت مش عارفة منوم ولا ايه كثير لحد ما ماتت.. تفتكر ممكن

ربنا يرحمها؟

-لا والله دى حاجة بتاعت ربنا مش بتاعتى...

-يا رب يرحمها... بص أنا بكلمك عشان أنا حاسة إن الدنيا صغيرة نادر أنا غلطت ومعنديش أعذار أرجوك سامحني بقى.

-أنا عمري ما هزعل منك يا نور... أنت السبب فى إني أكون إنسان عنده هدف.

-طيب كويس.

-بس من بعد أنا ما رجعت من الموت اكتشفت فعلا إن الدنيا أصغر بكثير من إني أفضل مهموم وراها....

توقفت عن الكتابة للحظة.

-أنتِ قلتي البنت اسمها ايه؟

-اسمها شدا.

أنهيت الحديث مع نور بحجه أن هاتفى يحتاج إلى شحن فقد أوشكت بطاريته على الانتهاء وبدأت أحدث نفسى:

الست العجوزة كانت جدة نور وماتت ١٧ يناير، الراجل اللى فى الحلم كان اسمه مرزوق ومات ١٧ يناير، البنت اسمها شدا وماتت ١٧

ينائر، كدت أن أجن.

-ماما... أنا افتكرت كنت بحلم بمين.

-واضح إنك رجعت من الموت نسبة ذكائك صفر.

-ليه بس؟

-شاغل نفسك بحلم.

شرحت لها كامل التفاصيل نظرت إلى.

-النهارده ١٧ يناير وكلهم ماتوا فى نفس اليوم فى ايه بقى.

-واحتمال فى نفس المستشفى.

-ايوه أنا استفدت ايه بقى؟

-أكيد البنت اللى اسمها دنيا... موجودة فى المستشفى.

-بص أنا عارفة إنك حلوف بس مكنتش متخيلة إنك حلوف

ومتخلف.. صعبة الاتنين مع بعض.

-ماما أكيد هلاقيها هناك.

-أو يمكن ماتت...

- يمكن.

- يبقى تتجوز بنت خالتك.!

دُنْيا

كل شيء كالمعتاد هكذا ما أصف قصة زواجي لا حصان ولا فارس ولا قتال من اجل الظفر بجبي، في الحقيقة كنت أظن يوماً أني أساوى وزني ذهباً رغم أن أمي لم تخبرني يوماً أنني ست البنات أو أنني سوف أتدلل لاختيار شريك حياتي، أمي كانت دائماً تدعي ربنا «بس» يكرمك وتتجوزي أقصى أمانيتها أن أتزوج أن أنال رضا رجل سمحت له ظروفه المادية بالزواج، وكل شيء مر كما مر على أمي وكما مر على جدتي موروث أقسمت عليه جدتي الكبرى أن يبقى ويستمر، يأتي زوجي نلتقي ثم يبدى رأيه في ثم يوافق جميع الأطراف دون الرجوع لصاحبة الشأن تبدأ أمي في تجميع كراتين قد خزنتها في كل مكان متاح في المنزل، اكتشفت أنني مثلاً سوف أتزوج بدستين من المناشف والآلاف من الأطباق وملايين من الملاعق وملءات الأسيرة، في الحقيقة أنا لا أنكر أن أمي اهتمت بكل شيء يخص زواجي لكنها فقط لم تهتم بي، لست جاحدة كما تظن أنا لست ناكرة للجميل، ولست شاذة عن القاعدة أو من مدعيات التحرر الزائف أو الانحراف لا أنا فقط كنت أريد أن أختار زوجاً بعد كامل معرفة، لا تكفي لقاءات ما قبل الخطبة هل تعلم مثلاً أنني أدركت حب

هذا الرجل لأصناف طعام أنا لا أطيق النظر إليها هل تعلم أنني كنت مجبرة أن افرغ كامل ما في بطني أثناء تحضير إحدى تلك الوجبات، لست تافهة كانت هذه إحدى أهون اختباراتي من بعد الزواج لكن هل للخادمة حق الاعتراض؟ زوجي إنسان طيب أو من كان زوجي، هو ليس خائن لكنه كان يجب ما لا احبه، كنت مرة في لقاء بعد الزواج مع أمي وأخبرتها على كم التناقضات وبغض النظر عن أنها رأت كل هذه الاختلافات تفاهات سطحية وربما بسبب «أنهم دلعوني قوى في التربية» على الرغم من أنني لم أكن يوماً مدللة في منزلي، هل كانت تُنَشِئُ فتاة غيري؟! هل حقاً أنا مدللة لأنني لا أستسيغ رائحة سجاشره؟ هل أنا مدللة لأنه يفضل النوم معي بطريقة تقليدية جافة؟ وأنا أريد أن أشعر بالحب؟ هل أنا مدللة لأنه لا يهتم بكل شيء في المنزل إلا أنا؟ هل أنا مدللة لأنني أرفض أن يتركني لساعات بين جدران منزله؟ هل ذنبي أن لي مشاعر لا أريد أن أتركها تنطلق في المحذور؟! هل ذنبي أنني أريد أن يشعر فقط بأنه جسدي وأنا أهبه إياه؟! هل ذنبي أنني أريد أن أخرج من لعنة حياة أمي وجدتي وجدتها؟! أنا لا أسأل الحرية ولا أقوى على الصراع لانتزاعها أنا فقط أطلب الإنصاف هل سوف تنصفني أنت وأنت تنعني بالعاهرة أنا لست عاهرة، إياك أن تطلق على هذا اللقب لم أكن زوجي يوماً قط لكنني قررت أيضاً بل وأقسمت أنني لن أكن نفسي، سأهب كل ذرة في كياني لمن يستحق وبكامل إرادتي، هل تسأل ماذا حدث لي هذه

المرة؟ لن أصمت كما صمتت أمى عندما اعترضنى هذا الكائن فى مدرستى ولن أصمت كما صمت بعد محاولة شذا لن أصمت يا نادر، وللمرة الأخيرة أنا لست تافهة أو إمعة لأننى لست جزء من أثاث المنزل أو ممتلكات زوجى الذى أخبرك للمرة المليون أنه رجل جيد ومناسب ربما لفتاة غيرى، كان على أن أنفصل، لماذا أضحك... لم يكن القرار بالسهولة التى تظنها.

استوطنت غرفتى بين أفكارى المتهاكة وبين يوم السابع عشر من شهر يناير فى السنوات الماضية، كانت أمى تطلق إحدى دعابتها حين أخبرتنى باحتمالية موت دُنيا فى يوم ١٧ سابق، ولكنى كنت أكثر جنونًا وتوجهت إلى تلك المستشفى، المستشفى التى رحلت فيها كريمة وزوجها القصة التى تناقلتها الممرضات فيما بينهم وهم يضغطن على شفاهن، عن الرومانسية التى بقيت تتداول عبر الأيام وتزداد أسطورة كريمة سمعتها بأكثر من صورة وبألف طريقة فى الفترة التى اعتدت فيها زيارة قسم الأرشيف فى المستشفى وأنا أبحث فى السجلات عنها، فى البداية بحثت فقط فى أيام السابع عشر من يناير للسنوات الخمس الأخيرة ثم للعشر ثم أى ورقة فيها هذا التاريخ لكن دون جدوى، امتد البحث فى كل تاريخ وفوق كل ورقة ومع كل عامل عن أى حالة وفاة لفتاة تدعى دُنيا دون نتيجة، إذن احتمالية موتها ضعيفة واحتمالية أنها لم تأتى بعد قائمة، أقل من خمسة أشهر على العام الجديد ربما أجدها هذا العام.

انطوى نادر فى حجرته أصبح قليل الظهور والكلام كان يجلس وهو يحاول أن يسرد قصصا على أوراق عله يجد ضالته هذه الفتاة، يومًا يمر بعد الآخر يزداد وحدة، فكر للحظة العودة للتحدث مع نور ربما يجد فى روحها راحة لكن نفسه منعتة، ربما خاف من أن ترفضه مرة أخرى أو ربما لأنه فقد الإيمان بكل شىء، رغم القوة الظاهرة إلا إنه من الداخل لا شىء سوى ذكريات سوداوية وحلم قائم فى خيالة لفتاة تدعى دُنيا، نادر بلا أصدقاء، الظروف هى التى حكمت عليه بهذا، نادر يعمل منذ أن كان فى المرحلة الثانوية وكان يرى كل من هو فى مثل سنة ولديه أب وأم كائن مرفه سطحى فلم يكن يختلط مع من هم فى مثل سنه ولأنه لم يجد من هم أكبر كان وحيدًا حتى أخته التى ظلت سنوات حبيسة نفس ظروفه لم يكن يتقرب منها، هل كانت فى أشد الاحتياج لرجل فى حياتها لكن نادر معذور لم يكن عليه القيام بكل هذه الأدوار فى مثل هذا العمر.

فى لحظة نادرة يطرق نادر باب غرفة أخته.

-خلود... ممكن أدخل؟

بصوت يبدو عليه الدهشة:

-آه... آه .. تعالى.

-فاضية شوية نتكلم؟

-يالهوتي السودا... أنت عايز تتكلم معايا مجد؟

-فى ايه يا خلود؟

-لا أصل هذا الموضوع نادر حدوثه للغاية جدا جدا.

-أمشى؟

تقف وتمسك يده وتجذبه للداخل.

-لا تمشى ايه.. أنا مش عارفة هترجع لعقلك امتى وتحلقلى.

-فى ايه با ينتى؟

-بص أقعد أنا زارنى النبی واللہ... عايز ايه بقى؟

-أنت بتصلى ليه؟

تجلس خلود على ركبتيها فوق سريرها وتهرش فى شعرها.

-هو أنت بالصلاة على حضرة النبی.. جاى بعد السنين دى من قلة الكلام وأول حاجة تسألنى عليها الصلاة، يا أخى أسألنى عاملة ايه الأول كويسة ولا وحشة.

-هتريقى زى أمك هاقوم.

-لا لا لا... يا حبيبي لا.. مقصدهش.

-أنتِ عارفه إني معنديش حد أسأله.

-هحاول أتكلم معاك جد..

-بتصلي ليه اخلصي.

-والله يا نادر يا أخويا أنا معنديش إجابة واضحة عشان زى ما أنت شاييف كده أنا مش مغسلة وضامنه جنة ومش ماشية على الصراط للأسف يعنى بس أنا ممكن أحكيك امتي بدأت أصلي.

-امتي!!

-لما بابا ساب البيت كنت صغيرة ومش حاسة بحاجة وعادى مش فى دماغى يعنى أو مش فاهمة فكان الوقت ييمر وأى حاجة موجودة بتتاكل وأى لبس بيتلبس وعيلة صغيرة، ماكانش فارق وأنا شايفة ماما وعجزها وشايفاك وأنت مسحول بذنب مش بتاعك لحد ما فى يوم كبرت، كبرت وأنا عندى اتناشر سنة، فى يوم ماكانش فيه فلوس فى البيت وأنا كنت تعبانة جدًا كل اللى كان مع أمى يومها شوية ميه وكمدات وبنتها بتتقطع وهى مش عارفة تعمل ايه، أنا شفت دموع ووجع فى عين أمى أكثر بكثير من الوجع اللى أنا كنت فيه، نادر ماما ماكانش معاها تجيب لى أى حاجة تطبخها عشان آكل حاجة دافية، أمى اتذلت وهى ماكانش قدامها أى حل غير إنها تنزل تخبط على جارنا وقتها عاصم أبو نور بتاعتك.

-أنا مفيش حد بتاعى.

-المهم أمى خبطت عليهم عشان تطلب منهم دواء بحجة إن الوقت متأخر ومش هتقدر تسيبنا نايمين بس مكنش عندهم دواء، أنا فاكرة إن ماما طلعت بحسرة على وشها ولطمت وصوتت بصوت مخنوق عشان محدش يسمعها أنا سمعتها والآه طالعة من جواها قوى لحد ما الباب خبط وعاصم الى أنت بتكرهه كان معاه شنطة فيها أدوية وشوية أعشاب ومراته طلعت أكل دافى، أنا كبرت لما حسيت بالعجز فى عين أمى وهى مش قادرة ترفض الصدقة عشان مفيش قدامها حل تانى.

-خلود.. ايه علاقة كل ده بالصلاة؟

-أنت عارف إن احنا يعنى متربناش على دين والصلاة دى ماكنش حد بي فكر فيها بس يومها وأنا نايمة ودرجة حرارتى عالية بصيت للسقف وكلمت ربنا قلت له «أنا عارفة إنك أكيد موجود بس مش عارفة أنت ناسينا ليه وسايينا ليه كده»

-ولقيتى رد؟

-رد... مش عارفة بس يومها قررت إني لازم أقرب له.

-قررتى كده وأنت اتناشر سنة؟

-أنا سنًا كنت اتناشر.. بس حياة كنت أربعين يا نادر، أنا قررت
يعني «استغفر الله العظيم» أدى ربنا فرصة.

-أنت بتستغفرى ليه... ما هو السبب؟

-اسمه ربنا مش هو، ممكن تقول القدر بس هو تقولها لصاحبك.

-ما علينا بالمسميات.

-طيب مع اعتراضى يعنى على طريقتك بس أنا هاكمل.

-كمل.

-أنا قررت أدى لربنا فرصة وأصلى وأدعيه.

-والدنيا اتحسننت؟

-لا خالص، الدنيا كانت بتصعب علينا كل ما بنكبر بس تعرف،
فكرة الأمل إنك بتدعى وأنت بتصلى وفى شبه يقين جواك إن فى حد
سامعك ومش هيسيبك دى كانت مريحة قوى، فكرة العياط وأنت
ساجد وعاجز عن أى حاجة تانية كانت بتهدينى جدًا، فكرة إن فى
حد ممكن يسمعك ويطمئنك وتطمئن معاه دى كانت بتهون كثير
قوى يا نادر قوى، ربنا كان معايا عشان كده عمرى ما حسيت
بالوحدة الى أنت عايش فيها، أنا مش هعرف أوصف لك الإحساس

عشان دى حاجة لازم تحسها بنفسك.

-بس ماكانتش بتجيب أكل ولا شرب ولا فلوس.. ماكانش بيعملنا
أى حاجة غير وجع فى وجع وبس.

-نادر هو أنت مش مقتنع بفكرة وجوده ولا أنت ناغم بس عليه؟

-أنا مشفتش منه غير شقى وبس فبقى فكرة وجوده أو غضبى منه
أساسا مش فارقته كثير.

-تعرف الفرق بينا ايه؟

-ايه؟

-إن نفس الظروف عدت علينا احنا الاتنين بس أنا كان عندى
حاجة اتشعلق فيها... إنما أنت لا، الراحة النفسية لى ذينا كانت
مهمة، وأنا مالقتهاش غير فى الصلاة.

-وعمرك ما سألتي نفسك اشمعنا احنا؟

-لا... لا

-جامدة أنتِ بقى.

-لا والله خالص ومتسألنيش عن السبب، بس أنا قررت أكون
متصالحة مع نفسى وسامحت والله كل حاجة الموضوع ماكانش سهل

وأنا صغيرة ومش فاهمة بس كل ما كانت مصيبة تحصل كنت أقول
لنفسى معلش أكيد فى يوم هتتحسن.

-طيب ما الدنيا اتحسننت بتصلى ليه لحد دلوقتى؟

-يمكن تعود... يمكن ربنا حاببنى وعايبنى أفضل قريبة منه
معرفش بس أنا الصلاة فى حد ذاتها بتخلينى مرتاحة، ربنا خلقنا
عشان نضعف شوية ونبعد شوية بس لما نحتاجه لازم نروحله لازم
ندعيه، اقتنعت بأى حاجة؟

-مش مهم اقتنع ولا لا مش هتفرق معايا... ينفع أسألك حاجة
كمان؟

-أنت أخويا أسأل اللى أنت عايزه.

-فكرتى تسامحى بابا؟

- كثير قوى لحد ما وصلت إنى أسامحه من عدمه مش هتفرق.

-بس أنت ماحاولتيش تزوريه مثلاً؟

-عشان أنا قررت أنى أكمل حياقى عادى باعتباره مش موجود
وبطلت ألومه، لازم تعرف يا نادر إن كلنا فى الآخر هنموت فايتعيش
وأنت متعذب ياتعيش وأنت مرتاح ودى بتاعتك.

-خلود.. أرجع لنور.

-قبل ما تفكر في نور وبابا أنت محتاج تسامح نفسك الأول.

صرت أكثر جنونًا، أحاول استعادة هذا الحلم مع الوقت أتذكر كلمات
أو تومض في رأسي ذكريات، تتردد في رأسي «أنا من أسيوط.. عزبة أبو
القاسم.. لو حابب تيجي تزورني اسأل عليا عند مسجد الحظايزة»

-ماما أنا هسافر أسيوط.

-خيبتى .. ليه؟

-في حد هناك هاسأل عليه.

-وده برده كان في حلمك؟

-آه.

-خيبتى برده.

-هو أنا ليه محدش فاهمنى.. أنت ليه بتتريقى؟

-عشان يا ابني أنت صعبان عليا... مش معقول تبقى مرتبط بحلم
خليك عايش في الواقع عيش الدنيا زى ما هيه.

-يا ماما الدنيا بقت غريبة عليا.. أنا مش حاسس إني عايش... أنا
مبقاش فيا روح مش قادر ومش عايز أعيش.

-ليه كل ده؟

-أنتِ اللى بتسألِي.. وكأنك مش عارفة.

-عارفة وشفت وعشت كل لحظة معاك وسنين وأنا تعبانة بس الدنيا
يا نادر براحتها تقرر تضحكك فنضحك وتقرر تزعلك فتتضايق
تضغط عليك تلعنّها تحن عليك تحبها... احنا كده لازم نقدر
نعيشها.

-الدنيا جت عليا قوى يا ماما...

-تعرف أنت لو اتجوزت بنت خالتك.

-يا ماما!

-أنا باضحك معاك.. لو عايز نصيحتي.. احزن يا نادر عيط كسر في
الحيطه زعق اصرخ بس بلاش تفضل تلوم نفسك.

-ماما هو أنا ازاي دخلت في الغيبوبة... ايه السبب والله العظيم أنا
مش فاكر؟

-نادر ممكن تبطل تكتب؟

-لو بطلت حد هيقلو أنا حصل لى ايه.

-محدث يعرف يا نادر حصل لك ايه أنت ليه مش قادر تصدق.

-يبقى أنا هكمل اللى أنا بكتبه هى قالت لى إنى هاكتب عنها رواية.

-عن مين؟

-دنيا يا ماما... دُنْيا.

-بلاش تكتب يا نادر... الكتابة بتكبر الوجع وأنت...

-أنا هاكمل يا ماما.

دُنْيا

هل تفقدني حقًا، ألم تكتشف بعد من أنا اللعنة عليك، ما هذا ازداد وزنك بشكل ملحوظ أين نادر الذى التقيته الشاب صاحب الابتسامة الأجل، لا أنا لا أحبك وبالطبع تتذكر يجب عليك ألا تحبني، دعك من هذا الحديث لنكمل، لماذا انفصلت عن زوجي؟! سؤال جيد منك لكنى لن أجيب الإجابة التقليدية ، هو بالتأكيد كان جيدا فى كل شيء يخص ما تفكر فيه، لكن فى الحقيقة أنا قررت أن انفصل عنه لأخرج من تلك الفكرة التى لازمتنى لسنوات «جسدى هو ملك لشخص لم ألتقيه» هذا سبب، لا لا لم تكن المباريات تمثل لى أى مشكلة بالعكس كنت أشعر بالراحة فى أيام المباريات لأننى ببساطة كنت أستمتع بتلك اللحظات فى سكون، حتى التجاهل اعتدت عليه ربما كان يتجاهلنى دون قصد هكذا اعتاد الرجال موروث فاشل آخر، هو زوج عادى كجميع المعتاد الذى أخبرتك به سابقا، أنا أتحمل نتاج خياراى تلك التى سوف يحاسبنى الله عليها، لست مثلك أنا أرتكب ذنوبا وأنا أعلم أن هناك رب، لا تقارنى بك لن أسمح أن تتحدث بتلك اللهجة عنه هو لا يزال رب هذا الكون شئت أنت أم أبيت، لا لست قديسة، فقط

أنا دُنْيا مررت بأوقات عصيبة كثيرة وها قد حان الوقت لأصرخ وأرفع صوتي وأحطم كل ما قد جرحني وأنا صغيرة فقط هذا ما أجبرني على الانفصال، نعم سنوات وأنا أخفى مشاعري عن الجميع وكانت الصدفة أنها انفجرت فيه، أشفق عليه فكان في موقف لا يحسد عليه، ربما تمسكت بالانفصال حتى لو كان قرارى خاطئاً لأثبت لنفسي أنني قادرة على اتخاذ قرار، لا لن أخبرك عنه أنا أتحدث عن نفسي، هل تعلم ماذا حدث بعد انفصالي قررت أن اخلع حجابي وأن أظهر جسدى للجميع، هل هذه أفعال قديسة، أنا لا اسمح لك أن تصدر حكمك بآني على صواب أو على خطأ، أنا كنت أريد أن أشعر بالحرية أن أخرج من تلك القيود التي فرضتها عليّ هذه الدنيا، اللعنة عليك يا نادر لست عاهرة مرة أخرى أنا عاهرة أفكارك، أنا كشفت جسدى للجميع أليس هذا الجسد الذي اشتاقت إليه كل عين سقطت عليه، مرة أخيرة يا نادر هناك رب أنا على يقين بوجوده وأرجو أن يغفر لي، ألم تنظر أنت عليه في أول مرة التقينا فلتسأله المغفرة لنفسك، ألا تتذكر عندما تركت قميصي مفتوحاً وتفحصت جسدى؟ مجنون أنت، لا أنا لا أكذب أعترف مرة واحدة بالحقيقة، رجاء اصمت قليلاً ودعنا لا نتحدث مرة أخرى عن جسدى يكفي تلك السنوات، هل تستطيع أن تنقذني مما أنا فيه أنا أمامك فقط لا تنظر بعيداً يكفي أن تنظر تحت قدميك، هل تؤمن أنني حقيقة، أعلم أنك فقدت الأمل في كل شيء نحن هنا سوياً في لحظات ربما لا

يوجد لها عودة، هل تظن أنه سيغفر لي هل أنا مذنبه؟

يزداد الوضع سوءًا ويزداد معه وزني رغم ضعف موهبتي في الكتابة إلا أنني مستمر في سرد قصتها، قصة تلك الفتاة الصغيرة التي أشرقت حياتها على عتمة في مكان صغير الجميع يهرب من واقعه بحثًا عن منقذ له، لا أعلم ماذا أكتب عنها وكيف أجدها، أنا لا أتذكر فتاة تدعى دُنيا التقيتها يومًا، لم يكن هناك فتاة غير نور، هل أخطأت عندما تركتها؟

صوت طرقات على الباب.

-نادر... ممكن أدخل؟

-تعالى يا خلود.

-قوم أغسل وشك... نور بره.. عايزاك.

-نور بره؟

لم أستطع أن أخفي وزني الزائد ولم تستطع هي أيضًا أن تخفي اندهاشها في الحقيقة لم ارتدى ملابس جيدة خرجت لها بلباس نومى، لا أتذكر منذ متى وأنا ارتديته.

-أنا كان لازم أجيلك.

-تنورى أى وقت... بس لو جاية عشانى فأنا زى ما أنت شايفة كده.

-الموضوع ده أنت خلصته من زمان بس أنا مش عاجبنى شكلك.

-عايزة ايه يا نور؟

-أنت مش بس شكلك بقى غريب... ده أسلوبك كمان.

-عايزة ايه؟

-أنا جاية أقولك إنى هاتجوز.

-هو أنا المفروض أرد وأقول ايه؟

-ولا حاجة يا نادر... أنا الى جاية عشان أقولك.

-هتتجوزى مين... أنا عارف كل الناس الى أنت تعرفيهم مفيش حد يستهالك.

تضع نور دعوة الفرح أمامه، يأخذها ويفتحها ويقرأ «نور عاصم وشادى الدربنى»

-شادى مين؟

-أخو شدا الى كانت معايا فى الشغل.

-الى انتحرت؟

-هو ماله ومالها؟

-ليكون زيها.. أنا خايف عليكى مش توأم.

-لا ماتخافش... شادى عاقل.

-هى شدا انتحرت ليه.

-محدث يعرف ولا شادى نفسه.

-هو اسمه شادى ايه.. مش عارف أقرأ.

-اسمه الدرينى.. شادى الدرينى.

يضحك نادر.

-بتضحك ليه؟

-عشان أنا مش مجنون... والى حلمت بيه بيتحقق.. دُنْيا حقيقة

يا نور أنا مش مجنون.

-أنا مبقتش فاهماك.

-شدا انتحرت عشان هي... عشان هي.

-هي ايه؟

-ممکن توصلی رسالة لجوزك المستقبلی.

-رسالة ايه؟

-رسالة من شدا....استنى هنا.

دخل شادی وتفحص أوراقه حتى وجدها رسالة كتبها.

« قول له... إنه ماكانش ينفع أفضل طول عمری محبوبسة جواه،
ماكانش ينفع أفضل كل عمری خايفة يتوجع عشان أنا بتوجع قد
وجعه عشر مرات، ربنا خلقنا كده، احنا روح واحدة فعليا بس
اتركب لها جسمين ومشاعر مختلفة ونفسييتين عكس بعض، قول
له إن في حنة من جسمی جواه فأنا هافضل دايمًا معاه بس قوله إني
مبقتش قادرة أضحي أكثر من كده، روعي هتفضل معاه إنما الباقي
مش بتاعه ولا بتاعی وأنا مش قادرة على الحمل مش قادرة على نفسی
ولا جسمی ولا مشاعری ولا قادرة أفضل في ضهره ومش عايزة أكون
نقطة ضعف له، قول له إني مشيت ومستنياه بس مش دلوقتی خالص
وقوله لو خلف بنت مايسميهاش شدا، يسميها أي حاجة غيری، قول
له هو لازم يدور على سند وعشرة يفضل معاه، إنما أنا خلاص أنا اللي

جوايا محدش يقدر يفهمه ولا يعرفه»

نظرت نور إلى نادر بشفقة.

-نادر أنت... أنت محتاج تروح لدكتور.

-أنا لسه ماتجننتش... أنا مش مجنون دى رسالة من شدا.

قبل أن ترحل نور وقفت لتتحدث مع والدته.

-هما الدكاتره قالوا ايه؟

تدخل أمى تجلس معى بعد أن رحلت نور وعيناها تقسم إنه مسنى حد من الجنون، كل شىء ينهار حولى ولا زالت أمى صامدة.

-متزعلش يا ابنى.

-تعرفى أنا نفسى فى ايه دلوقتى؟

-الى أنت عايزه يا ابنى؟

-عايز كوباية شاي باللبن زى اللى كنتى بتعمليلها لى زمان.

-بس أنت مكنتش بتحبتها.

-آه مكنتش بحبها فعلا بس اليوم اللى كنتى بتعمليلها فيه كنت ببقى عارف إننا معانا فلوس وعندنا لبن وأكل فكنت ببقى مطمئن، أنا

نفسى أبقي مطمئن نفسى أحس بده.

-نادر.. أنت مش شايف إننا محتاجين نروح لدكتور عشان أعصابك
تعبانة.

-ماما والله أنا مش مجنون... أنا حلمت.

-أنت كنت فى غيبوبة يا حبيبى واللى بيكون فى غيبوبة مش بيفتكر
حاجة مش بيحلم حتى.

-ماما أنا شفت شدا فى الحلم وشفّت كريمة جدة نور وشفّت واحد
اسمه مرزوق وفى دنيا وشفّت نفسى وأنا تخين كده.

-نادر أنت مشفتش حاجة أكيد أوهام...

-أنا مش مجنون... أنا عايز أعرف أنا حصللى ايه..

دُنْيا

لماذا أشعر أنك ما عدت تحب الحديث معي، هل تشعر بالملل منه، قاربت على الانتهاء الجميع كان يتهمني بالفجور لكن لا أحد منهم يعرف القصة كاملة ولا حتى أنت، أمي لا تعلم قصة شدا ووالدي لا يعلم شيئاً، زوجي أو إن صح التعبير طليقي لا يعلم عنى شيئاً على الإطلاق، ولا أنت القصة لن تنتهي بعد لا أعلم لماذا لم تسألني قط عن والدي، لا لا.. لا يوجد رابط بين والدي والمدعو مرزوق، هل تعلم أنني لا زلت أسمعه ليلاً وهو يصرخ عليهم، لم تجد له مكاناً في روايتك عنى، كيف لقد أخبرنا هو عن روايته هل بحثت عنه؟ هل تستطيع أن تجده؟ أشك أنت لم تجدني بعد، سوف أرحل وأترك خلفي تلك الأوجاع، لكن لا تنسى أن تخبرهم أنى مجنونة وعشوائية لكنى عاقلة ومنظمة، أخبرهم أنني غفرت للجميع، أخبرهم أن دُنْيا كانت صادقة وكاذبة وملعونة مباركة، أخبرهم أنني لم أقصد أن أتركهم، أخبر الجميع أن دُنْيا كانت بين أيديهم وملكهم وهم من تركوها تضيع، أخبرهم أن دُنْيا لم تكن تسعى لرزق زائد أو متعة جسدية أو شهوة، أخبرهم أنني فقط كنت أريد الحياة...

يجلس نادر في ظلمة غرفته يشعر بالغثيان من شدة أفكاره، الأم الرأس تضربه بقوة، لم يعد يحتمل، كيف كانت ليلته الأخيرة؟ هذا ما كان يشغل تفكيره طوال رحلته إلى أسبوط.

كانت الساعة تشير إلى العاشرة مساءً، هدوء يخيم على المكان عربات قليلة تقف في الموقف بالكاد يكتمل عدد أفرادها، اختفى الجميع إلا من ستة أفراد، نادر عائد محملاً بخيبة أمل في حب ضائع وعمر ظن إنه قد انتهى رغم أنه لم يبدأ بعد، تفكير في هذه الفتاة التي التقى بها كيف تحكى له كل هذا دون أن تعرفه، أنثى ثلاثينية ترتدى فستاناً أسفل ركبتهما بقليل فوقه شال يبدو على وجهها الخوف، تحاول أن تخفى جسدها عن نظرات من حولها على الرغم من خلو المكان خائفة من أن تمتد إليها يد أخرى، رجل ينتظر العربة بترقب يكاد يبكي وهو عائد لا يمتلك من المال شيئاً من أجل إطعام أطفاله حتى إنه لا يعلم ماذا سيفعل لو طلب منه السائق الأجرة هو لا يمتلك أى شيء وفتاة ترتدى ملابس فضفاضة غير متناسقة تطفئ سيجارتها وهي تنظر بكل سخط على من ينظر إليها نظرات اشمئزاز تتابع الموقف تنظر إلى نادر والأنثى تحاول أن تقترب من الرجل تريد أن تسأله لو تستطيع أن تساعد ليتوقف عن بكائه الصامت وزوجان في آخر الصف قد أخذ منهما العمر تفاصيلاً وبقيت تجاعيدهم متشابكة.

يجلس جميعهم داخل ميكروباص، ينظر السائق إليهم «الأجرة مع بعضيكم يا حضرات» ينظر نادر من النافذة والهواء يندفع في وجهه فيغمض عيناه ويحاول إبعاد وجهها من ذاكرته، هو لا يعلم عنها شيئاً يستثير الهواء البارد عينيه فيتركها لتبكي على سنوات عمره، تضع الأنثى يدها على كتفه وبصوت هادئ «واحد من العشرة» ترفع الشال قليلاً ليخفي كتفها وهي تستند بظهرها وترفع رأسها إلى أعلى وتتساءل مش كفاية كده يا دُنيا بقي مش كفاية وجع، يسأل الرجل بصوت ضعيف «هي الأجرة كام ياسطا» يعطيه نادر ما أخذه من السيدة «واحد من العشرة وواحد من الخمسة» تمد الفتاة صاحبة الملابس الفضفاضة يدها وتأخذ الأجرة ودون أن تنظر إلى الرجل تمد يدها إلى السيدة العجوز «أربعة من العشرين» تلتفت وتبتسم إلى الرجل وتعطيه عشرين أخرى «ده الباقي بتاع حضرتك»، عجز في أن يرفض الآن يبكي دون خجل، تبتسم الفتاة وبصوت هامس «الناس لبعضيها»، تمد العجوز يدها بالأجرة إلى زوجها الذي بدوره يعطيها إلى السائق «خذ أربعة من العشرين واثنين من الخمسة» وينطلق السائق أسرع، يصطدم الهواء بوجه نادر تشعر السيدة بالبرودة وهي تغطي نفسها أكثر بالشال ويشعر الرجل بالسعادة كلما اقترب من منزله معه ما يكفي لهذه الليلة، تستند السيدة العجوز برأسها على زوجها «معلش يا حاج أنا تعبأك معايا» يضمها «أنت عارفة أنتِ وقفتي جنبى قد ايه.. دى حاجة صغيرة قوى» ثم ينظر

العجوز إلى السائق «براحة شوية يا ابني.. الحاجة تعبانة» الفتاة لا تبالي من سرعة السائق، يفزع الجميع في لحظة الاصطدام يتناثر الزجاج تنقلب العربة على جانبها يحتك وجه نادر بالأرض مع احتكاك جانب السيارة، تتمسك العجوز بزوجها الذي احتضنها «اتشاهدى يا حاجة»، الفتاة تترك يدها لتصطدم رأسها بقوة وكأنها تعلم أنها نهايتها، الرجل يصرخ «يا رب... عيالى يا رب» أما الفتاة احتضنت نادر بقوة وهى تحاول أن تحمى رأسه ورأسها من الاحتكاك وفى لحظة انتهى كل شئ، أصوات عربات الإسعاف تملأ المكان تنقلهم إلى أقرب مشفى، تدخل السيدة والعجوزان إلى العناية المركزة، الفتاة ملابستها قد امتلأت بالدماء وتوفت قبل أن تصل، الرجل كان يصارع وهو ينادى على أبنائه لكنه لم يلبث أن رحل هو أيضاً وبقي نادر فى غيبوبة وحيداً شاردا يتذكر الصرخات فى لحظتهم الأخيرة.

هذا كل ما أتذكره عن الحادثة التى تعرضت لها، لكن أين كنت قبلها لا أتذكر، المشهد يتكرر طوال رحلة عودتى من أسيوط، نعم ذهبت إلى هناك لأبحث عن مرزوق، اختلط الحلم مع الواقع فى هذه الدنيا.

قطار وطريق سفر ومواصلات داخلية إلى أن وصلت إلى مسجد على حدود قرية فى تمام الثانية ظهراً، وقفت أمام المسجد وأنا لا أعلم هل مسنى الجنون إلى هذا الحد؟ أسأل عمن؟! ولماذا!؟

-أنت بتدور على حد؟

كان هذا الصوت من رجل يقف على باب المسجد، ترددت للحظات قبل سؤاله:

-آه بيت مرزوق.

-مرزوق مين؟

-معرفش عنه غير إنه مات... غرق في البحر يا حج هو وبناته.

-اسمه ايه تانى؟

-اسمه مرزوق.

-الرزق على الله يا ابني...

-أنا جاي من القاهرة عشان أدور عليه.

-طب تعالى ريح العصر قرب يأذن... نصلي الأول.

-لو تعرف قولي وخلاص.

-تعالى استنى لحد الصلاة.

-أنا مش بصلي...

-ربنا يهيدك... باب ربنا مفتوح.. احنا بس الى أبوابنا بتقفل...
مافيش حاجة تمنع إنك تصلى أى وقت.

-هو أنت ليه ما زعقتليش عشان مش بصلى؟

-أدعيلك أحسن من الزعيق...

-هو ربنا موجود؟

-بسم الله الرحمن الرحيم «سُرِّيهِمْ آيَاتِنَا فِي الْأَفَاقِ وَفِي أَنْفُسِهِمْ حَتَّى
يَتَبَيَّنَ لَهُمْ أَنَّهُ الْحَقُّ أَوَّلَمْ يَكْفِ بِرَبِّكَ أَنَّهُ عَلَى كُلِّ شَيْءٍ شَهِيدٌ»

-هو فى مرزوق ولا مفيش وامشى؟

-كان فى مرزوق فعلا بس اختفى يجيله كذا سنة ومحدث يعرف عنه
حاجة.

-وبناته؟

-كان عنده ثلاث بنات، نور وشدا والصغيرة دُنيا..

-اياه؟

-مستغرب ليه؟

-لا مفيش... الدُنيا دى غريبة.

-الدنيا صغيرة قوى يا ولدى ماتستغريش من أى حاجة فيها...

-تعبتنى قوى...

-بسم الله الرحمن الرحيم «اللَّهُ يَبْسُطُ الرِّزْقَ لِمَنْ يَشَاءُ وَيَقْدِرُ وَفَرِحُوا
بِالْحَيَاةِ الدُّنْيَا وَمَا الْحَيَاةُ الدُّنْيَا فِي الْآخِرَةِ إِلَّا مَتَاعٌ»

روح يا ابني دور على نفسك بدل مرزوق...

مجهود بدني وأضعافه ذهني بذلته، كيف وصلت إلى هذا الحد،
تفكير متواصل ونوم دائم أحلام تصاحبها أهوام، كم أنا ضعيف،
كم أنت ضعيف يا نادر، أصرخ أمام المرأة بصوت خافت، أقف
وأنظر بغضب إلى هذا الجسد المترهل، رائحة شهواتي تثير احتقاني،
ما هذا الكم من الأوراق الذي أعيش فيه، ألم تكتفى بعد من
تدوين أوجاعك؟ لماذا تعلقت بها؟ أين هي الآن؟ أكانت مجرد حلم
بلا واقع؟! ألم يحن الوقت للعودة؟ أم أنك سوف ترحل دون أن تترك
ذكرى؟

الآن أتذكر كل شيء..

السابع عشر من يناير في ليلة شتوية الساعة لم تصل إلى السابعة
صباحًا بعد، في بقعة خفية وشارع خال من المارة عند كورنيش
النيل، يجلس نادر وحيدًا مهمومًا ينظر إلى سريان الماء ويبكي، كان

قد وصله خبر رفض نور له للمرة الثانية، مزق رسالته وتركها للهواء ببساطة سنوات حبه تطير بعيداً، كان يبكي عليها وعلى تلك السنوات التي عاشها بمسؤوليات أب كان قد تركهم، يريد أن يصرخ في وجه هذا الأب الذي كان السبب في فشل علاقته معها لا يستطيع نادر أن يبكي أمام والدته، كان صلب، وتد مغروس في الأرض، كان يصارع الحياة وحيداً لكن حياته قد انتهت في اللحظة التي انتهت فيها نور، جلس على الحافة يلقي أحجاراً على المياه، يصب غضبه ويتركه يرحل مع سريان الماء، كانت هي تجلس مستندة على أحد الأشجار، رغم برودة الجو إلا أنها خلعت قميصها فكشفت عن ذراعيها وعن رقبة عنقاء عاجية واستدارة في خصر يتوقه حزام لونها خمري، سارعت بارتداء قميصها في اللحظة التي سمعت فيها صوت بكاء نادر، اقتربت بجذر.

- كل سنة وأنت طيب بمناسبة ٢٠١٦.

ينظر إليها نادر بدهشة وهي تكمل حديثها:

- تفتكر الراجل والست الى قاعدين الناحية الثانية دول بيحبوا بعض؟

يرفع نادر كتفيه في إشارة أنه لا يعلم.

- ماعتقدكش... الى يقعد بالشكل ده أكيد جواه وجع... بص يا

اسمك ايه... هو أنا فيا اللي مكفينى بس أنت محتاج مساعدة.

يتردد نادر فى الإجابة وهو يخفى دموعه.

-لا.. أنا تمام ... أنت مين؟

تجلس دُنيا على مقربة منه.

-أنا دُنيا.

-نادر.

-ما تستغربش من جرائى وإنى جاية أكلّمك.. بس أنا عارفة إن أحيانا بتكون عايز تتكلم مع حد ماتعرفهوش ومدام أنت هنا يبقى أنت مش لاقى حد... زي كده بالظبط.

-لا أنا مش عايز أتكلم... أنا كويس.

-أنا معرفكش عشان تكابر... أنا نفسى أتكلم مع حد وأحكيه بس باقى خيفة، زى ما أنا مرعوبة دلوقتى وأنا بكلمك.

-لا ماتخفيش مش هعملك حاجة.. اتكلمى أنت لو عايزة.

-أنا مش خيفة منك.. أنا خيفة تحكّم عليا من غير ما تعرفنى.

-مابقاش عندى القدرة إنى أحكم على حد.

تمسك حجر وتلقيه في نهر النيل.

-تعرف أنا نفسى فى ايه؟

-فى ايه؟

-نفسى فى فرصة تانية، نفسى حياىى تبدأ من الأول بنفس أحداثها
وآخذ قرارات تانية.

-مش هيحصل.

-ما أنا عارفة.

يأخذ حجر ويلقيه بدوره فى النيل.

-وأنا نفسى فى دُنْيا تانية وحلم تانى...

-برده مش هيحصل.

-ما أنا عارف برده.

-طب ممكن طلب قبل ما نكمل كلام واحكيلك.

-أطلبى..

-ممكن ما تحبينش!.

للتواصل مع الكاتب:

.facebook.com/haitham.ahmed.muhammed

https://www

Haitham Ahmed

haithomaat@gmail.com



فصلة

للنشر و التوزيع

Fasla Publishing & Distribution

تواصل معنا :

01067000701

E-mail:-Fasla.Pub@Gmail.com

Facebook .Com/Fasla .Pub